

# Íyi ulitane e' wì tkënewami

## Génesis

Si'kuaie yëkkuö i' kiè *Génesis*, e' wà kiane chë, *íyi ulitane e' wì tkënewami*. Yëkkuö i' blatëule böt tsjní. Et tsjní e' dör capítulo et dò capítulo dabom eyök kí et (1-11). Iët tsjní e' dör capítulo dabom eyök kí böt dò capítulo dabom skeyök (12-50). Et tsjní e' tò se' a íyi kòs e' wì pakè. Ká jai ena ká i' e' yöne kewe. Ñies ñiwe, nañewe, diwö, si'wö ena bëkwö e' yöne tsawe. Es ñies dayë, ká sí, iyiwak, se' wëpa ena alakölpa, e' kòs yö' Skëköl tò, e' pakè yëkkuö et tsjní tò. Ñies wës s'ditsö tsá e'pa tò ì sulu wamblë' ena ì o' Skëköl tò ie'pa tsatkoie inuí yöki, e' tso' kitule yëkkuö et tsjní ki. Ñies wës s'ditsö pone'mi ká wa'ñe senuk ditséwö wa ditséwö wa ena ì kuëki s'ttò tso' taië ku'ki ku'ki, e' kòs pakè yëkkuö et tsjní tò.

Yëkkuö iët tsjní tò ikkachë se' a tò wës Israel aleripa e'pa dë'bitu wëm eköl kiè Abraham e' wa. Israel aleripa wa Skëköl tò ibikeitsétke ká ulitane wakpa tsatkök inuí yöki. As e' wà tkò, e' kuëki Skëköl tò Abraham klöo' iwák a. Abraham erblë' Skëköl mik buaë, e' kuëki Skëköl tò ittè me' ie' a. E' tso' kitule yëkkuö iët tsjní ki.

Ttè me' Skëköl tò Abraham a, e' è me'itö Abraham alà Isaac ena Isaac alà Jacob e'pa a. Jacob ñe' è kiè ñies Israel. E' kuëki ie' aleripa kièsö Israel aleripa. Yëkkuö iët tsjní è ki itso' kitule tò wës Skëköl tò Abraham, Isaac ena Jacob, e'pa tsatkë'bitu ibolökpa kòs yöki as ttè me'itö ie'pa a e' wà tkò wake'.

### Skëköl tò íyi ulitane yö'

**1** <sup>1</sup>Tsawe tã ká jai ena ká i', e' yö'at Skëköl tò. <sup>2</sup>Mik ie' tò íyi ulitane tsá yö'mi, etã ká wa'ñe kè ki ì ku' yës. Ká sí kè tã!. Di' è me'r iskië. Ká dör ttsettseë. Erë Skëköl Wiköl shkòar di' tsaka.

<sup>3</sup>Etã Skëköl tò iché: “iKá ñinú!”

Etã ká ñine. <sup>4</sup>Ie' tò isué tò ká ñiwe e' dör buaë, e' méatitö ñiweie.

Ká ttsettse, e' méatitö nañeweie.

<sup>5</sup>Ñiwe, e' kiéitö ñiwe. Ká ttsettseë, e' kiéitö nañewe. Ekkë kanewéitö ká tsawe a.

<sup>6</sup>E' bule es tã ie' tò iché: “iIyönú wës skátke kkò dapee es di' shua iblatoie as kè iwöierwane ñi a!”

7 Etā es iyuéitō di' blatoie. Es di' atē kā jaishet ena kā i' kī. 8 Ì yuéitō, e' kiéitō kakölttō. Ekkē kanewéitō etā kā de böt.

9 E' bule es tā ie' iché: “iDi' atē kā i' kī, e' e' dapa'úka ek tsiní ème as íyök poppo dōka!”

Etā es iyöne. 10 Wé íyök poppo deka, e' kiéitō íyök. Wé di' dapaneka, e' kiéitō dayë.

Ie' isué tō e' kōs dör buaë. 11 E' ukuökī tā ie' tō iché: “íYök kī íyi kuá ulitane tskinú! Kākō wör tā' ese, ñies kal ulitane wör tā' ese kōs tskinú iwakmik iwakmik.”

Etā es ekkēpa tskine. 12 Es íyök kī íyi kuá ulitane tskine kākō wör tā' iwakmik iwakmik, ñies kal wör tā' iwakmik iwakmik. Ie' tō isué tō ekkēpa kōs, e' dör buaë. 13 Ekkē kanewéitō etā kā de mañat.

14 E' bule es tā ie' iché: “ì dalöburta' yönú kā jai a! Ekkēpa dör buaë kā blatoie ñiwe nañewe, ñies ikkachoie mik tā diwö de kawö tköwoie, ñies kā shta'woie ena duas tköke e' jchënoie. 15 Ekkēpa kōs dalöburke tajë kā i' kī.”

Etā es iyöne. 16 Es ie' tō ì dalöburta' tajë ese yuéat bök. Ikibiie dör kā ñiwoie ñiweie. Wéne dalöbur diöshet e' dör olo'bunoie nañeweie. 17 Ekkēpa méatitō kā jai a dalöbunoie kā i' kī 18 ñië nañëë, ñies kā ñiwe kā nañewe e' blatoie. Ie' tō isué tō ekkēpa dör buaë. 19 Ekkē kanewéitō etā kā de tkël.

20 E' bule es tā ie' tō iché: “iYiwak serke di' a dayë a, e' kōs yönú tajë! ÌÑies dù ulitane yönú as iur kashuk a!”

21 Etā es iyiwak blubluë serke dayë a, ekkēpa yuéitō. Ñies iyiwak

kōs serke di' a ena dayë a ekkēpa yuéitō iwakmik iwakmik. E' sù dù ulitane yuéitō, iwakmik iwakmik.

Ie' isué tō ekkēpa kōs dör buaë. 22 Etā iyiwak yuéitō e'pa a ie' er buaë ché ttè i' wa: “a' alönú tajë, di' kōs, dayë kōs, e' wà ióka tajë. Ñies as dù alör tajë kā wa'ñe.”

23 Ekkēpa kanewéitō etā kā de skël.

24 E' bule es tā ie' tō iché: “iYiwak serke kā sí kī, e' ulitane yönú iwakmik iwakmik! iYiwak uru, iyiwak kañiru, iyiwak e' kuke iski, ekkē kōs yönú iwakmik iwakmik!”

25 Etā es ie' tō iyiwak ulitane yué kā sí kī iwakmik iwakmik. Ie' tō isué tō ekkēpa kōs dör buaë.

26 E' ukuökī tā ie' tō iché: “Ditsö yuösö wës se' es as ie'pa tkökasö kā i' kōs wökirie. Nima, dù, iyiwak uru, iyiwak kañiru, iyiwak e' kuke iski, ekkē kōs tso' kā i' kī, e' atdaë ie'pa ulà a.”

27 Mik Skököl tō s'ditsö tsá yö', etā iyuéitō wës ie' es; Ie'pa yuéitō wëm eköl ena alaköl eköl.

28 Ie' er buaë ché ie'pa a i' es: “A' ala'r kóka tajë, a' alönú tajë kā ulitane kī. Ká i' kōs e' kané ú a' tō. Nima, dù, ena iyiwak ulitane ekkēpa kōs wökir a' dör, e' wà ú.”

29 E' ukuökī tā Skököl tō iché ie'pa a: “Ye' ttò ttsó. Íyi kuá kōs wörtā' ñarta', ese méatyö a' a ñë. Ñies kalwö ulitane katarta'

ku'yarta' ese kōs méatyō a' a katè ku'yè. <sup>30</sup>Erè iyiwak kañiru, iyiwak uru ena dù, ekkēpa kōs a kākō méatyō katè.” Etā es iatē. <sup>31</sup>Ie' isué tō ekkē kōs dōr buaë shūte. Ekkē kanewéitō etā ká de teröl.

**2** <sup>1</sup>Es ká jai ena ká i', ñies íyi ulitane tso' iki, e' yöne one se. <sup>2</sup>Ká de kul etā ì kōs yö'bitūitō e' yöne one, e' kuēki diwō e' wa ie' kè kanēblēne. <sup>3</sup>E' diwō wa kè ie' kanēblēneia ká i' yuök e' kuēki ie' iché tō diwō e' dōr buaë. Ñies ie' iché tō semana bit e' diwō bata e' dōr batse'r se' a.

#### Skököl Jehová tō s'ditsö tsá yué

<sup>4</sup>I' dōr ká jai ena ká i' tsá yöneat, e' pakè.

Mik Skököl Jehová tō ká jai ena ká i' e' yö', <sup>5</sup>e' kēwō ska' tā kām ie' tō kālī patkò ká i' kī, ñies kè yi ku' ká kanēuk. E' kuēki kām kal kuá tskir ena kām kākō tskir. <sup>6</sup>Erè di' tskirke íyök a, e' tō íyök kōs nuweke. <sup>7</sup>Etā Skököl Jehová tō íyök yué s'ditsöie eköl wák dōr wēm. Etā ie' tō iwöiké iyik a tā iyöne se'ie ttsē'ka.

<sup>8</sup>E' ukuökī tā ie' tō ká buaala yué ekwōki diwō tskirke e' ēka, ká kiè Edén eē. Etā wēm yö'itō, e' méatitō ká buaala e' a senuk. <sup>9</sup>Eē ie' tō kal ulitane wēr bua'buāë, ñies iwō dōr buaë katano ese tské. Ká buaala e' shūshā, ie' tō kal tské bōlka. Kal elka dōr sene michoë e' kéli. Kal iēlka e' dōr íyi buaë ena íyi suluë ese jchēnoie e' kéli.

<sup>10</sup>Edén ká shūā di' tskirke etō, e' tō ká buaala nuweke. Wé ká e'

kkò dōwā eē di' e' ulà jchērke dōkā tkètō. <sup>11</sup>Di' ulà etō kiè Pisón. E' tkökemi ká kiè Havilá, e' kōs a. Ká e' kī oro tso'. <sup>12</sup>Oro e' dōr oro bua'buā. Ñies kiò masmas bua'buā, ese tso' ena ák bua'buā kiè ónice ese tso'. <sup>13</sup>Di' ulà etō tkökemi ká kiè Cus, e' kōs a. E' kiè Guihón. <sup>14</sup>Iulà etō skà mir ká kiè Asiria diwō tskirke, e' ēkā. E' kiè Tigris. Etā di' ulà bataie, e' kiè Éufrates.

<sup>15</sup>Mik Skököl Jehová tō wēm tsémi méat ká buaala atē Edén e' shūā as ikaneütō, as ikkō'nütō, <sup>16</sup>etā ie' tō ttè dalöiēno i' mé iā: “Ká buaala e' kéliwō ulitane katēmibō. <sup>17</sup>Erè íyi buaë ena íyi suluë ese jchēnoie e' kéliwō kè katar. Mik kal e' wō katébō, etā be' duōwāraë. E' kuēki kè ikatar.”

<sup>18</sup>E' ukuökī tā ie' tō iché: “Kè idōr bua' wēm a senuk ekōrla. Súyō ie' a wapie yuè eköl ikimuk buaë.” <sup>19</sup>Etā iyiwak yö'itō íyök wa ekkē kōs debitū iwā wēm a suè tō ima ie' tō ikiè mekāmī. Tā wēs wēm tō ikiè mékā es iatē. <sup>20</sup>Es wēm tō iyiwak uru ena iyiwak kañiru, ñies dù, ekkē kōs kiè mékā. Erè kè ie' kīmuk kune buaë ie' wapieie.

<sup>21</sup>Etā Skököl Jehová tō wēm kapōwēwā taiē, e' dalewa ie' tō ichane yéttsā etō, e' chkà wöiéwāneitō. <sup>22</sup>Ichane e' yuéitō alakölie tā idebitū iwā wēm a. <sup>23</sup>Mik wēm tō isué, etā ichéitō:

“i' je' dōr ye' wák dichéwō ena ye' wák chkà! Alaköl dē'kā wēm wa, e' kuēki ikirdaë alaköl.”\*

<sup>24</sup>E' kuēki wēpa kè serpaia iyé ena imì e'pa dapōmik, iserdawā

\* 2.23 Hebreoie ttè kiane yēnuk wēm e' dōr ish ena ttè kiane yēnuk alaköl e' dōr isha.

alaköl ta. Ie'pa bøl serdaë ñita, ta imía wes wák eköl è es.

<sup>25</sup>E' késka' ta wëm ena alaköl iëter sume, erë ie'pa kè wa jaë jcher.

### S'ditsö tö Skëköl ttò dalösewéwa

**3** <sup>1</sup>Tkabè tso' etö, e' erbikò taië s'kìtö'woie iyiwak kañiru yö' Skëköl Jehová tö, ekkè kos tsata. Ká et ta ie' tö alaköl a ichaké:

—¿Mokì Skëköl tö iyë'at a' a tö ká buaë shüa kal ulitane tso', e' wö kè katar yës?

<sup>2</sup>Alaköl tö iiüté:

—Au, e' kè dör es. Ie' tö sa' a iché tö kal ulitane wö katarmi. <sup>3</sup>Erë kal àr ká i' shushäë, e' wö kè katanuk, kè e' kanuk sa' a. E' wamblé sa' tö, etä sa' duöralur.

<sup>4</sup>Etä tkabè tö iché alaköl a:

—Au, e' dör kache. A' kè duòpawa. <sup>5</sup>Ie' wa ijcher buaë tö mik kalwö e' katéwa a' tö, etä ì dör buaë, ì dör suluë e' jcherdaë a' wa wes ie' wák wa ijcher es.

<sup>6</sup>Etä alaköl isué tö kalwö e' wër buaë katè. Ie' éna ikatak íyi jchenoie buaë. E' kueki ie' tö kalwö batsée, katéwaitö. E' ukuöki ta ie' tö imé iwëm a, etä iwëm ikatéwa ñies. <sup>7</sup>E' bet ta ì dör sulu, ì dör buaë ese ane ie'pa éna, etä ie'pa wa ijchenewa tö ie'pa iëter sume. Etä ie'pa tö kal kiè higuera, e' köyök yué banoie e' wa ie'pa e' patréwa.

<sup>8</sup>Siwa' bitsirke tsáli, etä wëm ena ilaköl tö Skëköl Jehová shkokedur ká buaë shüa, e' ttsé. E' yöki ie'pa e' blélur kal tso' taië ese shüa.

<sup>9</sup>Erë Skëköl Jehová tö wëm kié ta ichaké:

—¿Wé be' tso'?

<sup>10</sup>Wëm tö iiüté:

—Ye' tö ittsé tö be' shkokedur ká buaala shüa. Ye' dur sume, e' kueki ye' suane be' yöki. E' kueki ye' e' bléwa be' yöki.

<sup>11</sup>Etä Skëköl tö ie' a iché:

—¿Yi be' a iché tö be' dur sume? Ichó ña tö kalwö yë'yö be' a tö kè ikatar ¿e' katébö?

<sup>12</sup>Ie' tö iiüté:

—Be' tö ye' a alaköl me', ye' wapieie, e' tö ye' a kalwö mé katè. E' katéwayö.

<sup>13</sup>Etä Skëköl Jehová tö alaköl a ichaké:

—¿Iók bö iwamblé?

Ie' tö iiüté:

—Tkabè tö ye' kitéka, e' kueki ye' tö kalwö e' katéwa.

<sup>14</sup>Etä Skëköl Jehová tö tkabè a iché:

—Ì wamblé be' tö, e' kueki ye' tö be' a iché tö iyiwak kos shüa be' è weirdaë michoë. Këkraë be' shkoraë e' kuule be' batsi' kì ta be' kkò a ká po mirawa. <sup>15</sup>Be' ena alaköl meraatyö ñi bolökie. Be' aleripa kos ena alaköl aleripa kos, e'pa ate ñi bolökie ñies. Alaköl aleri eköl tö be' wökir shka'wëraë ena be' tö ie' klò kaniñak shka'wëraë.

<sup>16</sup>E' ukuöki ta ie' tö iché alaköl a:

—Mik be' alà kurketke etä be' weirdaë siarë, idalë'r taië e' ttse-raëbö. Erë be' kì be' wëm kiardaë ena ie' döraë be' wökirie.\*

\* 3.16 Mik be' alà kurketke...ie' döraë be' wökirie: Ñies ttè e' mane'wëmisö i' es: Be' éna e' alakka be' wëm kì, erë ie' e' alörakka be' kì.

17E' ukuökḱi ṭa ie' tō iché wēm a:  
—Be' tō be' alaköl ttō iuté, kalwō  
yē'yō be' a tō kè ikatar, e' wà  
katébō. E' kuēkḱi be' weirdaē ñies.  
Be' kuēkḱi íyök sulu'wērawayō. Be'  
kaneblōraē darērēē be' chkè yuloie.  
18Íyök kḱi dika'chka ena kākō sulusi,  
alōrdaē. Ñies kalwō kañiru katera-  
bō. 19Be' kḱawōṭa kaneblök darērēē  
chkoie dō mik be' duowa, míane  
íyōkie wēs be' dōr kuaē es etā. Be'  
yōne íyök wa, e' kuēkḱi be' dōrane  
íyōkie.

20Wēm tsá yōne, e' kiè Adán. Ila-  
köl dōr se' mì tsá. E' kuēkḱi Adán tō  
ikiè méka Eva.\*

21Etā Skēköl tō datsi' yué ie'pa a  
iyiwak kkuölit wa, ṭa ie'pa paiéitō.  
22Etā ie' tō iché: “Iñe ì dōr buaē  
ena ì dōr suluē, e' jcher ditsō wā  
wēs se' wā ijcher es. E' kuēkḱi dō'  
ie'pa mi', sene michoē e' kéli wōba-  
tsök katè ṭa iser michorak.”

23E' kuēkḱi ie' tō wēm ena ilaköl  
yéttsa ká buaala tso' Edén e' a, ṭa  
ipatkémiitō íyök wakanéuk. Íyök  
wa wēm yōne e' kḱi ipatkémi kane-  
blök. 24Ie' tō itrē'wēshka, e' ukuökḱi  
ṭa ì ttsē'ka pik ṭa' tso' ká jaì a kiè  
kérub, e'pa tuléwāitō ká buaala  
e' ñalé ska' diwō tskirke e' ēka  
ikkō'nuk. Ñies tabè wōñarke dalō-  
lōē ratkear siwā' kḱi, e' méatitō as kè  
yi dōwāia sene michoē kéli ska'.

#### Caín tō iël kiè Abel, e' ttéwa

**4** 1Etā Adán sené Eva ṭa. Eva  
duneka ṭa ilà kune wēm. Ikiè  
mékaitō Caín.\* Mik alà kune, etā

Eva tō iché: “Jhová tō ye' kímé, e'  
kuēkḱi ye' alà kune eköl wēm.” 2E'  
ukuökḱi ṭa ilà skà kune ek, e' kiè  
Abel, Caín èl tsirla. Abel tō obeja  
alōweke. Caín tō dali kuatkeke.

3Ká et ṭa, Caín wā idali wōne,  
ese kak mí mè Jhová a idalōioie.

4Etā Abel wā ie' icha mí ñies. Ie'  
obeja tsá bua'buā, ese kak mí ie' wā  
mè Jhová a. Abel ena ì méitō e'  
wēr buaē Jhová wa. 5Erē ie' kè wā  
Caín ena ì méitō e' sune es, e' kuēkḱi  
Caín uluneka tajē, iwō yée suluē.

6E' kuēkḱi Jhová tō Caín a ichaké:  
“¿Iók be' ulune wō yée sulu? 7Be' tō  
ì bua' úpa, e' ma be' jañuke tsuleē.  
Erē ì sulu wamblébō, e' kuēkḱi ì  
sulu e' métēr bër be' panuk namuie  
e' aloka be' kḱi. Erē be' ké e' alökka  
iki.”

8Ká et ṭa, Caín tō iël Abel kiémi  
kañika. Mik ie'pa demi kañika,  
etā eē Caín ñippéka iël ṭa etā iël  
ttéwāitō. 9E' ukuökḱi ṭa bet, Jhová  
tō Caín a ichaké:

—¿Wé be' èl Abel?

Caín tō iuté:

—Ye' kè wā ijcher. Ye' kè dōr ie'  
kkō'nukwak.

10Skēköl tō ie' a iché:

—¿Iók bō iwamblé es? Be' èl  
ttéwabō, e' pé tēne tajē íyök kḱi, e'  
nuí tso' be' kḱi. E' kḱi ye' kḱawōṭa be'  
we'ikök. 11E' kuēkḱi be' weirdaē  
íyök kḱi wé be' tō be' èl pé tkō'wé, e'  
kḱi be' yerattsayō. 12Be' kaneblōmi  
tajē, erē kè wā wōrpa buaē. Be'  
kḱawōṭa shkök ká wa'ñe, kè a eno  
ṭa' yēs.

\* 3.20 Eva: Hebreoie s'kiè e' wà kiane chē ttsē'ka.

\* 4.1 Caín: Hebreoie s'kiè e' wà kiane chē ye' ulà a ide.

<sup>13</sup>Etā ie' tō Jehová iūté:

—E' darërë ye' a. Kè ye' a idalë'ttsënuκ. <sup>14</sup>I'ñe be' tō ye' uyëttsa ká i' ki, e' ukuöki tã ye' kawöta shkök ká wa'ñe kamië, kè a eno tã'. Be' kè ku'ia ye' tã, e' kuëki yi ye' kuëwa, ese tō ye' tterawa.

<sup>15</sup>Erë Jehová tō iūté:

—Yi be' ttéwa, ese kí weirdaë siarë taië iskéie.

Etā Skëköl tō iwakyuée iwà kkachoië as yi tō ikuëwa, ese kè tō ittöwa. <sup>16</sup>Etā Caín e' yëttsa Jehová wörki tã imiã ká kië Nod ee, ká e' atë Edén diwö tskirke e' kke.

<sup>17</sup>Etā Caín sené ilaköl tã. Idunekã tã ilà kune wák dör wëm, e' kië Enoc. E' ukuöki tã Caín tō ká yué et, kië mékaitö ilà kië wa Enoc.

<sup>18</sup>Enoc dör Irad yé. Irad dör Mehujael yé. Mehujael dör Metusael yé. Metusael dör Lámeç yé.

<sup>19</sup>Etā Lámeç senéwa alakölpa böi tã. Eköl kië Adá, eköl kië Silá. <sup>20</sup>Etā Adá dë' aläë kië Jabal. E' aleripa dör iyiwak alöukwakpa e' serke úla yöule datsi'tak wa ese a. <sup>21</sup>Ie' ël kië Jubal. E' aleripa dör ma'ma kicha tã' guitarra sù ena ma'ma pulë sù ese bla'ukwakpa. <sup>22</sup>Silá dë' aläë ñies kië Tubal-Caín. E' aleripa dör tabechka kië bronze ena hierro ese sté. E' kutà kië Naamá.

<sup>23</sup>Ká et tã Lámeç tō iché ilakölpa a:

“A Adá, a Silá, ye' ttò ttsó:

Wëm eköl duladula tō ye' shkaö', e' kuëki ye' tō ikötwa.

<sup>24</sup>Yi tō Caín ttéwa, e' tō iské tuëraë siarë,

erë yi tō ye' ttéwa, e' tō iské kí tuëraë jaishet shute.”

<sup>25</sup>Adán alà skà kékane ilaköl tã wák wëm. Eva tō iché: “Skëköl tō ye' a alà ské mé eköl, Caín tō Abel kötwa, e' skéie.” E' kuëki ie' tō ikië méka Set.\*

<sup>26</sup>Ñies Set de aläë wák wëm kië mékaitö Enós. E' kéwö ska' tã s'ditsö tō Skëköl a iyi tsá ki'mi ena idalöië'mi ikië Jehová e' wa.

### Adán aleripa

**5** <sup>1-2</sup>Mik Skëköl tō s'ditsö tsá yö', etã iyuëitö wës ie' wák es. Ie'pa yuëitö wëm ena alaköl. Ie' er buaë ché ie'pa a. Ie' tō ie'pa yué, e' diwö shã tã ikië mékaitö s'ditsö. I' dör Adán aleripa e'pa kië.

<sup>3</sup>Mik Adán kí duas de cien eyök kí dabom mañayök (130), etã ie' alà kune eköl, e' dör wës ie' wák es, ikië mékaitö Set. <sup>4</sup>E' ukuöki tã ie' kí seneia duas cien paryök (800). E' shua ie' ala'r kí kune wëpa ena alakölpa. <sup>5</sup>Es ie' kí duas deka seraa cien suliyök kí dabom mañayök (930) etã ie' blënewa.

<sup>6</sup>Mik Set kí duas de cien eyök kí skel (105), etã ie' alà wëm kië Enós, e' kune. <sup>7</sup>E' ukuöki tã ie' kí seneia duas cien kuryök kí kul (807). E' shua ie' ala'r kí kune wëpa ena alakölpa. <sup>8</sup>Es ie' kí duas deka seraa cien suliyök kí dabom eyök kí böκ (912) tã iblënewa.

<sup>9</sup>Mik Enós kí duas de dabom suliyök (90), etã ie' alà wëm kië Cainán, e' kune. <sup>10</sup>E' ukuöki tã ie' kí seneia duas cien paryök kí

\* 4.25 Set: Hebreoie s'kië e' wà kiane chë ie' tō imé.

dabom eyök kî skel (815). E' shua ie' ala'r kî kune wëpa ena alakölpa. <sup>11</sup> Es ie' kî duas deka seraä cien suliyök kî skel (905) ta iblënewa.

<sup>12</sup> Mik Cainán kî duas de dabom kuryök (70), eta ie' alà wëm kiè Mahalalel, e' kune. <sup>13</sup> E' ukuökî ta, ie' kî seneia duas cien paryök kî dabom tkëyök (840). E' shua ie' ala'r kî kune wëpa ena alakölpa. <sup>14</sup> Es ie' kî duas deka seraä cien suliyök kî dabom (910) ta iblënewa.

<sup>15</sup> Mik Mahalalel kî duas de dabom teryök kî skel (65), eta ie' alà wëm kiè Jéred, e' kune. <sup>16</sup> E' ukuökî ta, ie' kî seneia duas cien paryök kî dabom mañayök (830). E' shua ie' ala'r kî kune wëpa ena alakölpa. <sup>17</sup> Es ie' kî duas deka seraä cien paryök kî dabom suliyök kî skel (895) ta iblënewa.

<sup>18</sup> Mik Jéred kî duas de cien eyök kî dabom teryök kî bök (162), eta ie' alà wëm kiè Enoc, e' kune. <sup>19</sup> E' ukuökî ta, ie' kî seneia duas cien paryök (800). E' shua ie' ala'r kî kune wëpa ena alakölpa. <sup>20</sup> Es ie' kî duas deka seraä cien suliyök kî dabom teryök kî bök (962) ta iblënewa.

<sup>21</sup> Mik Enoc kî duas de dabom teryök kî skel (65), eta ie' alà wëm kiè Matusalén, e' kune. <sup>22</sup> Ie' tö Skëköl ttò è dalöieke. Matusalén kune, eta ie' kî seneia duas cien mañayök (300). E' shua ie' ala'r kî

kune wëpa ena alakölpa. <sup>23</sup> Es ie' kî duas deka seraä cien mañayök kî dabom teryök kî skel (365). <sup>24</sup> Ie' sene' buaë Skëköl ta, e' kuëki ká et ta Skëköl wa ie' mítser ttsë'ka, e' kuëki kè ie' ku'ia.

<sup>25</sup> Mik Matusalén kî duas de cien eyök kî dabom paryök kî kul (187), eta ie' alà wëm kiè Lámec, e' kune. <sup>26</sup> E' ukuökî ta, ie' kî seneia duas cien kuryök kî dabom paryök kî bök (782). E' shua ie' ala'r kî kune wëpa ena alakölpa. <sup>27</sup> Es ie' kî duas deka seraä cien suliyök kî dabom teryök kî sulitu (969) ta iblënewa.

<sup>28</sup> Mik Lámec kî duas de cien eyök kî dabom paryök kî bök (182), eta ie' alà kune wëm. <sup>29</sup> E' kiè mékaitö Noé. \* Mik ie' tö ilà kiè méka, eta ie' tö iché: “Jhová tö íyök sulu'wa. E' kuëki se' kawötä kanëblök darë-rë ikuatkoie; erë alà i' tö se' keraë enuk.” <sup>30</sup> Noé kune, e' itökî Lámec kî seneia duas cien skeyök kî dabom suliyök kî skel (595). E' shua ila'r kî kune wëpa alakölpa; <sup>31</sup> Es ie' kî duas deka seraä cien kuryök kî dabom kuryök kî kul (777) ta iblënewa.

<sup>32</sup> Noé kî duas de cien skeyök, e' itökî ila'r kune mañal. Ikibi kiè Sem. Ishu ék kiè Cam. Ibata ék kiè Jafet.

### S'ditsö ì sulu è wambleke kekraë

**6** <sup>1-2</sup> Mik s'ditsö alönémi tajë ká i' kî, eta Skëköl ala'r\*

\* 5.29 Noé: Hebreoie s'kiè e' wà kiane chë enuk.

\* 6.1 Skëköl ala'r: Kè s'wa ijcher mokî tö yi chéitö es. Welepa tö ibikeitsè tö e' dör Skëköl biyöchökwakpaie ö aknamaie erë Jesús tö iché tö esepa kè a senukwa s'ditsö ta (Marcos 12.25). Welepa skà tö ibikeitsè tö e' dör s'ditsö wésele ser suluë. Ì wambleke-rakitö ese kè wër buaë Skëköl wa, e' è jcher se' wa.

tö isué tö s'ditsö alà busipa dör bua'buaala. E' kueki ie'pa tö busipa wa ie'pa wöbatse ese tsélur. <sup>3</sup>Erë Jehová tö iché: “Ditsö dör duöta'wa ese wakpa. I'ñe ta ye' kè tö kawö mepaia ditsö a seno ká taië. Es iserdaë duas cien eyök kî dabom böyök (120), ekkë ulat.”

<sup>4</sup>Mik Skëköl ala'r bak senuk s'ditsö alà busipa ta alà koka ie'pa ta, eta e' këska' ta wëpa blubluë, kakkëë, esepa wëlepa bak ká i' kî. Nies e' ukuökî wëpa esepa bakia. E'pa dör pë' darërë kkeauleka taië ia'chki ta ese.

<sup>5</sup>Jehová tö isué tö s'ditsö tö ì sulu è wambleke taië shute. Ì suluë è bikeitseke ie'pa tö kekraë. <sup>6</sup>E' kueki Skëköl er a idalënene taië. Ie' tö ibikeitsé: “Kè yö ditsö yuöpa.” <sup>7</sup>Eta ie' iché: “Ditsö yö' ye' tö ká i' kî, súyö e'pa ewëwa. Nies iyiwak kos serke ká sí kî, e' ewerawayö. ¿Iie ye' tö ie'pa yö'?” <sup>8</sup>Erë wëm tso' eköl kiè Noé, e' sueke Jehová tö er bua' wa.

### Noé tö kanò bërie yuë

<sup>9</sup>Ttè ikkë dör Noé pakè.

Noé dör wëm yësyësë Skëköl wörki. Kekraë ie' tö Skëköl ttö dalöieke buaë. Ie' eköl è serke wës Skëköl kî ikiane es. <sup>10</sup>Ie' ala'r dör mañal wëpa kiè Sem, Cam, ena Jafet.

<sup>11</sup>Skëköl wörki s'ditsö tso' e' wamblök sulu ème, ñippök taië shute. <sup>12</sup>Ie' tö isué tö taië iyi suluë è tso' iyök kî. <sup>13</sup>E' kueki ie' tö Noé a iché: “Ye' tö ibikeitsétke tö ditsö kos tso' ká i' kî e' ewerawayö se. Ie'pa ñippöke taië shute ká i'

kî. E' kueki ye' tö ditsö kos tso' ká i' kî e' ewerawa seraä di' taië wa. <sup>14</sup>E' kueki kanò yuó etö bërie kal bua'buä ese wa, e' shü blató. Kanò wöar tso' ipamik, e' wötó kiöchka dalolo bötsböts ese wa u'rki ena ishüa as di' kè tköwäia. <sup>15</sup>Kanò yuó batsí metro döka cien eyök kî dabom mañayök kî skel (135 metros) ekkë. Nies ishöló yuó metro döka dabom böyök kî böt kî shaböts (22,5 metros) ekkë. E' sù ispe yuó metro döka dabom eyök kî mañat kî shaböts (13,5 metros) ekkë. <sup>16</sup>Kanò kî u yuöka, erë kanò kkò kî iulat múat metro shaböts. Kanò shü blató mañat kuö. Nies iwëkkö yuó et kanò spé mik shkowäie kanò a. <sup>17</sup>Di' patkerayö iyi tso' ttsë'ka ká i' kî e' kos ewowa. Ekkë duörawa seraä ká wa'ñe. <sup>18</sup>Erë ye' ttè meraë be' a tö be' tsatkeraëyö kanò a di' yöki. Be' ala'r ena be' alaköl ena be' yakpa, e'pa tsúmi e' ta kanò a. <sup>19</sup>E' sù iyiwak kuakî kuakî tso' ká sí kî, e' iómi kanò a etö wë'ñe etö alaki as itsatkër wës be' es. <sup>20</sup>Iyiwak kos ió kanò a. Iyiwak kuakî kuakî urta', iyiwak uru, dö iyiwak e' kuke iski, e' kos iómi kanò a, etö wë'ñe etö alaki, as kè iduölur. <sup>21</sup>Nies chkè ulitane dapa'ú bló be' a ena iyiwak a katè.” <sup>22</sup>Eta ekkë kos wakanewé Noé tö se wës Skëköl tö iché ia es.

### Di' bak taië ká i' kî

**7** <sup>1-4</sup>E' ukuökî ta Jehová tö Noé a iché: “I'ñe kuiki ta ye' tö kalî patkeraë ká i' kî döka ká dabom tkëyök (40) ñië nañeë. Ie' wa iyi ulitane yö' ye' tö tso' ttsë'ka ká sí



ki, e' kōs ɛwɛrawayō yēs! Erē ye' tō isuē tō ditsō ulitane shuā be' è serke buaē yēsyesē wɛs ye' kī ikiane es. E' kuēkī be' ɛ' iōkā kanò a be' yamipa kōs t̄a. N̄ies iyiwak batse'r\* kōs ese tsūmi dōkā kuktō wē'ñe kuktō alaki. Erē iyiwak kē dōr batse'r, ese tsūmi etō wē'ñe etō alaki. E' sū n̄ies dù kuā'kī kuā'kī tsūmi dōkā kul wē'ñe kul alaki ʔs kē ierwa. Kōs ttè chéyō be' a, e' wakaneú es.” 5Et̄a e' kōs wakanewé Noé tō yēsyesē wɛs Jehová tō ie' a iché es.

6Mik di' bak taijē ká i' kī, et̄a Noé kī duas tso' cien teryök (600). 7Ie' ɛ' iéka kanò a ila'r ena ilaköl ena iyakpa e'pa kōs t̄a ɛ' tsatkök di' alörke taijē e' yökī. 8-9Iyiwak batse'r, e' sū iyiwak kē dōr batse'r, iyiwak ɛ' kuke ibatsi' kī n̄ies dù, ekkē kōs dewā kanò a Noé t̄a bōlka bōlka wɛs Skököl tō iché ia es.

10Ká de kul, et̄a di' tō ká katémitke. 11Noé kī duas de cien teryök (600), kī si' et kī ká dabom eyök kī kul (17). E' diwō shà t̄a íyök tskirólone t̄a di' tso' idikiā e' deka taijē ká wa'ñe. N̄ies ká jaishet kköburo-lone t̄a di' biteshka taijē kalije ká i' kī. 12Et̄a kalijē yēne darērēē dōkā ká dabom tkëyök (40) ñiē nañeē. 13Kalijē yēnemi, e' diwō shà t̄a Noé ɛ' iéka kanò a ila'r t̄a. Ila'r kiè Sem, Cam ena Jafet. E' sū ilaköl, iyakpa mañal, e'pa ɛ' iéka n̄ies ie' t̄a kanò a. 14Ie'pa t̄a iyiwak ulitane dewā kanò a, iyiwak uru, iyiwak kañiru, iyiwak ɛ' kuke iski kī ena dù ulitane. Ekkē kōs dewā kanò a ie'pa


t̄a. 15Iyiwak kōs ekkē dewā kanò a bōlka bōlka. 16E' shuā imí wē'ñe etō alaki etō, wɛs Skököl tō iché ia es. E' one yēs t̄a, Skököl tō kanò wékkō wótéwā.

17Et̄a kalijē yēnemiie dōkā ká dabom tkëyök (40). Wɛs di' alör mirka es kanò batsemirkaitō. 18Es di' kī alönemi taijē t̄a kanò batsemirkaitō buaē. 19-20Es di' alōnekā taijē kabata kōs blubluē, e' tsat̄a jaishet dō metro kul ekkē. 21Es kōs íyi tso' ttsē'ka ká sí kī, ekkēpa duolur di' a sɛ. Dù kōs, iyiwak uru kōs, iyiwak kañiru kōs, iyiwak ɛ' kuke iski kōs, n̄ies s'ditsō ekkēpa kōs duolur yēs. 22Í kōs tso' ká sí kī ttsē'ka, e' ɛnewa sɛ. 23Erē Noé ena ì tso' ie' t̄a kanò a, e'pa è tsatkēne. Et̄a imalepa kōs e' ɛnewa. Es n̄ies iyiwak ulitane ɛwéwa di' tō. Dù ulitane, iyiwak uru, iyiwak kañiru dō iyiwak ɛ' kuke iski, ekkē kōs ɛnewa sɛraā. 24Es di' at̄e íyök kī ká dōkā cien eyök kī dabom skeyök (150) ekkē.

### Di' sinewane

**8** 1Erē Skököl kē éna Noé ché'wa. N̄ies iyiwak ulitane tso' Noé t̄a kanò a e' kē ché'wa ie' éna. Ie' tō siwa' patké ʔs itō di' siuwane ká wa'ñe. Et̄a di' pasine-mine ɛnaena. 2Íyök tskirólone e' wötēnene. N̄ies ká jaishet kköburo-lone e' wötērulunene. Et̄a kalijē wöklōnewā kē yērku'ia. 3Di' tso'ia e' pasirmirne ɛnaena. Ká de cien eyök kī dabom skeyök (150), et̄a di'

\*7.1-4 *Iyiwak batse'r*: E' wà kiane chē iyiwak kē dōr n̄a ie'pa a. Se' welepa tō ichè iyiwak skítane.



*Skëköl tō Noé tsatkée kanò a di' taië e' yöki. (Génesis 7.23)*

sirmir ème. <sup>4</sup>E' k<sub>i</sub> si' de teröl (6) diwö de dabom eyök k<sub>i</sub> kul (17), etä erpa kanò sineka kabata kiè Ararat e' k<sub>i</sub>. <sup>5</sup>Etä di' pasinemiie. Si' de dabop (10), e' tsá diwö, etä kabata kakkeë ese wënemitke.

<sup>6</sup>E' k<sub>i</sub> ká de dabom tkëyök (40), etä Noé tō kanò wékkö tsitsir kköppée. <sup>7</sup>Ie' tō dù öló sù, e' émi et. Erë dù e' kè dë'iane kanò a ie' urke wışhwışh dò mik di' sine etä. <sup>8</sup>E' ukuök<sub>i</sub> tã ie' tō nuböl émi et isuöie tō ká sinene. <sup>9</sup>Erë di' tso'ia iyök k<sub>i</sub>, kam isirwa, e' kueki nuböl dene kanò a. Kè ie' wa ká ulat poppo kune e' tkowa. Noé tō nuböl kló'wéwa ulà wa tã itséwaneitö kanò a.

<sup>10</sup>Ie' tō iskà pané döká ká kul, etä ie' tō nuböl skà émine. <sup>11</sup>Ká tui-nemitke tã nuböl dene, e' wa kal ulatska debitu ikà k<sub>i</sub>. Es Noé éna iane tō iyök k<sub>i</sub> sirmir. <sup>12</sup>Ie' tō iskà pané döká ká kul, etä ie' tō nuböl skà émine. Nuböl e' kè dë'iane.

<sup>13</sup>Mik Noé k<sub>i</sub> duas tso' cien teryök k<sub>i</sub> et (601), etä iyök pasinene. Etä si' kewe, e' tsá diwö, ie' tō kanò k<sub>i</sub> u tso' e' kléttsa. Etä ie' isué tō iyök pasinene. <sup>14</sup>Kawö de si' et k<sub>i</sub> diwö dabom böyök k<sub>i</sub> kul (27), etä ie' isué tō iyök pasinene seraa. <sup>15</sup>Etä Skëköl tō ie' a iché: <sup>16</sup>“Be' e' yóttsa kanò a, be' alaköl tã, be' ala'r tã, be' yakpa tã ñies. <sup>17</sup>Es iyiwak ulitane yöurbö se. Dù ena



*I' dör ák katatëule ka'ie iyi ña'woie Skëköl a ese. (Génesis 8.20)*

iyiwak uru ena iyiwak e' kuke iski e' kos yólurbö kanò a, as imi' ká wa'ñe alönuk tajë ká wà iökne.”

<sup>18</sup>Es Noé alaköl ena ila'r ena iyakpa, e'pa e' yélur kanò a. <sup>19</sup>Es ñies iyiwak ulitane, uru ena kañiru ena iyiwak e' kuke iski, ñies dù e' kos e' yéttsa kanò a se. <sup>20</sup>E' ukuöki ta ie' tö ák kataté ka'ie\* et Jehová a. E' bata ki ie' tö iyiwak batse'r ese jché ña'wéitö etö etö Jehová dalöioie. Ñies dù batse'r jchéitö ña'wéitö Jehová a etk etk. <sup>21</sup>Mik ishklé alar buaë, e' demi Jehová ska' ta ittséitö ta ibikeitséitö: “Eré ditsö ià duladula döka këchke, eta ì sulu è bikeitsekeitö. Erè kè yö ká sulu'wepawaiä ie'pa kueki. Es ñies kè yö ì kos tso' ttsë'ka e' ewëwaiä wes yö iewéwa es.

<sup>22</sup> “Ká i' tso'ia,

eta dalì kuatkërmi, iwà wörmi; kaba tso', kase tso' ñies; kalì tso', duas tso' ñies; ká ñiwe tso', ká nañewe tso' ñies.”

#### Skëköl Jehová tö ittè mé Noé a

**9** <sup>1</sup>Eta Skëköl er buaë ché Noé a ñies ila'r a ta ichéitö ie'pa a: “A' alönú tajë. Ká wa'ñe wà iöne a' ala'r wa. <sup>2</sup>Ditsö yöki iyiwak ulitane suardaë. Iyiwak ulitane urke kashuk a ena iyiwak serke ká sí ki ena iyiwak serke dayë a, e' kos ate a' dikia. <sup>3</sup>Iyiwak ulitane ena kalwö ena kakö e' katèmi a' tö wé kiane a' ki ese. E' kos méatyö a' a katanoie. <sup>4</sup>Chkè ulitane katèmi a' tö, erè kè ikatar ipé ta, se' serke s'pé mik e' kueki. <sup>5</sup>Se' serke s'pé mik, e' kueki kè se' meneat ñi ttökwa, e' nuí ta'.

\* 8.20 Ák kataté ka'ie: E' wà kiane ché si'kuaie altar.

Yi tö eköl ttéwā, ese kichatërdaë. E' sù iyiwak wé tö s'ttéwā, ese kawöta ttéwā ñies. A' wé tö s'ttéwā, ese nuí patuëraëitö ye' a.

6 “Skëköl tö s'ditsö yö' wës ie' es, e' kuëki yi tö se' ttéwā, ese wák kawöta' ttéwā wake'.  
7 Erë a' alönú tajë, ká wa'ñie wà ió ala'r wa.”

8 Ñies Skëköl tö iché Noé a ena ila'r a: 9-10 “I'ñie ye' ttè mukeat a' a ena iyiwak e' yéttsa kanò a a' ta, e' kôs a. 11 Mokjë ye' tö a' a ichè tö ye' kè tö ditsö ena iyiwak tso' ká wa'ñie, e' kôs ewepawaia di' wa. Di' kè döpaia ká wa'ñie sulu'ukwā wës itka es.” 12-13 Ye' tö shkaba' tkekear mò shuā iwà kkachoie a' a ena ditsö ulitane a tö ye' ttè méatyö a' a ena iyiwak kôs a kekraë. 14 Mik ye' tö mò patké ta e' shuā shkaba' tkëne e' wërmi, 15 etā ye' éna iane tö ye' ttè me'atbak a' a ena iyiwak kôs a tö kè ye' tö ditsö ena iyiwak ulitane ewepawaia di' wa. 16 Es mik shkaba' tkëne mò shuā e' suéyö, etā bet ye' éna idaā tö ye' ttè me'at ditsö a ena iyiwak kôs a michoë kekraë. 17 E' dör iwà kkachoie tö ye' ttè me'atbak ditsö ulitane a ñies iyiwak tso' ká i' kī e' kôs a.” Es Skëköl tö Noé a iché.

**Noé alà kiè Cam  
e' kè wā iyé dalò ta'**

18 Noé ala'r e' yé'lur kanò a, e'pa kiè Sem, Cam ena Jafet. Cam dör Canaán yé. 19 E'pa mañal dör Noé ala'r. Ie'pa aleripa tö ká wà iéne.

20 Noé dalì kuatkëmi. E' shuā uva kuatkëitö. 21 Ká et ta ie' tö uva diò

shköshkö e' yé ta e' tö ie' ttéka tajë. Ie' datsi' yéttsa ta ianewa iškī sume iu a. 22 Cam dör Canaán yé, mik e' tö iyé sué sume, etā ie' mía ibiyó chök iëlpa böl e'pa a. 23 Erë Sem ena Jafet e'pa kè éna iyé tër sume e' suak. E' kuëki ie'pa tö datsi' klö'wéwā, imékarakitö e' o' bataki ta ie'pa shkëmi tsikka iwötrélur bánet dò wé iyé tër ee ta ipabakéwā datsi' e' wa.

24 Noé tté tajë blo' tö e' tī'neka. Mik ie' wā ijchenewā ilà tsirla ék kè wā ie' dalöiëne', 25 etā ichéitö:

“iAs Canaán kawö tkò suluë!  
ie' weirdaë siarë shute klöulewā iëlpa böl e'pa kanè mésoie!”

26 E' ukuökī ta ikī chéitö:

“iJehová dör Sem Këköl as e' kikarka!

As Canaán aleripa kanëblò Sem aleripa a ikanè mésopaie.

27 As Skëköl kawö buaë mù Jafet a as ie' alör michoë.

As Jafet ditséwöpa ser Sem yamipa ska'.

As Canaán aleripa kanëblò ie' a klöulewā ikanè mésopaie.”

28 Di' bak tajë ká i' kī, e' ukuökī ta Noé sene'ia duas cien mañayök kī dabom skeyök (350). 29 Mik ie' blënewā, etā ie' kī duas tso' cien suliyök kī dabom skeyök (950).

**I' dör Noé aleripa kiè**

**10** 1 Noé ala'r kiè Sem, Cam ena Jafet. Di' bak tajë e' ukuökī ta ie'pa wák ala'r kune. Ikkëpa dör Noé aleripa kiè.

<sup>2</sup>Jafet ala'r wëpa dör Gómer, Magog, Madai, Javán, Tubal, Mésec, ena Tirás. <sup>3</sup>Gómer, e' ala'r wëpa dör Asquenaz, Rifat, ena Togarmá. <sup>4</sup>Javán e' ala'r wëpa dör Elisá, Tarsis, Quitim ena Rodanim. <sup>5</sup>E'pa kōs dör Jafet aleripa. Ie'pa ñi blatérak ulawa ulawa. Es iká yuérakitō tseë iwakpa a dayë kkōmik. Ittō kuá'kī kuá'kī iwakpamik.

<sup>6</sup>Cam ala'r wëpa dör Cus, Misraim, Fut, ena Canaán. <sup>7</sup>Cus ala'r wëpa dör Sebá, Havilá, Sabtá, Raamá ena Sabteca. Raamá ala'r wëpa dör Sebá ena Dedán. <sup>8</sup>Cus dör wëm kiè Nimrod, e' yé. Nimrod de keweie blu' darërëë ká i' kī. <sup>9</sup>Jehová ttò wa Nimrod dör yëria poë. E' kuëkī ttè i' meneat se' a: “Be' dör yëria poë Skëköl ttò wa wës Nimrod es.” <sup>10</sup>Mik Nimrod bak ká kiè Sinar, e' wökirie etá ká e' shuá ká tso' tkël kiè Babel, Érec, Acad, ena Calné. E' kōs dör ká bua'ie ese. <sup>11</sup>Wëm e' yéttsá Sinar a eköl kiè Asur. E' mía ká bánet. Etá eë ie' ká yué tkël kiè Nínive, Rehobot-ir, Quélah ena Resen. <sup>12</sup>Resen dör ká bërie. E' atë Nínive ena Quélah, e' shushá.

<sup>13</sup>Etá Misraim aleripa mía ie'pa ikkë wakpaie: ludeowak, ana-meowak, lehabiwak, naftuhiwak, <sup>14</sup>patruseowak, casluhítawak, ena caftoritawak. Filisteowak datse caftoritawak wa.

<sup>15</sup>Canaán dör Sidón yé. Sidón dör ie' alà tsá. Ie' alà skà kiè Het. <sup>16</sup>Canaán aleripa mía ie'pa ikkë wakpaie: jebuseowak, amorreowak, gergeseowak, <sup>17</sup>heveowak, araceowak, sineowak, <sup>18</sup>arvadeowak,

semareowak ena hamateowak. Ká taië tá e' wakpa kōs ñi blabatsérak ponemi ká kuá'kī kuá'kī. <sup>19</sup>Canaán-wak ká atë ká kiè Sidón döwá ká kiè Gaza. Gaza atë ká kiè Guerar e' kke. Nies ie'pa ká atë döwá ká kiè Lesa diwö tskirke e' kke. Lesa atë ká tkël kiè Sodoma, Gomorra, Admá ena Seboím e' kke. <sup>20</sup>E' wakpa kōs dör Cam aleripa. Ie'pa ñi blabatsérak ulawa ulawa. Es iká yuëitörak tseë iwakpa a. Ittō kuá'kī kuá'kī iwakpamik.

<sup>21</sup>Nies Sem dè' alàë, e' dör Jafet ël kibi ék. Heber ala'r kōs dör Sem aleripa. <sup>22</sup>Sem ala'r dör Elam, Asur, Arfaxad, Lud ena Aram. <sup>23</sup>Aram ala'r dör Uz, Hul, Guéter ena Mas. <sup>24</sup>Arfaxad dör Sélah yé. Sélah dör Heber yé. <sup>25</sup>E' ukuökī tá Heber alà de böl. Eköl kiè Péleg. \* E' kèwö ska' tá sulitane ñi blabatsérak, e' kuëkī ikiè mékãitō es. Iëköl kiè Joctán. <sup>26</sup>Joctán ala'r dör Almodad, Sélef, Hasar-mávet, Jérah, <sup>27</sup>Hadoram, Uzal, Diclá, <sup>28</sup>Obal, Abimael, Sebá, <sup>29</sup>Ofir, Havilá, ena Jobab. E'pa kōs dör Joctán ala'r. <sup>30</sup>Ie'pa serke ká micho ká kiè Mesá tkörö ká kiè Sefar e' shuulat a. Sefar atë kabata a, wé diwö tskirke, e' kke. <sup>31</sup>E' wakpa kōs dör Sem aleripa. Ie'pa ñi blabatsérak ulawa ulawa. Es iká yuérakitō tseë iwakpa a. Ittō kuá'kī kuá'kī iwakpamik.

<sup>32</sup>Pè' kōs ekkëpa dör Noé aleripa kiè kitule wës iditséwö kuá'kī kuá'kī ena wé iserke ká kuá'kī kuá'kī es. Di' bak taië, e' ukuökī tá se' alöne-ne taië e' ñi blabatsérak ká wa'ñe.

\* 10.25 Péleg: Hebreoie s'kiè e' wà kiane chè ñi blabatsè.

Skëköl tö s'ditsö ké  
ttök kua'ki kua'ki

**11** <sup>1</sup>Kuaë ta sulitane ttöke ttè etökicha è wa. <sup>2</sup>Mik ie'pa míyaldak diwö tskirke, e' ëka, demirak kakkue kiè Sinar ee, eta ee ie'pa e' tséat senuk. <sup>3</sup>Ká et ta ie'pa iché ñi a: “Mishkarak skauchka yuök blok sù, e' kukuèsö bö' a as imi'a darërë u yuoie.” Es iwakanewérakitö ák skéie. Ñies kiöchka dalolo bötsböts ese wa ibatsérakitö ì tso' shutuule ese skéie. <sup>4</sup>E' ukuöki ta iskà chénerakitö ñi a: “Mishkarak ká blublu yuök. E' shua u yuösö kakkëë döka ká jai a. Es se' e' chömi buaë kékëpa taië ena kè se' kawöta ñi blabatsök ká wa'ne.”

<sup>5</sup>Erë Jehová e' éwa isaukrak tö ie'pa ká blublu yueke ena u kakkëë yuekerakitö. <sup>6</sup>Eta ie' tö ibikeitsé: “Ie'pa dör ká etkè wak ena ittörak etkè ñies, e' kuëki ie'pa tö kanè i' kékami. E' ukuöki ta kè ì a ie'pa wöklönuk. Ie'pa sermi wes ie'pa ki ikiane es. <sup>7</sup>E' kuëki súyö ie'pa kè ttök kua'ki kua'ki as kè ñi ttö ania.”

<sup>8</sup>Es Jehová tö iblabatsérak ká wa'ne. Ee ie'pa ká yué e' kané wöpanere. <sup>9</sup>Ká e' ki Jehová tö ie'pa ké ttök kua'ki kua'ki ena iblabatsérakitö ká wa'ne. E' kuëki ká e' kinewa Babel.\*

**Sem aleripa**

<sup>10</sup>I' dör Sem aleripa kiè. Di' bak taië, e' ukuöki duas bök, e' kèwö ska' ta Sem ki duas tso' cien eyök (100). Eta ie' alà kune wëm kiè

Arfaxad. <sup>11</sup>Arfaxad kune, e' ukuöki Sem kí seneia duas deka cien skeyök (500), eta ie' ala'r skà kune wëpa ena alakölpa.

<sup>12</sup>Mik Arfaxad ki duas tso' dabom mañayök kí skel (35) eta ie' alà kune wëm, e' kiè Sélah. <sup>13</sup>Sélah kune, e' ukuöki ta Arfaxad kí seneia duas cien tkëyök kí mañal (403), eta ie' ala'r skà kune wëpa ena alakölpa.

<sup>14</sup>Mik Sélah ki duas tso' dabom mañayök (30), eta ilà kune, e' kiè Heber. <sup>15</sup>Heber kune, e' ukuöki ta Sélah kí seneia duas cien tkëyök kí mañal (403), eta ie' ala'r skà kune wëpa ena alakölpa.

<sup>16</sup>Mik Heber ki duas tso' dabom mañayök kí tkël (34), eta ilà kune, e' kiè Péleg. <sup>17</sup>Péleg kune, e' ukuöki ta Heber kí seneia duas cien tkëyök kí dabom mañayök (430), eta ie' ala'r skà kune wëpa ena alakölpa.

<sup>18</sup>Mik Péleg ki duas tso' dabom mañayök (30), eta ilà kune, e' kiè Reú. <sup>19</sup>Reú kune, e' ukuöki ta Péleg kí seneia duas cien böyök kí sulitu (209), eta ie' ala'r skà kune wëpa ena alakölpa.

<sup>20</sup>Mik Reú ki duas tso' dabom mañayök kí bök (32), eta ilà kune, e' kiè Serug. <sup>21</sup>Serug kune, e' ukuöki ta Reú kí seneia duas cien böyök kí kul (207), eta ie' ala'r skà kune wëpa ena alakölpa.

<sup>22</sup>Mik Serug ki duas tso' dabom mañayök (30), eta ilà kune, e' kiè Nahor. <sup>23</sup>Nahor kune, e' ukuöki ta Serug kí seneia duas cien böyök (200), eta ie' ala'r skà kune wëpa ena alakölpa.

\* 11.9 Babel: Hebreoie s'kiè e' wà kiane chè chilineka.

<sup>24</sup>Mik Nahor k<sub>i</sub> duas tso' dabom böyök k<sub>i</sub> sul<sub>i</sub>tu (29), et<sub>a</sub> ilà k<sub>u</sub>ne, e' kiè Térah. <sup>25</sup>Térah k<sub>u</sub>ne, e' ukuök<sub>i</sub> t<sub>a</sub> Nahor k<sub>i</sub> senei<sub>a</sub> duas cien eyök k<sub>i</sub> dabom eyök k<sub>i</sub> sul<sub>i</sub>tu (119), et<sub>a</sub> ie' ala'r skà k<sub>u</sub>ne wëpa ena alakölpa.

<sup>26</sup>Mik Térah k<sub>i</sub> duas tso' dabom kuryök (70), e' ukuök<sub>i</sub> t<sub>a</sub> ie' ala'r k<sub>u</sub>ne mañal. Ala'r e'pa kiè Abram, Nahor ena Harán.

### Térah ala'r

<sup>27</sup>E'pa dör Térah ala'r. Térah dör Abram, Nahor ena Harán, e'pa yé. Harán, e' dör Lot yé. <sup>28</sup>Harán blënew<sub>a</sub> kewe iyé Térah e' yöki k<sub>a</sub> kiè Ur ee. K<sub>a</sub> e' atë Caldea. Ie' blënew<sub>a</sub> wé ie' k<sub>u</sub>ne ee.

<sup>29</sup>Abram senéw<sub>a</sub> alaköl kiè Sarai, e' t<sub>a</sub>. Nahor senéw<sub>a</sub> alaköl kiè Milcá, e' t<sub>a</sub>. Milcá dör Harán alà busi ena Iscá kutà. <sup>30</sup>Sarai kè döt<sub>a</sub> alàè.

<sup>31</sup>Térah e' yétts<sub>a</sub> Ur, dör caldeawak k<sub>a</sub> e' a. Ie' alà Abram ena itala kiè Lot dör Harán alà ena iyäk kiè Sarai e'pa m<sub>i</sub>a ie' t<sub>a</sub>. Warma ie'pa m<sub>i</sub>rö dök<sub>a</sub> k<sub>a</sub> kiè Canaán ee, erë ie'pa demi k<sub>a</sub> kiè Harán, et<sub>a</sub> ee ie'pa e' tséat senuk. <sup>32</sup>Eë Térah blënew<sub>a</sub>. Ie' k<sub>i</sub> duas tso' cien böyök k<sub>i</sub> skel (205).

### Jehová tté Abram t<sub>a</sub>

**12** <sup>1</sup>Mik Abram bak senuk k<sub>a</sub> kiè Ur ee, et<sub>a</sub> Jehová tö ie' a iyè': "Be' k<sub>a</sub> ena be' ditséwöpa ena be' yé yamipa, e' múat t<sub>a</sub> be' yúshka senuk, k<sub>a</sub> kkachekeyö be' a ee. <sup>2</sup>K<sub>a</sub> e' k<sub>i</sub> ye' tö be' aleripa alöwëraë tajë. Ie'pa döraë k<sub>a</sub> tajë wakpaie. Ye' er buaë chöraë be'

a. Ye' tö pë' tajë keraë be' kkeök<sub>a</sub> tajë. Nies be' er buaë chöraë pë' tajë a. <sup>3</sup>Wépa er buaë ché be' a, esepa a ye' er bua' chöraë. Wépa tö alibché be' k<sub>i</sub>, esepa we'ikerayö. Be' batamik ye' er buaë chöraë k<sub>a</sub> ulitane wakpa a."

<sup>4</sup>Et<sub>a</sub> Abram e' yétts<sub>a</sub> k<sub>a</sub> kiè Harán wës Jehová tö ie' a iyè' es. E' këska' t<sub>a</sub> ie' k<sub>i</sub> duas tso' dabom kuryök k<sub>i</sub> skel (75). Ie' m<sub>i</sub>a Canaán. <sup>5</sup>Et<sub>a</sub> ie' w<sub>a</sub> iyamipa mítser sera<sub>a</sub>. Ilaköl kiè Sarai ena ilayök kiè Lot ena iyi ulitane tso'rak iw<sub>a</sub>, ekkë k<sub>o</sub>s mítserak iw<sub>a</sub>. Nies Harán wakpa welepa tso' ie' w<sub>a</sub> kanè mésoie, e' mítser ie' w<sub>a</sub>. Mik ie' demi Canaán, <sup>6</sup>et<sub>a</sub> ie' tkami k<sub>a</sub> k<sub>o</sub>s ekkë d<sub>o</sub>mi k<sub>a</sub> kiè Siquem atë Canaán ee. Eë k<sub>a</sub> atë kiè Moré. Eë k<sub>o</sub>s klö àr elka. Canaánwakpa a k<sub>a</sub> e' dör k<sub>a</sub> dalöiërta' ese. (E' k<sub>e</sub>wö ska' t<sub>a</sub> Canaánwakpa serkei<sub>a</sub> ee.) <sup>7</sup>Et<sub>a</sub> ee Jehová e' kkaché Abram a t<sub>a</sub> ichéitö i<sub>a</sub>: "K<sub>a</sub> i' meraëyö be' ditséwö a."

Et<sub>a</sub> Abram tö ák kataté ka'ie et iyiwak jchoie Jehová dalöioie ee Jehová e' kkayè' ie' a e' kuëki. <sup>8</sup>E' ukuök<sub>i</sub> t<sub>a</sub> im<sub>i</sub>a k<sub>a</sub> dör kabataie atë Betel diwö tskirke e' ëk<sub>a</sub>. Et<sub>a</sub> ee ie' sené ekuölö. K<sub>a</sub> e' atë Betel ena k<sub>a</sub> kiè Ai e' shuulat a. Eë ie' tö ák skà kataténe et. Eë ie' tö Jehová dalöié. <sup>9</sup>E' ukuök<sub>i</sub> t<sub>a</sub> Abram m<sub>i</sub>a enaena Négueb kke.

### Abram m<sub>i</sub>a Egipto

<sup>10</sup>E' k<sub>e</sub>wö ska' t<sub>a</sub> ketba tkënew<sub>a</sub> poë k<sub>a</sub> e' k<sub>i</sub>. Kè i t<sub>a</sub> katè wé Abram serke ee. E' kuëki ie' m<sub>i</sub>a Egipto senuk ekuölö. <sup>11</sup>Abram dökemitke

Egipto etā ilaköl Sarai, e' a ichéitö: “Ye' ttò ttsó. Ye' wā ijcher buaë tö be' dör buaala. <sup>12</sup>Mik Egipto wakpa tö be' sué tö be' dör buaala, etā ie'pa tö ichèmi: ‘Wì dör wëm wì alaköl.’ Etā ye' tterawā ie'pa tö be' kuëkì erë ie'pa be' meraat senukwā ie'pa tā. <sup>13</sup>E' kuëkì, be' we'ikèyö, ichó ie'pa a tö ye' dör be' akè as kè itö ye' ttöwā be' kuëkì as ye' kawö tkò buaë.”

<sup>14</sup>Mik Abram demi Egipto, etā Egipto wakpa isué tö Sarai dör alaköl buaala. <sup>15</sup>Ká e' blú kuëblupa tö isué ñies tö Sarai dör alaköl buaala. E' kuëkì ie'pa míā ichök blu' a tö alaköl e' dör buaala. Etā imítserak iwā blu' wé a.

<sup>16</sup>Etā Egipto blú tö Abram kkö'né buaë Sarai dalërmik. Tajë ie' tö Abram a iyiwak uru kakmé. Obeja, baka, burro ena kameio e' kakméitö ie' a. Se' ñies kakméitö ie' a kanè mésoie wëpa ena alakölpa. <sup>17</sup>Erë Sarai kuëkì Jehová tö Egipto blú ena iyamipa we'iké tajë. Duè mékajä tajë ie'pa kì. Kawö darërëé mékajitö ie'pa kì. <sup>18</sup>E' kuëkì Egipto blú tö Abram tsuk patké tā ichéitö iā: “¿Iók bö iwamblé ye' tā es? ¿Ì kuëkì be' kè wā ye' a iyëne tö alaköl i' dör be' alaköl? <sup>19</sup>Be' tö ye' a iyë' tö ie' dör be' kutà. E' kuëkì tsir etā ye' senéwā ie' tā. I' be' alaköl, itsúmine tā be' yúshka.” <sup>20</sup>Etā Egipto blú tö ishkëkipa patké Abram yöktsā kā e' kì ilaköl tā ena i kos tso' ie' wā ekkëpa tā.

#### Abram ena Lot ñi blabatsélor

**13** <sup>1</sup>E' ukuökì tā Abram ena ilaköl e' yélur Egipto míāne Négueb. Ie' íyi kos mítserak iwā sēraā. Ie' alayök Lot e' míā ie'pa

tā ñies. <sup>2</sup>Abram dör íyi blu' tajë. Ie' wā oro tso'. Ie' wā inuköl tso' tajë. Ñies ie' wā iyiwak tso' tajë. <sup>3</sup>Négueb eē tā ie' míāne enaena dō Betel. Betel eē tā ie' míāne tkörö wé ie' bak senuk kewe eē. Ká e' atē Betel ena Ai e' ulat shushā. <sup>4</sup>Ká e' a ie' wā ák katatëulebak ka'ie, eē ie' tö Jehová dalöiéne.

<sup>5</sup>Lot dör ñies íyi blú tajë wēs iyëla Abram es. Iyiwak tso' tajë ie' wā obeja ena baka. Se' tso' ie' wā ñies kanè mésopaie. <sup>6</sup>Erë wé ie'pa serke ká e' kì kakö kè ku'ia ie'pa iyiwak kos a katè. Ie'pa kè chë'kaia ñi o'mik. <sup>7</sup>Abram ena Lot e'pa iyiwak kkö'nukwakpa ñippöke, ñi wöñatköke. Ñies pë' tso'tke kenet ká e' kì. E' wakpa dör canaánwak ena fereseowak. <sup>8</sup>Ká et tā Abram tö iché Lot a: “Se' dör ñi yami. Kè imène buaë tö se' ñippò. Ñies se' iyiwak kkö'nukwakpa ñippöke ème e' kè dör buaë. <sup>9</sup>Ká saú wì ká bua' tso'. Be' ishushtó wéne wa be' wöbatse, e' a be' yúshka. Be' mí wì ëkà, e' tā ye' mí dià ëkà. Etā be' mí dià ëkà, e' tā ye' mí wì ëkà.”

<sup>10</sup>Etā Lot ká kì sué kamië, etā kos di' kiè Jordán, e' kkömik ká buaë tso', e' kì sué ie' tö. Etā ie' tö isué tö ká e' dör buaë dō ká kiè Sóar eē. Buaë di' tso' wēs ká buaë yö' Jehová tö es ena wēs Egipto es. (E' kēwö ska' tā kam Jehová tö ká kiè Sodoma ena ká kiè Gomorra, e' böt eüwa.) <sup>11</sup>Etā kakkue tso' Jordán di' kkömik e' shushaté Lot tö, etā e' wa ie' míā. Es ie'pa ñi blabatsélor. <sup>12</sup>Abram e' tséat senuk Canaán. Lot míā senuk Jordán kakkue kì, eē ká tso'tseë. Ie' sené tsinet ká kiè



Sodoma e' o'mik. <sup>13</sup>Sodoma wakpa, serke suluë. Ie'pa ì sulu è wamble-ke kekraë Jehová wöa.

<sup>14</sup>Lot mía e' ukuökì tã, Jehová tö iché Abram a: "Wé be' tso' ee ká kî saú bua'ie shkit wówí wöiá dià éka jaì éka ká wa'ñe tö ÷is idör? <sup>15</sup>Ká kos kî suébö, e' meraëyö be' a ena be' aleripa a kekraë. <sup>16</sup>Ye' tö be' aleripa alöweraë taië wes íyök po taië es. Wes íyök po kè shtarpa' es be' aleripa alördaë kè ishtarpa yi a. <sup>17</sup>Ká i' kos meraëyö be' a. E' kuekì be' yú iweblök seraq."

<sup>18</sup>Etã Abram e' yéttsã tã imía senuk kós klò wökir àr taië dör wëm kiè Mamré e' icha ee. E' ate tsinet ká kiè Hebrón ee. Eë Abram tö ák skà kataté ka'ie Jehová dalöioie.

#### Abram tö ilayök Lot, e' tsatké

**14** <sup>1</sup>E' kéwö ska' tã blu'pa tso' tkël. Eköl kiè Amrafel, e' dör ká kiè Sinar, e' blú. Iëköl kiè Arioc, e' dör ká kiè Elasar, e' blú. Iëköl skà kiè Quedorlaómer, e' dör ká kiè Elam, e' blú. Etã ibata ék kiè Tidal, e' dör ká kiè Goím, e' blú. <sup>2</sup>Blu'pa skà tso' dökã skël e' eköl kiè Bera, e' dör ká kiè Sodoma, e' blú. Iëköl kiè Birsá, e' dör ká kiè Gomorra, e' blú. Iëköl kiè Sinab, e' dör ká kiè Admá, e' blú. Skà kiè Seméber, e' dör ká kiè Seboím, e' blú. Ibata ekkë e' dör ká kiè Bela, e' blú. Ká e' kiè Sóar ñies. E' kéwö ska' tã blu'pa dökã tkël ñe' e' kéka ñippök blu'pa skà dökã skël ñe' tã. <sup>3</sup>Blu'pa skël e'pa tö ñippök wakpa dapa'wé ek tsiní ñippök blu'pa tkël e'pa tã kakkue kiè Sidim ee.

Eë dayë wölö me'r bërie kiè Mar Muerto.

<sup>4</sup>Blu'pa dökã skël e'pa bak senuk iwakpa tã dökã duas dabom eyök kî bök (12), blu' kiè Quedorlaómer, e' dikia. Mik e' kî duas de dabom eyök kî mañal (13) etã ie'pa kè éna Quedorlaómer ttè dalöiakia. Ie'pa e' kakka ñippök ie' tã. <sup>5</sup>E' kî duas de ek etã Quedorlaómer e' yéttsã mía ñippök ibolökpa tã. Blu'pa dökã mañal dör ie' klépa, e' míyal ie' tã ñippök. Ie'pa mía ká kiè Astarot Carnaim tã ee ie'pa e' aléka refaítawak kî. E' ukuökì tã ie'pa e' aléka zuzitawak kî, ká kiè Ham ee. E' ukuökì tã ie'pa e' aléka emiwak kî, e' wakpa ká kiè Savé-quiriataim. <sup>6</sup>E' ukuökì ie'pa e' aléka horeowak kî kabata kiè Seír ee. Etã itötiémi ie'pa tö dò tkörö ká kiè El-parán ee. Ká e' atë ká sir poë, e' kkömik. <sup>7</sup>Etã ee ie'pa bitene itò wane dò ká kiè En-mispat. Ká e' kiè Cadés ñies. Ie'pa e' aléka Amalec aleripa kî tã iká klö'wéwarakitö. Ñies ie'pa e' aléka amorreowak kî. E' wakpa ká kiè Hasesón-tamar. E' ukuökì tã ie'pa mi'ke ñippök blu'pa skël tã. E' kuekì blu'pa skël e' dapa'wéka Sidim kékkue kî blu'pa tkël kî nuk ñippoie.

<sup>8-9</sup>Etã Sodoma blú ena Gomorra blú ena Admá blú ena Seboím blú ena Bela blú (Bela kiè Sóar ñies), blu'pa skël ekkëpa ñi dapa'wéka Sidim kékkue kî ñippoie, Quedorlaómer, e' dör Elam blu', e' tã ena blu'pa tso' ie' tã e'pa tã ñies. Blu'pa e'pa dör Tidal, e' dör Goím blu'. Iëköl dör Amrafel, e' dör Sinar blu'. Bata ék dör Arioc, e' dör

Elasar blu'. Es blu'pa tkël míyal ñippök blu'pa skel tã. <sup>10</sup>E' kēwō ska' tã Sidim kēkkue kī kiöchka dalolo bötsböts ese dapé tso' taië. Mik Sodoma wakpa ena Gomorra wakpa tkayal ñippè yökī etã ie'pa shäböts anemi kiöchka dapé tso' taië ese a. Imalepa tkayalmi kabata shuã.

<sup>11</sup>Es blu'pa döka tkël e'pa e' aléka blu'pa skel kī. Etã ie'pa tö chkewō ena íyi bua'buatso' Sodoma ena Gomorra e' kos klö'wéwarakitō tã iponemirak. <sup>12</sup>E' kēwō ska' tã Abram alayök Lot serke Sodoma. E' mítserak iwã, es ie' dalì kos e' mítserak iwã ñies.

<sup>13</sup>Etã ñippè shuã wëm tka-shkar eköl, e' wã ibiyó mí Abram a. Abram e' dör hebreowak. Ie' serke tsinet wëm kiè Mamré dör amorreowak e' kós klò wökir àr eë. Mamré dör Escol ena Aner ël. Ie'pa wa Abram wër buaë.

<sup>14</sup>Mik Abram tö ibiyó ttsé, etã ie' kanè mésopa kune ie' u a, e'pa dapa'wéitō döka cien mañayök kī dabom eyök kī pàköl (318) ilayök tsatkoie. Etã ie'pa míyal blu'pa tkël itökī döka ká kiè Dan eë. <sup>15</sup>Etã nañewe ie'pa demi me'ie ñippémiie blu'pa tã. Etã ie'pa tö blu'pa töiëmi tkörö ká kiè Hobá eë. Hobá atë ká kiè Damasco e' wöwí. <sup>16</sup>Etã ì kos minetser blu'pa wã, e' kos yélur ie'pa tö blu'pa ulà a. Es Abram tö ilayök Lot e' tsatkée. Ñies ì tso' ilayök wã e' kos dene iulà a. Ñies alakölpa ena pë' malepa tso' klöulewã e'pa kos tsatkée ie' tö.

### Melquisedec er buaë ché Abram a

<sup>17</sup>Mik Abram e' aléka Que-dorlaómer kī, e' sù blu'pa mañal shkōke ie' tã, e'pa kī. E' ukuökī tã ie' bitene de Savé kēkkue kī. Kakkue e' kiè ñies Blu' Kēkkue. Etã eë Sodoma blú de ie' ñaletsuk ie' shke'uk. <sup>18</sup>Ñies ká kiè Salem, e' blú kiè Melquisedec, e' dör Skëköl dör íyi ulitane tsata e' sacerdote. Ie' tö pan ena vino yéttsã. <sup>19</sup>Etã ie' er buaë ché Abram a ttè i' wa:

“Skëköl dör íyi ulitane tsata, e' tö ká jaì ena ká i' yö'.

Ie' tö be' kímè as be' kawö tkò buaë kekraë.

<sup>20</sup>Ie' dör íyi ulitane tsata, e' kīkōkasö.

Ie' tö be' kímé e' alökka be' bolökpa kī, e' kuëkī ikīkōkasö.”

Etã íyi kos de Abram ulà a ñippè shuã, e' mú blatèsö döka dabop tã e' tsá eyök yéttsaitō méitō Melquisedec a Skëköl dalöioie. <sup>21</sup>E' ukuökī tã Sodoma blu' tö iché Abram a:

—Sa' yamipa tsatkée be' tö, e'pa múne ye' a. Erë dalì kos e' tsúmi be' tö be' a.

<sup>22</sup>Erë Abram tö iüté:

—Au. Jehová dör Skëköl íyi ulitane tsata, e' tö ká jaì ena ká i' yö', ie' a ye' kablétke <sup>23</sup>tö ì kos dör be' icha, e' kè tsepaatyö yës. Dò be' datsi'takla ö be' klökkuö kicha kè tsepaatyö etkla wë'ia as kè be' ichò tö be' íyi wa ye' blune. <sup>24</sup>Kè ì kiane ye' kī ye' wák a. Chkò kos ñétke ye' kanè mésopa tö, e'

è dör wë' ye' a. Erë wépa dare ye' ta ñippök bulu'pa ta kiè Aner ena Escol ena Mamré, as ie'pa wä dali kakmi' kos ikawötä tsukmi eköl eköl ekkë.

Jehová tö ittè mé Abram a

**15** <sup>1</sup>E' ukuöki ta Jehová tté Abram ta kabsueie, etä ichéitö ia:

—A Abram, kè be' suanuk. Ye' dör be' tsatkökwak. Íyi buaë merayö be' a tajë shütë.

<sup>2-3</sup>Erë Abram tö iiuté:

—A Skëköl, ye' wák alà kè ta', e' kueki ì kos memibö ye' a e' kè dör ìie bua' ye' a. Ye' íyi kos atdaë ye' kanè méso kiè Eliézer dör Damasco wak e' ulà a. Erë ie' dör o'ka.

<sup>4</sup>Etä Jehová tö iiuté:

—Be' wák alà kurdaë, e' kè dör o'ka.

<sup>5</sup>Etä Jehová wä Abram mítser u'rki, ta ichéitö ia:

—Ká saú buaë siwa' ki. Bëkwö saú ta ishta'ú. ¿Be' a ishtarmi? E'ma bua', es be' aleripa alördaë tajë.

<sup>6</sup>Etä Abram erblé Jehová mik, e' kueki ikl'wéitö wes pë' buaë yësyësë es.

<sup>7</sup>Etä ichéitö ia:

—Ye' dör Jehová. Ye' tö be' yë'ttsa caldeawak ká kiè Ur e' a ká i' moie be' a ena be' aleripa kos a.

<sup>8</sup>Etä Abram ie' a ichaké:

—A Skëköl, ¿wes e' jchermi ye' wä yësyësë tö ká i' dõmi ye' ulà a?

<sup>9</sup>Jehová tö iiuté:

—Baka ena chibo ena obeja e' kos ki duas tso' mañal, ese tsúbitu

ña etö etö. Ñies nuböl et ena ipupu-la et, e' tsúbitu ña.

<sup>10</sup>Etä Abram wä iyiwak kos ekkë debitu Jehová a. Etä ie' tö iyiwak e' ttélur télor shushaë. Shaböts méwaitö wí wa shaböts méwaitö i' wa. Es iate ñi wöshaë. Erë dù kè ténane ie' wä es. <sup>11</sup>Etä öló dettsa iyiwak chkà dalërmik, erë Abram tö ibukueke chkè ki. <sup>12</sup>Ká tuinemitke, etä Abram kapowä tajë. E' bet Abram pamik ká mía ttsettseë shütë se' suawë ekkë.

<sup>13</sup>Etä Jehová tö iché ia:

—Be' wä ijchenú buaë tö be' aleripa serdaë ká kua'ki ki wes ká kua'ki wakpa es. Eë ie'pa klördawä kanè mésopaie kè patueta'. Ie'pa weirdaë dökä duas cien tkëyök (400), ekkë ulatök. <sup>14</sup>Erë ká wé wakpa tö ie'pa we'ikera, e' wakpa ské we'ikerayö siarë. E' ukuöki ta be' aleripa yërdattsä ká e' a. Ie'pa wä iyi bua'bu tuë darë-rëë ese miraë tajë iwákpa a. <sup>15</sup>Etä mik be' kënewä etä be' duöwami buaë, kè weir ta'. Es be' michoë be' deütöpa itökí. <sup>16</sup>Etä mik be' aleripa tso' ká kua'ki ñe' a e'pa de dökä tkëtökicha, etä ie'pa dörane ká i' ki. Ká i' wakpa, kiè amorreowak, kam e'pa tö ì sulu wamblò dò wë' ishuloie. E' kueki be' aleripa kè döpane ká i' ki bet.

<sup>17</sup>Katuine de kamië, etä ì dettsa tabechka ukuöie, e' shüa shkle batröke tajë. Ñies kuatak sí wöñarke tajë ese dettsa ta itkami iyiwak chkà blatëule tkëter eë, e' shusha. <sup>18</sup>Etä Jehová tö tté mé Abram a i' es: —Ká i' meraëyö be' aleripa a. Di' kiè Egipto dí\* eemi dökä di'

\* 15.18 Egipto dí: E' kè dör di' bérie tso' Egipto kiè Nilo e'. E' dör di' tsitsirla tso' Egipto ena Canaán e' shusha.

kibi kiè Éufrates, ká ekkè kòs meraëyö be' aleripa a. <sup>19</sup>Iñe ta ká e' dör quenitawak, quenizitawak, cadmoneowak, <sup>20</sup>hititawak, fere-seowak, refaitawak, <sup>21</sup>amorreowak, canaánwak, gergeseowak ena jebu-seowak e'pa kòs wakpa ká.

### Abram alà kune kiè Ismael

**16** <sup>1</sup>Abram alaköl Sarai, e' kè döta' alàè. Ie' wá alaköl tkër eköl kanè mésoie kiè Agar. E' dör egiptowak. <sup>2</sup>Etá Sarai tö iché Abram a:

—Isáú tö Jehová kè wá ye' a alà mène. E' kueki be' senú ye' kanè méso Agar ta. Etá isalema ie' batamik alà dòmi ye' ulà a.

Etá Abram tö Sarai ttò iuté. <sup>3</sup>Etá Sarai tö egiptowak tso' ie' wá kanè mésoie, e' tsébitu, mé iwëm a alakölie. E' kéwö ska' ta ie'pa sené Canaán e' ki duas de dabop. <sup>4</sup>Etá Abram senéwá Agar ta, etá Agar duneka. Mik ie' isué tö ie' duneka, etá ie' tö iwökir Sarai suémi suluë. <sup>5</sup>Etá Sarai tö iché Abram a:

—iBe' iane iwiie tö Agar tö ye' sueke suluë! Ye' wák tö be' a Agar me' alakölie i' ta idurtke e' wá kurdaë, etá ie' e' ttsöke jaishet ye' tsata. iAs Jehová tö se' a ichò tö ye' iane iwiie, ye' ö be'!

<sup>6</sup>Etá Abram tö iuté:

—Ye' ttò ttsó, be' kanè méso tso' be' ulà a. Be' iú wes be' éna iwak es.

E' ukuökj ta Sarai tö ikanè méso we'ikémi taië. E' kueki Agar tkashkar. <sup>7</sup>Etá Jehová biyöchökwak

bua'ie, e' tö ikué di' tum o'mik ká wé kè ye' ku' ese ska'. Di' tum e' tso' ñala micho ká kiè Sur e' kkömik.

<sup>8</sup>Etá Jehová biyöchökwak bua'ie tö ie' a ichaké:

—A Agar, Sarai kanè méso, ¿Wé be' bite? ¿Wé be' micho?

Ie' iüté:

—Ye' tkashkar ye' wökir Sarai yöki.

<sup>9</sup>Etá ie' iché ia:

—Be' dakóne be' wökir ska' ta idalöió bèrè.

<sup>10</sup>Ie' tö ikí ché ia:

“Ye' be' aleripa alöweraë taië.

Kè ye' a ishtanuk ekkè.

<sup>11</sup>Be' eriarke, e' ttsé Jehová tö, e' kueki se' be' dur, e' wá kune, ta ikiè múkabö Ismael.\*

<sup>12</sup>Be' alà döraë wes burro pupula kè urutërta' es.

Ie' ñippöraë darërè sulitane ta. Nies sulitane ñippöraë ie' ta.”

Ie' serdaë kekraë ñippök iëlpa ta.

<sup>13</sup>Jehová tté Agar ta, e' ukuökj ta Agar tö iché: “Skököl ye' sué, e' wák suéwayö.” E' kueki ie' tö Skököl kié i' es: “Skököl tö ye' sué e'.” <sup>14</sup>E' kueki nies di' tum e' kiè mékaitö: “Skököl tso' e' ye' sueke”. Di' tum e' tso' Cadés ena Béred e' shushaë.

<sup>15</sup>E' ukuökj ta Abram alà kéka Agar ta e' wá kune wák wëm. Abram tö ikiè méka Ismael. <sup>16</sup>Ismael kune, e' kéwö ska' ta Abram ki duas tso' dabom paryök kí teröl (86).

\* 16.11 Ismael: Hebreoie s'kiè e' wá kiane chè Skököl tö ittsé.

**Jehová tò ittè mé Abraham  
a, e' wà kkacho méatitò**

**17** <sup>1</sup>Mik Abram k<sub>i</sub> duas tso' dabom suliyök k<sub>i</sub> sulitu (99), etä Jehová e' kkaché ie' a ta iché ia:

—Ye' dör Skëköl Diché Ta' İyi Uli-tane Tsata e'. Be' senú yësyësë ye' wörk<sub>i</sub> kekraë, <sup>2</sup>e' ta ye' ttè meraë be' a tò be' aleripa alördaë taië be' itöki.

<sup>3</sup>Etä ie' e' téwä iski iwötsa méwä iyök ki. E' dalewa Skëköl tso' ttök ie' ta, ta ichéitö ia:

<sup>4</sup>—Ye' ttè meke be' a e' dör i' es: Be' döraë ká taië wakpa yéie. <sup>5</sup>E' kuëki i'ñe ta be' kè kiëia Abram. Ye' tò be' tkéka ká taië wakpa yéie, e' kuëki be' kiè mékayö Abraham.\* <sup>6</sup>Ye' tò be' aleripa alöweraë taië. Ie'pa döraë blu'paie ena ká taië wakpaie. <sup>7</sup>Kekraë ye' dör be' Këköl ñies be' aleripa Këköl. Kawö e' mekeyö be' a. <sup>8</sup>I'ñe ta be' serke Canaán, ká e' kos meraëyö be' a ena be' aleripa a. E' atë ie'pa ulà a kekraë. Ye' dör ie'pa Këköl.

<sup>9</sup>Skëköl tò iskà chéne Abraham a:

—Erë be' ena be' aleripa kos e' kawöta ttè muk ye' a ñies. <sup>10</sup>E' dör i' es: A' wëpa kos kawöta itöttola kkuölitla tök tsir. <sup>11</sup>E' kuëki a' wëpa kos e' wakyó es. E' tò ikkacheraë tò se' ttè me' ñi a. <sup>12</sup>Kekraë kos a' ala'r kurke

wëpa, ñies a' kanè mésopa ala'r wëpa, mik e' k<sub>i</sub> ká de pàköl, etä a' kawöta iwakyuök es. <sup>13</sup>A' kawöta iük kröröë ala'r kos kurke a' u a ekkëpa ta. Es ttè me'tkeyö a' a, e' atë wakyöule a' chkà k<sub>i</sub> kekraë. <sup>14</sup>Wëm kè wakyöule, ese kè wä ye' ttò dalöiëne, e' kuëki kè ikawö ta'ia senuk a' shua.

<sup>15</sup>Ñies Skëköl tò iché Abraham a:  
—Be' alaköl kè kiëia Sarai. I'ñe ta ikirdaë Sara.\* <sup>16</sup>Ye' er buaë chöraë ie' a as ie' alà kòka be' a. Mok<sub>i</sub> ye' er buaë chöraë ie' a. Ie' döraë ká taië wakpa mïe. Ñies ie' aleripa shu döraë blu'paie.

<sup>17</sup>Abraham skà e' téwane iski iwötsa méwaitö iyök ki. E' dalewa ijañéka ta ibikeitséitö: “¿Ye' k<sub>i</sub> duas tso' cien eyök (100), wes e' dòmi yéie? ¿Sara k<sub>i</sub> duas tso' dabom suliyök (90), etä wes ie' dòmi alà?”

<sup>18</sup>Erë ie' tò iché Skëköl a:

—iBe' mú er buaë chò Ismael a!

<sup>19</sup>Erë Skëköl tò iiuté:

—Au, e' kè dör es. Be' alaköl Sara, e' döraë alàë ta ikië múkabö Isaac. Ttè me'yö be' a e' è meraneyö ie' a ena ie' aleripa a kekraë. <sup>20</sup>Kè ye' éna Ismael chë'wa. Ye' tò ie' kimeräë ñies. Ye' tò ie' ala'r alöweraë taië as ileripa dö taië ká i' k<sub>i</sub>. Ismael döraë s'blu'pa dökä dabom eyök k<sub>i</sub> böl e'pa yéie. Ie' aleripa alördaë taië. <sup>21</sup>Erë ttè me'tkeyö be' a e' atdaë be' alà kurdaë kiè Isaac e' a. Be' alà e' kera-ka Sara tò duas iëk wa kawö ikkë ta.

\* 17.5 Abraham: Hebreoie s'kië e' wà kiane chë ká wakpa taië, e' yé.

\* 17.15 Sarai: Erë s'kië e' ena Sara ttsër bërë kuä'ki, erë iwà dör ñies. Iwà kiane chë blu' alà busi ö alaköl dalöiërta' taië ese. Skëköl tò ie' kiè mane'wé es iwà kkachöie tò ttè mène Abraham a e' wà döraë ie' k<sub>i</sub> ñies.

<sup>22</sup>Mik Skéköl tté one Abraham ta, ta imía. <sup>23</sup>E' wöshaë Abraham tö ilà Ismael e' tottola kkuölitla téé tsir. Nies ie' wa kanè mésopa tso' kune ie' u a ena wëpa toule ese, e'pa kos tottola kkuölitla tééitö tsir wes Skéköl tö iyë'ia es. <sup>24-25</sup>Mik Abraham ki duas tso' dabom suliyök ki sulitu (99) ena ilà ki itso' dabom eyök ki mañal (13) etä ie'pa tottola kkuölitla tëne tsir.

<sup>26-27</sup>Es e' diwö è wa Abraham ena ilà tottola kkuölitla tëne tsir. Nies wëpa dör ie' kanè mésopa, e'pa kos tottola kkuölitla tëne tsir.

### Jehová tö iché Abraham a tö alà meraëyö be' a

**18** <sup>1</sup>Ká et dibata a ta Abraham tkër ie' ukkö a. Ie' u tso' wé wëm kiè Mamré e' kós klò wökir àr ee. Ie' tkër ee etä Jehová e' kkaché ie' a. <sup>2</sup>E' wà pakè i' es: Abraham wökéka ta ie' isué tö wëpa de iëter ie' wörki mañal. E' sué ie' tö ta bet ie' e' kéka, mía ie'pa ñaletsuk ta ie' e' téwa iski ta iwötsa méwa iyök ki ie'pa shké'woie. <sup>3</sup>Ie' tö iché:

—A kékëpa, be' we'ikèyö, kè be' minuk bet. <sup>4</sup>Ye' mi' di' tsuk a' klò skuoie, e' ukuökí ta a' enú bèrè kal i' dikia. <sup>5</sup>A' detke ye' ska', etä ilè mekeyö a' a ñè as a' diché iërne shkoie.

Etä ie'pa tö ie' iüté:

—E'ma iú wes be' tö iché es.

<sup>6</sup>Abraham tkawa iu a, ta ichéitö Sara a:

—Bet, harina bua'buá yuló kilo döká dabom böyök (20) ekkè, e' wa pan yuó.

<sup>7</sup>E' ukuökí ta bet ie' wák tunemi baka pupula shushtök wé bua'buá

ese klò'wéwaitö. E' mítser ie' wa méitö ikanè méso eköl a. Bet ta ikanè méso tö ikanewé ie' a katè. <sup>8</sup>Abraham tö baka chkà ena baka tsu'diö wösi ena baka tsu'diö pa'ali e' mé ie'pa a. Ie'pa tulur chkök kal àr ukkö a e' dikia. E' dalewa Abraham dur ie'pa tiök ee.

<sup>9</sup>E' dalewa ie'pa tö ichaké Abraham a:

—¿Wé be' alaköl kiè Sara e'?

Ie' iüté:

—Ie' tkër weshké.

<sup>10</sup>Etä ie'pa eköl tö iché ia:

—Duas iëk e' wa ye' döne be' pakök. E' kéwö ta be' alaköl Sara alà ta'tke.

E' dalewa Sara tkër Abraham tsikka u wékkö a. Ie' tso' ie'pa ttöke, e' ttsök. <sup>11</sup>Abraham ena ilaköl, e' dewatke kékëpala. Bànet Sara kè tö alakölpa duè sueta'ia. <sup>12</sup>E' kuëki Sara kè a jañè wöklönuk ta ibikeitsé: “¿Wes ye' tö ttè i' klò'wèmi tö sa' kërulunetke e' dõmi alàè?” <sup>13</sup>Jehová tö iché Abraham a:

—¿I kuëki Sara jañéka? ¿I kuëki ie' tö iché: “¿Wes ye' kënewatke e' dõmi alàè?” <sup>14</sup>Kè ì ta ye' a darërè. Duas iëk ye' döne, etä ie' alà ta'tke.

<sup>15</sup>Sara suane e' kuëki ichéitö: “Kè ye' jañine!”

Erè Jehová tö iché ia:

—E' kè dör es. Mokí be' jañéka.

### Abraham kköché Jehová a Sodoma wakpa tsatkò

<sup>16</sup>E' ukuökí ta ipakökwakpa e' duékarak ta imíyal dò wé Sodoma kí wëne ee. Abraham tö inalé mére e' choat ie'pa a. <sup>17-19</sup>Etä Jehová tö

ibikeitsé: “Abraham aleripa alördaë tajë diché tã' tajë. Ye' tō iyë'at ie' a tō ie' batamik ye' er buaë chōraë ká ulitane wakpa a. Ye' tō ie' shukit as ie' tō ila'r ena ileripa a ichō tō ye' ttè dalöió ñies tō ì kōs buaë yësyësë e' ú. Es ì kōs yë'yō ie' a e' weraëyō. E' kuëki ye' kawōta ichōkiã tō iók ye' mí Sodoma.” <sup>20</sup>E' kuëki ie' tō iché Abraham a:

—Sodoma wakpa ena Gomorra wakpa e' wamblökerak suluë tajë shutë, e' ché sulitane tō. <sup>21</sup>E' kuëki ye' mía ee isauk tō yëne ie'pa e' wamblöke suluë ichók wës ye' a ikkatëne es.

<sup>22</sup>Etã Abraham pakökwakpa böl e' yéttsã mía Sodoma. Erë Abraham atë dur Jehová tã. <sup>23</sup>Ie' e' skéwã tsinet Jehová ska' tã ichakéi-tō iã:

—¿S'ser mokië esepa ewëwamibö se' sulusipa tã? <sup>24</sup>Isalema s'ser mokië esepa tso' Sodoma dōkã dabom skeyök (50), etã íká e' wakpa ewëwamibö sërãã? ¿Kè be' tō ilo'yepa ie'pa kî s'ser mokië tso' dōkã dabom skeyök (50), e'pa kuëki? <sup>25</sup>iMokî be' kè tō s'ser yësyësë esepa ewëpawa se' sulusipa tã ñitã! Kè bö iwamlepa es. iE' kè wamblërpa! Be' dör sulitane shulökwak e' kuëki ¿wës e' kè tō se' shulepa yësyësë?

<sup>26</sup>Jehová tō iiüté:

—S'ser mokië esepa kuëyō dōkã dabom skeyök (50) e' tã e'pa dalërmik kè ye' tō imalepa ewëpawa.

<sup>27</sup>Etã Abraham tō iskã chéne iã:

—Be' dör Skököl. Tã ye' dör wës ká po ena muluchka es be' wōã. E' tō be' chakè tajë kè suane. Isalema

s'ser mokië esepa kianeia skel (5) as idökã dabom skeyök (50). <sup>28</sup>Skel e' kianeia, e' tã e'pa è kuëki íká e' wakpa ewëwamibö?

Jehová tō iiüté:

—S'ser mokië esepa kuëyō dōkã dabom tkëyök kî skel (45), e' tã kè ye' tō ká e' wakpa ewëpawa.

<sup>29</sup>Abraham tō iskã chaké:

—Dö' dabom tkëyök (40) è tso', e' tã ¿be' tō ká e' wakpa ewëwami?

Jehová iiüté:

—Au, kè yō ká e' wakpa ewëpawa dabom tkëyök (40) e' dalërmik.

<sup>30</sup>Etã Abraham tō ikî ché iã:

—Tajë be' tsiriwëyō, e' kuëki kè be' ulunuk ye' kî. Dö' s'ser yësyësë tso'ia dabom mañayök (30) è.

Jehová tō iiüténe:

—Au, dabom mañayök (30), e'pa dalërmik kè yō iewëpawa.

<sup>31</sup>Abraham tō ikî chaké ème:

—A ye' Këköl, tajë yō be' dalösewëwã be' chakök i' es, erë ká kî s'ser mokië tso' dabom böyök (20) è, e' tã e'pa kuëki, íká e' wakpa ewëwamibö?

Jehová tō iiüté:

—Au, ie'pa dabom böyök (20), e' è dalërmik kè ye' tō ká e' wakpa ewëpawa.

<sup>32</sup>Abraham tō ikî chaké tã ichéi-tō iã:

—Kè be' ulunuk ye' kî. I' è chakekeyō be' a. S'ser mokië esepa tso' dōkã dabom eyök (10) è, e' tã ¿wës bö iwëmi? íká e' wakpa ewëwamibö?

Jehová tō iiüté:

—Dabom eyök è dalërmik kè ye' tō ká e' wakpa ewëpawa.

<sup>33</sup>Mik ie'pa tté òne ñita etá Jehová míane. Abraham biteane ie' u a.

**Skëköl tó Sodoma ena  
Gomorra wakpa ewéwa**

**19** <sup>1</sup>Ká tuinemitke tá Skëköl biyöchökwakpa bül e'pa demi ká kiè Sodoma eë. Abraham alayök kiè Lot, e' tkër ká e' kköiëulewá e' wékkö a. \* Mik ie' tó Skëköl biyöchökwakpa sué, etá ie' e' kéká ie'pa shké'uk. Ie' e' téwá iski iwötsá méwaitö íyök kî. <sup>2</sup>Ie' tó iché ie'pa a:  
—A kéképa, ye' kköchò a' a tó a' kapórö ye' ska'. Eë a' klò skuòmi etá bule bla'mi a' mi'mine.

Ie'pa iiuté:

—Au. Kè be' tkinuk. Sa' kapömi u'rkî.

<sup>3</sup>Erë Lot kköché taië ie'pa a. Bata ekké tá ie'pa míyal ie' u a. Mik ie'pa dewá weshké, etá ie' tó ie'pa a chkè yulé buaë. Pan kè wötuule iwölöwoka wa ese yuëitö ie'pa a. Ie'pa chké.

<sup>4</sup>Kam ie'pa kapölor e' yöki Sodoma wakpa wëpa debitu taië. E'pa tó

Lot u kköiëwá shkit. Ie'pa ulitane, duladulapa dò kéképaë, e'pa kulémi Lot wöa. <sup>5</sup>Ie'pa tó ichaké aneule:

—I'ñe wëpa bül debitu be' u a ówé e'pa? Ie'pa yölur íe sa' a u'rkî as sa' serká ie'pa tá kësik wa!


<sup>6</sup>Lot e' yéttsá ttök ie'pa tá. Ukkö wötéwaitö buaë itsikka. <sup>7</sup>Ie' tó ie'pa a iché:

—A yamipa, ye' kköchò a' a tó ì sulu e' kè wamblar ie'pa tá. <sup>8</sup>Ye' alà busipa tulur bül kam ser wëpa tá, e'pa yekeluryö a' a as a' tó iwamblò ie'pa tá wes a' kî ikiane es. Erë kè ì wamblar sulu ye' pakök-wakpa dewá ye' ska', e'pa tá.

<sup>9</sup>Erë ie'pa iiuté:

—iBe' e' skóu bänet! Be' kè dör ká i' wak. Be' kè a ì yënuke sa' a. iE' kuëki be' we'ikeraë sa' tó ie'pa se tsatá!

E' ukuökî tá iwe'ikémi ie'pa tó tá idemirak u wékkö batsökök. <sup>10</sup>Etá Lot pakök-wakpa ulà tiéwá u'rkî ukkö a Lot tséwá weshké. Etá ie'pa tó ukkö wötéwá. <sup>11</sup>Pë' sulu-



*I' dör ká kköiëule ese wékkö. (Génesis 19.1)*

\* 19.1 ká e' kköiëulewá e' wékkö a: E' kéwö ská tá ká ulitane dör kköiëule ese ké wékkö tso'.



si kōs wōbla sulu'wélur ie'pa tö, kè wawēneiā. Duladulapa dō kēkēpaē e'pa kōs wōbla sulurulune. E' kuēki ie'pa shtrinewā ukkō yulök. Kè ie'pa wā ikūne. <sup>12-13</sup>Lot pakökwakpa tö iché ia:

—Tajē kā i' wakpa kkatēne e' tté demi Jehová wō kī. E' kuēki sa' patkéitō ie'pa eukwa. Ie'pa ewekewa sa' tö yēs. E' kuēki be' yamipa ekka kī tso' kā i' kī, e' tā e'pa yólur. Be' alà duladulapa tā' ö be' alà busipa tā' ö be' nuakipa tā', ö be' yamipa skà tso' kā i' kī, e' tā iyólur bet tsúmi kamiē!

<sup>14</sup>Etā Lot mīā wēpa ttè meule senukwā ila'r busipa tā e'pa weblök tā iché iarak:

—iA' e' kōkā! iA' yúshka! Jehová tö kā i' ewekewa.

Erē ie'pa tö ibikeitsé tö ie' kalöke ie'pa tā. <sup>15</sup>Kā ñirketke, e' ulatök tā Skököl biyöchökwakpa tö iché Lot ā:

—Sa' tö kā i' ewekewa. Kè be' duakwa, e' tā ibet, be' e' kōkā! iBe' alaköl ena be' ala'r busipa tsúmi!

<sup>16</sup>Erē ie' e' ukeiā enaē. Erē Jehová er buaē ché ie' ā, e' kuēki Skököl biyöchökwakpa tö iklö'wēwā iulà ā yēttsā. E' sū ñies ilaköl ena ilà busipa yélur ie'pa tö Sodoma ā itsatkoie. <sup>17</sup>Mik ie'pa tö iyēttsarak bānet etā Skököl biyöchökwakpa tö iché ie'pa ā:

—iA' tunú as a' tsatkēr! iKè a' kā i' saukīā tsikkane yēs! iE' sū kè a' e' wöklö'uk kakkue i' kī! iA' éna e' tsatkak, e' tā a' yúshka etkēme kabata ā!

<sup>18</sup>Erē Lot tö iché ia:

—iA kēkēpa, au, a' we'ikèyö! <sup>19</sup>A' tö ye' kímé tajē. A' tö ye' tsatké duōwā ulà ā, erē kè ye' shkak kabata ā. Ye' ibikeitsè tö ì sulu datse kā i' eukwa, e' tö ye' kuēmi ñalā kī etā ye' duōwami. <sup>20</sup>Kā tsi-tsir tso' iē tsinet, eē ye' tkòshkarmi. Kawō mú ña shkowā eē e' tsatkoie. Mokī e' dör kā tsir.

<sup>21</sup>Etā ie'pa eköl tö iiüté:

—Ye' be' ttò ttsé, e' kuēki yö iweke wes be' tö ye' ā ikié es. Kā chébö ye' ā e' kè eweku'wayö. <sup>22</sup>Erē be' yú etkēme eē. Kè ye' ā ì wamblēnuk kam be' dōmi e' dalewa.

E' kuēki kā e' kiè Sóar. \*

<sup>23</sup>Mik kā ñine etā Lot demi Sóar. <sup>24</sup>Etā azufre wōñarke bö'ie e' patkébitū Jehová tö tajē Sodoma ena Gomorra kī. <sup>25</sup>Kā e' wakpa ewéwa bö' tö yēs. Nies dalikua kōs tskirke kā e' kī e' ñanewā sēraā. <sup>26</sup>Erē Lot alaköl dami itökī. E' tö kā sué itsikka. Bet ie' yönane dayē wōsiie shkē'ka.

<sup>27</sup>Bule es bla'mi tā Abraham mīane wé ikapaké Jehová tā eē. <sup>28</sup>Sodoma ena Gomorra kī suéitō tā ishklé batröke tajē wes tē blublu ña'wēsö es. <sup>29</sup>Es Skököl tö kā e' wakpa ewéwa. Erē ì ki' Abraham tö ie' ā, e' ska' ie' er de, e' kuēki ie' tö Lot tsatkée.

**Lot alà busipa alà kēkā ie' tā**

<sup>30</sup>Sodoma ena Gomorra ewéwa Skököl tö, e' ukuökī tā Lot suane senukīā Sóar. E' kuēki imīā senuk

\* 19.22 Sóar: Hebreoie kā kiè e' wà kiane chè kā tsir.

kabata a ila'r busipa bøl ta. Ee ie'pa mañal sené ákuk a.

<sup>31</sup>Ká et ta ilà busi kibi tò iché itsirla a:

—Se' yé kënewatke eta kè wé wëpa ta' senuk se' ta wes alakölpá malepa wëpa ta' es. <sup>32</sup>E' kuëkî se' yé ttökasö blo' wa eta se' ser ie' ta, eta es se' ulà a alà dõmi.

<sup>33</sup>E' nañewe ta ie'pa tò iyé ttéka blo' wa tajë, eta ilà busi kibi ék sené ie' ta. Erë ie' tteke blo' tò tajë, e' kuëkî kè ie' éna ì aneia. <sup>34</sup>Bule es ta ilà busi kibi tò iché itsirla a:

—Bö ittsó, ye' sené se' yé ta. I'ñe nañewe iskà ttökasö blo' wa. Eta be' senú ie' ta. Eta es se' bøl ulà a alà dõmi.

<sup>35</sup>E' nañewe ta ie'pa tò iyé skà ttéka blo' wa. Eta ilà busi tsirla sené ie' ta. Erë ie' tteke blo' tò tajë, e' kuëkî kè ie' éna ì aneia. <sup>36</sup>Es ilà busipa bøl e' bukluwéka iyé wa. <sup>37</sup>Eta ikibi ék alà kune kiè mékaitö Moab. I'ñe ta Moab aleripa datse e' batamik. <sup>38</sup>Ñies itsirla de alàë, kiè mékaitö Ben-amí. I'ñe ta amonwak datse e' batamik.

#### Abraham ena Abimélec

**20** <sup>1</sup>Abraham e' yéttsa Mamré a, mía tkörö ká kiè Néguéb ee. Eta ie' e' tséat senuk ká kiè Guerar ee. Guerar atë Cadés ena Sur e' shushaë. <sup>2</sup>Ie' tò ká e' wakpa a iché tò Sara dör ie' kutà. Ká e' blú kiè Abimélec, e' tò Sara tsuk patké alakölie e' a. <sup>3</sup>Erë nañewe ta ie' kapowa e' dalewa, Skëköl tté ie' ta kabsuè a ta iché ia:

—Alaköl tsuk patkébö e' wëm ta', e' kuëkî be' duöwami.

<sup>4</sup>Erë kam ie' ser Abraham alaköl ta, e' kuëkî ie' iüté:

—A këkëpa, ye' kè kî e' nuí ku' ÷wes e' ttëwamibö? <sup>5</sup>E'ma Abraham wák tò ye' a iché tò alaköl e' dör ie' kutà. Ñies ilaköl tò ye' a iché tò Abraham dör ie' akë. E' kuëkî ye' tò ì kos wé er bua' wa. Kè ye' wa iwamblëne er sulu wa.

<sup>6</sup>Skëköl tò iskà iüténe kabsuè a ta ichéitö ia:

—Ye' éna iane buaë tò be' tò iwé er bua' wa. E' kuëkî kè ye' wa be' kàne ie' kökwa as be' kè tò ì sulu wamblò ye' kî. <sup>7</sup>Abraham dör ye' tteköl, e' kuëkî bet be' yú ilaköl mukne ia. Ie' tò ye' a ikieraë as be' seria ttsë'ka. Erë be' kè dë'ne imukne, e' ta be' ena be' yamipa kos duöralur.

<sup>8</sup>Bule es bla'mi ta Abimélec shkëne ikanè mésopa kiéitö ta ì suéitö kabsuè a e' kos pakéitö ie'pa a. Mik e' ttsé ie'pa tò eta tajë ie'pa suanéka iyökî.

<sup>9</sup>Eta Abimélec tò Abraham kié ta iché ia:

—¿Iók be' tò iwamblé sa' ta es? Be' kuëkî Skëköl tò sa' pauñé ewëwa, erë Skëköl tò sa' pauñé es, eta ¿ì sulu wambléyö be' ta? Ýyi ese kè kawö ta' wamblënuke. <sup>10</sup>Be' tò ì sulu wamblé ye' ta, eta ¿ì dör iwà?

<sup>11</sup>Abraham tò iüté:

—Ye' tò ibikeitsé tò ká i' kî kè yi tò Skëköl dalöieta'. Ye' suane dö' a' ye' ttëwa ye' alaköl yottsá ye' ulà a. <sup>12</sup>Erë iyëne tò ie' dör ye' kutà. Ie' yé dör ye' yé, erë ie' mì kè dör ye' mì. Ñies ie' dör ye' tayë. <sup>13</sup>Mik Skëköl tò ye' a iyé' tò be' e' yótttsá be' yé ká a, eta yö iché ye' alaköl a: “Ká

wa'ñe wé se' demi, eta' ichó tö ye' dör be' akë.”

<sup>14</sup>Eta' Abimélec tö Sara méne iwëm Abraham a. Ñies iyiwak kakméitö Abraham a obeja ena baka. Ñies kanè mésopa kakméitö ie' a wëpa ena alakölpa. <sup>15</sup>Eta' ie' iché Abraham a:

—Ye' ká saú sërää wé wa be' wöbatse e' kî be' yú senuk.

<sup>16</sup>Eta' Sara a ichéitö:

—Ye' tö inuköl wömule kakmé be' akë a döka mil ekkë. E' dör ì sulu wambléyö be' ta' be' wakpa ulitane wöa e' patuoie. Es be' kè jaëneia.

<sup>17</sup>Eta' Abraham tö Skëköl a ikié tö Abimélec ena ilaköl duöke, e' bua'üne. Eta' Skëköl tö ie'pa bua'wéne. <sup>18</sup>Alakölpa kos tso' Abimélec u a, e'pa shü mo'wä Jehová tö as kè idöiarak aläe Sara kuëki. Ie'pa kos shü wötséene Jehová tö.

### Sara alà kéka Abraham a

**21** <sup>1</sup>Ï ye' Jehová tö Sara a tö be' alà köraqa, e' wä tka wes iyëne bak es. <sup>2</sup>Eré Sara ena iwëm dör këkëpalatke, erë ie' duneka e' wä kune. Alà e' kune mik Skëköl tö ikéwö ye' ie' a eta'. <sup>3</sup>Sara alà kune wëm e' kiè méka Abraham tö Isaac. <sup>4</sup>Mik Isaac kî ká de päköl, eta' Abraham tö itóttola kkuölitla téé tsir wes Skëköl tö ie' a iyë' es. <sup>5</sup>E' kéwö ska' ta' Abraham kî duas tso' cien eyök (100). <sup>6</sup>Eta' Sara tö ibikeitsé: “Skëköl tö ye' jañawéka. Mik sulitane wä ijchenewa tö ye' de aläe eta' taië ie'pa jañumi ye' ta'. <sup>7</sup>Kam ye' alà köka eta' kè yi a iyënuke tö ye' dõmi aläe. Erë i' ta' ye' alà kéka Abraham a, ie' kënewatke eta'.”

### Agar ena Ismael uyéttsa bánet

<sup>8</sup>Eta' Abraham alà Isaac de bërie ta' itsu'batsée e' kéwö tk'wé Abraham tö taië. <sup>9</sup>Eta' Sara tö isué tö Abraham alà kune egiptowak kiè Agar e' ta' kiè Ismael, e' tö Isaac wayueke suluë. <sup>10</sup>E' kuëki Sara mía ichök Abraham a: “Ï kos tso' be' wä mè se' alà Isaac a, e' kè kawö ta' blatè se' kanè méso e' alà a. E' kuëki iyuóshkar aläe.”

<sup>11</sup>Ismael dör Abraham alà ñies e' kuëki ì ché Sara tö e' tö ie' eriauwé taië. <sup>12</sup>Erë Skëköl tö iché ia: “Be' aleripa chökke e'pa döraë Isaac wa. E' kuëki kè be' tkinuk be' alà kibi ék kî ena imì kî. Ï kos ché Sara tö e' ú. <sup>13</sup>Be' alà kune a' kanè méso ta, ñies e' aleripa alöwëraëyö taië, ie' dör be' alà e' kuëki.”

<sup>14</sup>Eta' bule es bla'mi ta' Abraham tö Agar a chkè mé. Ñies di' méitö ia iyiwak kkuölit yöule di' tsoie ese a. E' tiéka ie' tö sërää itsi kî ta' iyuéshkar ilà Ismael e' ta'. Agar mía shkëmi éanas wé kè yi serku' ese ska' ká kiè Beerseba e' éka. <sup>15</sup>Mik idi' enewa, eta' ilà tkéseritö kal dikia. <sup>16</sup>Ie' kè kî ilà kiane suë duökwa, e' kuëki imía e' tkéser kukuie. Mik ie' e' tkéser iski eta' ilà iémi.

<sup>17</sup>Ilà iuke e' ttsé Skëköl tö ta' bet Jehová biyöchökwak bua'ie e' tö Agar a ichaké ká ja' a: “¿A Agar wes be' de? Kè be' suanuk. Be' alà tkër iuk e' ttsé Skëköl tö. <sup>18</sup>Be' yú be' alà yulök. Ikóka ulà a kè arwa. Ye' tö ie' aleripa alöwëraë taië.”

<sup>19</sup>Eta' Skëköl tö Agar a di' tum kkaché et. Ie' mía di' e' tsuk,

iyiwak kkuölit a e' méitö Ismael a ye'. <sup>20</sup>Skököl tö Ismael kkö'né buaë. Ie' talane sené ká wé kī kè yi ku' kiè Parán eë. Ie' de sulëname buaë. <sup>21</sup>Ie' kibine ta imì tö iulabatséwa alaköl dör egiptowak ese ta.

**Abraham ena Abimélec  
tö kawö mé ñi a**

<sup>22</sup>E' kéwö ska' ta blu' kiè Abimélec míā ttök Abraham ta. Ie' ñippökwakpa wökir, kiè Ficol, e' mí ie' wapie. Eta Abimélec tö iché Abraham a:

—Sa' wa ijcher tö Skököl be' kimeke taië ì kos wëkebö e' wa. <sup>23</sup>E' kuëki be' ttè mú ye' a ië Skököl wö wa tö be' kè tö ì sulu wamblepa ye' kī ñies ye' ala'r kī ena ye' aleripa kos e'pa kī. Be' ttè mú ye' a tö be' er bua' chöraë ye' a wës ye' er buaë ché be' a es. Ñies be' ttè mú ye' a tö be' er buaë chöraë ká i' wé be' serke e' wakpa a.

<sup>24</sup>Abraham tö iiuté:

—Tó. Es ye' ttè mé be' a.

<sup>25</sup>Erë Abimélec wakpa tö di' tum biule yë'ttsa et Abraham wakpa ulà a. E' chaké Abraham tö ie' a. <sup>26</sup>Ie' tö iiuté:

—Erpa be' ye' tkiwéwa ttè e' wa. Kè bö ichópa ye' a, e'ma kè ye' wa ijcher. Brör zyí tö e' wamblé be' kī?

<sup>27</sup>Abraham tö baka ena obeja kakmé Abimélec a eta ie'pa böi kawö mé ñi a. <sup>28</sup>E' ukuökī ta Abraham tö iobeja alakipa pupula e' dapa'wé doka kuktö ek tsiní. <sup>29</sup>Mik e' sué Abimélec tö eta ie' tö Abraham a ichaké:

—¿I kuëki be' iyiwak kuktö dapa'wé ek tsiní?

<sup>30</sup>Abraham tö iiuté:

—Iyiwak kuktö, e' meke ye' tö be' a iwà kkachoie tö mokī ye' tö di' tum e' bi'.

<sup>31</sup>Ie'pa böi kawö mé ñi a eë e' kuëki ká e' kinewa Beerseba.\*

<sup>32</sup>Ie'pa kawö mé ñi a, e' ukuökī ta Abimélec ena Ficol e'pa biteyal filisteowak ká a. <sup>33</sup>Eta Abraham tö kal kuá kiè tamarisco ese kuatké elka Beerseba. Eë ie' tö Jehová dör Skököl yöbië e' dalöié. <sup>34</sup>Eë ie' sené ká taië filisteowak ká a.

**Skököl tö Abraham ma'wé ilà wa**

**22** <sup>1</sup>E' ukuökī ta Skököl tö Abraham ma'wé tö mokī ie' tö idalöieta'. Ie' chakéitö:

—A Abraham.

Abraham tö iiuté:

—¿I?

<sup>2</sup>Eta Skököl tö iché ia:

—Be' alà eköl è kiè Isaac e' dalër be' éna taië, e' tsúmi Moria. Mik be' demi eë, eta ye' tö be' a kabata kkacheke, e' kī be' alà ttówa ta iña'úwa ye' a ye' dalöioie.

<sup>3</sup>Bule es bla'mi ta Abraham e' kéka ta burro payuéitö. Bö' jchéitö tsèmi. Eta ie' míā wé Skököl tö ie' a iyë' eë ilà ena ikanè mésopa böi e'pa ta. <sup>4</sup>E' böiki es ta Abraham tö ká yëne ie' a e' kī sué kamië. <sup>5</sup>Eta ie' tö iché ikanè mésopa a:

—Ië a' e' tsúat burro i' ta. Ye' ena ye' alà, sa' micho kabata jai a Skököl dalöiök, e' wa sa' döne.

\* 21.31 Beerseba: Hebreoie ká kiè e' wà kiane ché ttè mène ñi a e' di' tum biule ö Obeja kuktö e' di' tum biule.

<sup>6</sup>Etā Abraham wā bö' mí e' ppékaitō Isaac kuli' kī. Tabela ena bö'ka bö' batsoie e' mí Abraham wā. Etā imíyal ñita. <sup>7</sup>Etā Isaac tō iché iyé a:

—A, yéwö.

Abraham tō iiüté:

—A alà, ìi kiane be' kī?

Isaac tō iché ia:

—A Yéwö, bö' tso' se' wā, ñies bö'ka, eré ówé obeja pupula tteke-wā Skéköl a e'?

<sup>8</sup>Iyé tō iiüté:

—A alà, Skéköl wák tō e' meraë se' a.

Ie'pa mir ñita. <sup>9</sup>Mik ie'pa demi wé Skéköl tō iyé' Abraham a ee, etā Abraham tō ák kataté et ka'ie. E' ukuökī tā ibö' dapa'wéka ka' e' kī tā ilà klö'wéwaitō payuéwā mékaitō bö' bata kī. <sup>10-11</sup>Ie' tabela klö'wéwa ilà ttowā ña'wé Jehovah a. E' wöshā tā Jehovah biyöchökwak bua'ie e' tō Abraham chaké siwā' kī:

—iA Abraham, a Abraham!

Ie' tō iiüté bet:

—ìi?


<sup>12</sup>Jehová biyöchökwak bua'ie e' tō iché ia:

—iBe' alà kè shka'war, kè ittar-wā! Be' wák alà eköl ème e' kè kkeone be' wā ye' yöki. E' wa ye' wā ijcher tō mokī be' tō ye' dalöieta' taië.

<sup>13</sup>E' wöshā Abraham tō isué tō obeja wé'ñe e' malitséwā idula' a kal tsitsir chale a. Ie' tō iyiwak e' klö'wéwā jché ña'wéwa ilà skéie Jehovah dalöioie. <sup>14</sup>Ie' tō ká e' kiè méka i' es: “Ì kiane se' kī e' mera Jehovah tō.” E' kuëki i'ñe tā se' tō ichekeia: “Ì kiane se' kī, e' merdaë se' a Jehovah kébata a.”

<sup>15-16</sup>Jehová biyöchökwak bua'ie e' tō Abraham skà kié ká jai a tā ichéitō ia:

—Jehová tō iché: ‘Buaë be' tō ye' dalöieke, be' alà eköl è, e' métt sabö ye' a. <sup>17</sup>E' kuëki ye' er buaë chöraë be' a taië. Be' aleripa alöweraëyö taië wes bëkwö tso' taië ká jai a es, wes tsa'wö tso' taië dayë kkömik es. Ñies ie'pa e'



*I' dör obeja wé'ñe malitséwā idula' a. (Génesis 22.13)*

alörakā ibolökpa kī kekraë. <sup>18</sup>Be' tö ye' ttò dalöié, e' kuëkī be' aleripa batamik ye' er buaë chöraë ká ulitane wakpa a.'

<sup>19</sup>Eta Abraham biteane wé ikanè mésopa atéat ee ta imíyal seraa ñita dömíne Beerseba wé ie' serke ee.

### Nahor ala'r

<sup>20-23</sup>E' ukuökī ta biyò debitu Abraham kī tö ie' èl kiè Nahor, e' alaköl kiè Milcá, e' ala'r de pàköl (8). E' alà ko'k kiè Uz. Imalepa kiè dör Buz, Quemuel, e' dör Aram yé, Quésed, Hazó, Pildás, Ildaf ena Betuel e' dör Rebeca yé.

<sup>24</sup>Nahor alaköl skà tso' kiè Reumá, e' ta ie' ala'r kéka tkël. E'pa kiè dör Teba, Gáham, Tahas, ena Maacá.

### Sara blénewa

**23** <sup>1</sup>Mik Sara kī duas tso' cien eyök kī dabom böyök kī kul (127), <sup>2</sup>eta ie' blénewa ká kiè Quiriat-arbá ate Canaán ee. Ñies ká e' kiè Hebrón. Abraham schöne e' iëitséitö siarë. <sup>3</sup>Ie' tkër idëütö nu o'mik e' e' kéka ta imía ttök hititawakpa ta, ta ichéitö ie'pa a:

<sup>4</sup>—Eré ye' dör ká kuá'kī wak serke a' shua e' è, erë ká wataú ña pöie ye' dëütö blowa.

<sup>5</sup>Ie'pa tö iiuté:

<sup>6</sup>—A kékëpa, be' we'ikè sa' tö, sa' ttò ttsó. Sa' a ta be' dör kékëpa tajë e' serke sa' shua. E' kuëkī be' dëütö nu bló sa' pö bua'ie ese a. Sa' ulitane kè tö ichepa be' a tö kè iblar sa' pö a.

<sup>7</sup>Ie' e' duéka ie'pa wörki ta ie' e' tkéwa kuchë kī ie'pa dalöiök <sup>8</sup>ta ichéitö ie'pa a:

—Mokī a' kī ikiane tö ye' dëütö nu bléwayö ié a' ká a, e' ta wëm kiè Efrón dör Sóhar alà, e' a ichó <sup>9</sup>tö ákuk tso' ie' ká kkò a kiè Macpelá e' wataútsa ye' a ye' yamipa pöie. Ye' tö ipatuëmi ie' a kos ituè ekkë. Es ákuk e' atë ye' ulà a a' shua.

<sup>10</sup>Eta Efrón dör hititawak e' tkër-ñak ie'pa shua, e' tö Abraham iuté darërë as iyamipa ena kos daparke ká e' wékkö a e'pa tö ittò ttsò. Ie' tö iché Abraham a:

<sup>11</sup>—A kékëpa, kè ye' tö ákuk watuëpa be' a. Ká e' ñies ákuk tso' ia, e' kakmekeyö be' a é. Ye' yamipa kos tso' ié e'pa tö ye' ttò ttsé tö ká e' kakméyö be' a. Be' dëütö nu bló ee.

<sup>12</sup>Erë Abraham e' tkéwane kuchë kī ká e' wakpa wörki <sup>13</sup>ta ichéitö ie' a sulitane wörki:

—Ye' ttò ttsó. Be' pablèyö tö ká e' ské klö'ú ye' ulà a. E' ukuökī ye' dëütö nu blekewayö.

<sup>14</sup>Ie' tö iiuté:

<sup>15</sup>—A kékëpa, ye' ttò ttsó. Ká e' ské dör inuköl wömule doka cien tkéyök (400), erë inuköl ekkë è, kè e' kī se' tkinuk. Be' dëütö nu bló ee.

<sup>16</sup>Eta kos ie' tö ká ské ché imalepa wörki e' mène buaë Abraham a, ekkë patuéttsaitö. \* <sup>17-18</sup>Es Efrón ká tso' Macpelá ate Mamré diwö tskirke e' ëka e' de Abraham ulà a iákuk ta ena kal tso' kos ikī e' ta. Hititawak ena sulitane dami ká e' wékkö a e'pa kos dör ká tone e' ttekölpa.

<sup>19</sup>E' ukuökī ta, Abraham tö idëütö nu bléwa ákuk tuéitö

\* 23.16 Es ie'pa wöblar iyi watauk ñi a. Eré Efrón tö iché tö ká e' kakméitö Abraham a erë e' kè yëne. Ñies e' ane Abraham éna, e' kuëkī ie' tö Efrón patuë bèrë kos Efrón ie' a iché ekkë.

Macpelá ee. Ká e' atē Mamré atē Canaán e' o'mik tsinet (Mamré kiè ñies Hebrón). <sup>20</sup>Ká e' watuéttsa ie' a hititawak tō. Es ká e' ena ákuk e' de Abraham ulà a iyamipa pöie.

**Abraham tō alaköl  
yulök patké Isaac a**

**24** <sup>1</sup>Abraham dewa kékēpalaie. Ie' a Jehová er buaë ché iyi ulitane wa. <sup>2</sup>Ká et ta ie' tō ikanè méso kibi kié. E' dör ie' iyi kos e' kuēblu. Ie' tō iché ia:

—Be' ulà múwa ye' tu' dikia iwà kkachoie tō mokī i kiekeyö be' a e' waweraëbö. <sup>3</sup>Jehová dör ká jai ena ká i' e' Kéköl e' wörki be' ttè mú ye' a mokië tō ye' alà kè kar senukwa Canaán ie se' serke e' alékölpa ta. <sup>4</sup>Be' yú ká wé ye' manét ee, etā ee alaköl yuló eköl ye' yamipa shua senukwa ye' alà ta.

<sup>5</sup>Ie' tō iiuté:

—Dö' alaköl kè bitu ye' ta, e' ta žwes ye' iwëmi? ¿Buaë idir be' a tō be' alà mi' ye' wa dò wé be' manét ee?

<sup>6</sup>Ie' iiuté:

—iAu, kè ye' alà tsarmi ee! <sup>7</sup>Jehová dör ká jai Kéköl, e' tō ye' yé'ttsa ye' yé u a ena ye' yamipa ká a. Ie' tō ittè me' ye' a tō ká i' meraëitö ye' aleripa a. Ie' tō ibiyöchökwak patkeraë be' kimuk alaköl tsukbitu ye' yàkie. <sup>8</sup>Alaköl kè shkak be' ta, e' ta kè be' tkinuk. Kè be' kàne iskà yulök. Erè kè ye' alà tsarmi ee.

<sup>9</sup>Etā ikanè méso ulà méwa ie' tu' dikia ta ittè mé ia tō iweraë wes iuk patkéitö es. <sup>10</sup>E' ukuökī ta ie' tō iwökir iyi kos bua'buā, ese shtë

tsëmi kakmè. Ekkè kos payuëitö iyiwak kiè kameio e' ki doka dabop. Etā ie' mia iyiwak wëttsë tkörö Nahor atē Mesopotamia ee. <sup>11</sup>Mik ie' demi tsinet Nahor, etā ká tuirketke. Diwö ekkè ta ká e' alékölpa mi'ke di' tsuk. E' wösha ta ie' de di' tum biule e' kkömik ta ikameio këitö e' tulöksër enuk ee. <sup>12</sup>Etā ie' tō iché Skéköl a: “A Jehová, be' dör ye' wökir Abraham e' Kéköl. Ye' kimú i'ñe ñies er buaë chó ye' wökir a. <sup>13</sup>Ie di' tum biule o'mik ye' e' tsukeat bërbër è ká i' busipa tso' di' tsuk e' dalewa. <sup>14</sup>Kawö mú ña tō wéne ék a ye' iché: ‘Be' kakö' ówa ye' a di' kakmú yè', as e' tō ye' iütö: ‘Be' di' yó ñies be' kameio a ikakmekeyö.’ Es ye' éna iane tō e' ék shushtë be' tō Isaac a alakölie. Es ye' wa ijchermi tō be' er bua ché ye' wökir a.”

<sup>15</sup>Etā kam i chekeitö e' or, etā ie' isué alaköl datse eköl kakö' bune kuli' ki di' tsoie. E' dör Rebeca, ie' dör wëm kiè Betuel e' alà busi. Betuel mi dör Milcá ena iyé dör Nahor. Nahor dör Abraham ël. <sup>16</sup>Rebeca dör busi buaala kam iser wëm ta. Ie' mia döttsa di' tum biule e' a ikakö' wà iök. <sup>17</sup>Mik imítke etā Abraham kanè méso tunemi itökī ta iché ia:

—Be' we'ikèyö, di' dami be' wa e' kakmú ña yè.

<sup>18</sup>Ie' tō iiuté,

—A kékēpa, be' di' yó.

E' bet ie' kakö' éwa klö'wéwa ulà a ta di' méitö ia yè. <sup>19</sup>Mik ie' di'yé one ta Rebeca tō iché ia:

—Ye' mí di' tsuk ñies mè be' kameio a.



*I' dör di' tum biule ese. (Génesis 24.11)*

<sup>20</sup>Bet ikakö' wà ka'wéitö wé  
iyiwak di'yöke e' a' tã imí di' kí tsuk  
iyiwak a. Es iwéitö kameio ulitane  
a. <sup>21</sup>E' dalewa Abraham kanè méso  
tso' isaúk bèrè, wà dör tö ie' kí ikia-  
ne jchenowã yësyësë tö Jehová tö  
ie' kímé ì dalërmik ie' shkò e' wa  
as idöttsã buaë ö au. <sup>22</sup>Mik kameio  
di'yé one, etã ie' tö ula'tsio sù es dör  
gramo teröl ese tkéwã busi yik a.  
Ñies ulαιο méitö böt, e' es dör cien  
gramos tsatã. <sup>23</sup>Etã ie' tö iché ia:

—Be' we'ikèyö, ichö ña ¿Yi alà  
busi be' dör? ¿Ye' chömi ì'ñe nañe-  
we be' yé u a' kapökrö ye' kanè  
mésopa tã?

<sup>24</sup>Ie' iiüté:

—Ye' dör Betuel alà busi, e' dör  
Milcá ena Nahor alà wëm. <sup>25</sup>Sa' u  
a' a' chömi. Ñies a' kameio a' chke  
tso'.

<sup>26</sup>Etã Abraham kanè méso e'  
tkéwã kuchë kí Jehová dalöiök  
<sup>27</sup>tã ichéitö: “Jehová dör ye' wökir  
Abraham e' Këköl. E' kikökka ye'  
tso'. Këkraë ie' tö ye' wökir Abra-  
ham kimeke buaë. Këkraë ie' er  
buaë chöke ye' wökir a. Ie' wã ye'  
debitu buaë ñalã kí dò ìe ye' wökir  
yamipa u a. E' kueki ikikèkayö.”

<sup>28</sup>Rebeca tunemi shkalalã imì  
u a' ì kos tka ie' tã e' pakök. <sup>29-30</sup>Ie'



akë kiè Labán, e' tò ula'tsio sué ena ulaio sué ikutà ulà a. Ñies ì ché Abraham kanè méso tò e' tté ttséitö. E' kuëki ie' bitea ññaletsuk di' tum biule a. Ie' de Abraham kanè méso ska' e' tso'ia ikameio ta di' tum biule ska'. <sup>31</sup> Etá Labán tò iché ia:

—Jehová tso' be' ta buaë.

¡Mishka ye' ska'! ¿Wes be' e' tsukeat u'rki? Ye' u kanewétke be' a ñies kameio a.

<sup>32</sup> Es Abraham kanè méso bitea ie' ta. Eë ie' tò dali tso' kameio ki e' éwa ta itiéitö. E' ukuöki ta ie' wa di' debitü Abraham kanè méso a ena iwapiepa a klò skuoie.

<sup>33</sup> Mik ie'pa tò itié, etá Abraham kanè méso tò iché:

—Kè ye' chköpa kam ye' tò iók ye' debitü e' wà pakò a' a etá.

Labán tò iüté:

—E'ma ichó. ¿Ì dör iwà?

<sup>34</sup> Ie' tò iché:

—Ye' dör Abraham kanè méso.

<sup>35</sup> Jehová tò ikimé taië. Ie' tò iblu'wé taië. Obeja, baka, orochka, inukölchka, kanè mésopa wëpa ena alakölpa, kameio ena burro, e' kos méitö ia taië. <sup>36</sup> Ñies ilaköl Sara e' tò alà mé ia eköl wák wëm ikënewatke etá. Ì kos tso' ye' wökir wa e' méitö ilà a. <sup>37</sup> Ie' tò ye' ké tté muk ie' a. Ye' a ichéitö: 'Ye' alà kè kar senukwá Canaán wé ye' serke e' alékölpa ta. <sup>38</sup> Be' yú wé ye' yépa tso' eë ta alaköl yuló eköl ye' yàkie ye' ditséwö shüa.' <sup>39</sup> Ye' tò iüté: 'A ye' wökir Abraham, ¿dö' alaköl kè bitü ye' ta?' <sup>40</sup> Ie' tò ye' iüté: 'Këkraë ye' serke buaë Jehová wöa, e' kuëki ie' tò ibiyöchökwak patke-

raë be' ta as be' kawö tkò buaë ññala ki, ñies as alaköl kübö ye' yàkie ye' yamipa ye' yé wa e'pa shüa. <sup>41</sup> Erë ye' yamipa kè éna ilà busi patkak be' ta, e' ta kè be' tkinuk. Kè ì tté ta'ia be' ki.'

<sup>42-44</sup> "E' kuëki ye' debitü i'ñe di' tum biule ska'. Eë ye' tò ikié Jehová dör ye' wökir Abraham e' Këköl e' a: 'tö mokü be' ye' kimeke alaköl yulök ye' wökir Abraham yàkie, e' ta as e' bitü ye' ska' íe di' tum biule ska'. Mik ye' tò ie' a di' kak kié, etá as imütö ye' a ena ichöitö: Ñies ye' tò be' kameio a ikakmeke. Es ye' isuëmi tò alaköl e' shushtë be' tò ye' wökir yàkie.' <sup>45</sup> Mik e' chekeyö e' erketke, etá ye' isué tò Rebeca datse ikakö' bune ikuli' ki. <sup>46</sup> Mik ie' di' yinetke etá ye' tò ie' a iché: 'Be' we'ikèyö, di' dami be' wa e' kakmú ña yè.' E' bet ikakö' éwaitö ta ichéitö: 'Be' di' yó. Ñies imekeyö be' kameio a.' Ie' ye' a di' mé ñies ye' kameio a. <sup>47</sup> E' ukuöki ta ye' tò ie' a ichaké: '¿Yi alà busi be' dör?' Ie' iüté: 'Ye' dör Betuel alà busi e' dör Nahor ena Milcá alà.' Etá ula'tsio sù e' tkéwayö iyik a ena ulaio tkéwayö böt iulà a. <sup>48</sup> E' ukuöki ta ye' e' tkéwa kuchë ki ta Jehová dalöiéyö. Ie' dör ye' wökir Abraham e' Këköl e' kikékayö. Ie' wa ye' debitü buaë yësyësë busi shukititö ye' wökir yamipa shüa ilà a e' ska'. <sup>49</sup> Es ¿a' er buaë chöke ye' wökir a? ¿A' e' chöke ikimuk er bua' wa? Ichó ña i' ta yësyësë ima a' tò ichè, es ye' éna iarmi tò ì wëmiyö."

<sup>50</sup> Etá Labán ena Betuel e'pa tò iüté:

—E'ma i' kōs debitu Jehová ttō wa. E' kuēki kē wēs sa' a ì onuk. Kē sa' a ì yēnuk yēs. <sup>51</sup>I' Rebeca. Itsūmi be' wōkir a senukwa ilà ta wēs Jehová ki ikiane es.

<sup>52</sup>Mik Abraham kanè méso tō ttē e' ttsé, etā ie' e' tkéwa kuchē ki iwōtsa méwa íyök ki Jehová dalöiök. <sup>53</sup>E' ukuöki ta ie' tō íyi yöule orochka wa ena inukölchka wa ñies datsi' bua'buā e' taiē yélur méitō Rebeca a. Ñies ie' tō ikakmé Rebeca akē a ena imì a. <sup>54</sup>E' ukuöki ta ie' ena iwapiepa chké di'yé ta ikapere eē. Bule es ta itì'nerak ta Abraham kanè méso tō iché:

—Ye' míane ye' wōkir ska'.

<sup>55</sup>Erē Rebeca akē ena imì e'pa tō iché ia:

—Rebeca kē tsarmi bet. Kawō mú ie' a as ie' e' tsūat sa' ta ká dabop, e' wa wē' be' wa imi'mi.

<sup>56</sup>Erē ie' tō iché ie'pa a:

—Kē ye' wöklö'ukia a' tō. Jehová tō ye' kímé as ì kōs dōttsa buā ye' a. E' kuēki ye' ómi ye' wōkir u a.

<sup>57</sup>Ie'pa tō iiuté:

—Sa' mí Rebeca kiök chakē çima ichèmiitō?

<sup>58</sup>Etā Rebeca kiérakitō ta ichaké-rakitō ia:

—A Rebeca çbe' shkak wēm i' ta? Ie' tō iiuté:

—Tó.

<sup>59</sup>Es ie'pa tō Rebeca ena alaköl tso' ie' kkö'nuk kekraē e'pa a kawō mé as imi'rak. Ñies Abraham kanè méso ena iwapiepa kōs e'pa a kawō merakitō as imi'rak. <sup>60</sup>Ie'pa mitke ta Rebeca yamipa er buā ché ie' a ttē i' wa:

“A sa' yami,

As be' alör taiē shüteē.

As be' aleripa e' alōka ibolökpa kōs ki.”

<sup>61</sup>Etā Rebeca ena ikanè mésopa e' tuléka ie'pa kameio ki ta imíyal Abraham kanè méso itöki.

<sup>62</sup>E' kēwō ska' ta Isaac serke Négueb wé di' tum biule tso' kiē “Skököl tso' e' tō ye' sueke” eē, e' dene iyé ska'. <sup>63</sup>Tsáli ta Isaac e' yéttsa shkök kabikeitsörami. E' wōshā ta ie' isué tō kameio datse tseē. <sup>64</sup>E' wōshā Rebeca tō ie' sué ñies ta ie' e' éwa kameio ki. <sup>65</sup>Rebeca tō ichaké Abraham kanè méso a:

—çWēm doā wì se' kke, e' dör yi? Ie' iiuté:

—E' dör ye' wōkir Isaac.

Etā Rebeca wō pabakéwa datsi'tak wa.

<sup>66</sup>Abraham kanè méso tō ì kōs tka ie' ta e' paké Isaac a. <sup>67</sup>E' ukuöki ta Rebeca mítser Isaac wa imì Sara blēnewā e' u a. Es Isaac senéwa ie' ta. Isaac éna Rebeca dalēr taiē, es ie' er pabléne imì blēnewā e' kuēki.

### Abraham ena Queturá e'pa aleripa

**25** <sup>1</sup>Abraham alaköl ské tséwa kiē Queturá. <sup>2</sup>Ie' ala'r kéka Abraham ta wēpa dōka teröl. E'pa kiē dör Zimrán, Jocsán, Medán, Madián, Isbac ena Súah. <sup>3</sup>Jocsán dör Sebá ena Dedán, e'pa yé. Dedán aleripa e' ditséwō dōka mañal kiē asurwak, letuswak ena leumwak. <sup>4</sup>Madián ala'r wēpa kiē Efá, Éfer, Hanoc, Abidá ena Eldaá. E'pa kōs dör Queturá aleripa.

<sup>5-6</sup>Ì kòs tso' Abraham wà e' atè Isaac ulà a. Erè kàm Abraham duòwà, e' yòkì ie' tò íyi kakmé ilakölpa malepa ala'r a. Ie'pa patkémiiitò senuk ká bánet atè diwö tskirke e' èkà kamië as kè iku'rak Isaac ska' tsinet.

### Abraham blènewà

<sup>7</sup>Abraham sene' duas cien eyök kí dabom kulyök kí skel (175) sèraa <sup>8</sup>età iblènewà buaë ikènewatke kè weine siarè. Es ie' michoë idèütöpa itökì. <sup>9-10</sup>Ila'r Isaac ena Ismael e'pa tò inú blé ilaköl Sara pö e' o'mik ákuk kiè Macpelá eë. Ákuk e' atè Mamré diwö tskirke e' wa. Ká e' bak hititawak kiè Efrón dör Sóhar alà e' ulà a. Ká e' wato'ttsa hititawak tò Abraham a. <sup>11</sup>Abraham blènewà, e' ukuökì tã Skèköl er buaë ché Isaac a. Ie' e' tséat senuk tsinet di' tum biule kiè “Skèköl tso', e' ye' sueke” eë.

### Ismael ala'r

<sup>12</sup>Ismael dör Abraham alà Agar tã. Agar dör Abraham alaköl Sara, e' kanè méso e' dör egiptowak. Ikkè dör Ismael ala'r e'pa kiè <sup>13</sup>wes ikunerak es: Nebaiot, e' dör ilà tsá. E' itökì Quedar, Adbeel, Mibsam, <sup>14</sup>Mismá, Dumá, Masá, <sup>15</sup>Hadar, Temá, Jetur, Nafis ena ibata kiè Quedmá. <sup>16</sup>E'pa kòs dör Ismael ala'r dökà dabom eyök kí böl (12). Ie'pa ká kiérak iwákpa kiè wa. Ie'pa kòs dör iwakpa ká wókirpa.

<sup>17</sup>Ismael kí duas de cien eyök kí dabom mañayök kí kul (137) tã

iblènewà. Es ie' michoë idèütöpa itökì. <sup>18</sup>Ie' aleripa mía senuk Havilá ena Sur e' shushà. Ká e' atè Egipto wöshaë Asiria ñalé kke. Ie'pa serke eë bánet Abraham aleripa malepa yökì.

### Jacob ena Esaú kune

<sup>19</sup>Ttè i' dör Isaac dör Abraham alà, e' pakè. <sup>20</sup>Isaac kí duas de dabom tkèyök (40) tã isenéwà Rebeca tã. Rebeca dör Betuel e' alà busi ena Labán kutà. Ie'pa dör arameowak serke ká kiè Padán-aram eë. <sup>21</sup>Rebeca kè dò alàë. E' kuèkì Isaac tò Jehová a ikié as Rebeca dò alàë. Jehová tò ittò ttsé tã Rebeca dunekà e' wakpa dör klò. <sup>22</sup>Erè klöpa ñippöke taië ie' shuà. E' kuèkì ie' ibikeitsé: “Ye' weirke i' es, e'ma çiók ye' sermiia?” E' kuèkì ie' mía iwà chakök Jehová a. <sup>23</sup>E' tò ie' a iché:

“Be' shuà ala'r tso' böl.  
Mik ie'pa de këchke, etã ikibi ék doraë itsirla kanè mésoie.  
Ie'pa aleripa doraë ká böt ñi bolökpa ese wakpa.  
Itsirla aleripa doraë diché kibiie ikibi aleripa tsata.  
E' kuèkì ie'pa ñippémitke kàm ikur e' yökì.”

<sup>24</sup>Rebeca kéwö de, etã klöpa kune wèpa. <sup>25</sup>Ikéwe ék kune e' tsà dör mashmash ipàkö shamamaë. Ie' kiè mékãitö Esaú.\* <sup>26</sup>Alà tsá kune e' klöulewà iël tsirla wà iklò kaniñak a iulà et wa. E' kuèkì ikiè mékãitö

\* 25.25 *Esaú*: Esaú kiè ñies Seír. Hebreoie Seír wà kiane chè pakò. Génesis 36.8 saú.

Jacob.\* Mik Rebeca klöpa kune etä Isaac kī duas tso' dabom teryök (60).

Iyé wā ì tso' mekeat Esaú a  
e' kēwō watuéttsaitō

<sup>27</sup>Klöpa kibinetke. Esaú dör yëria poë. Ie' wöbatsö sulu yëble wa. Erë iël Jacob, e' kè dör es. Ie' serke bèrë. Ie' wöbatsö senuk u a è. <sup>28</sup>Iyiwak kañiru tteke Esaú tō e' chkà wa Isaac wöbatsö suluë. E' kuëki Isaac kī Esaú kiar kibiie Jacob tsatā. Erë Rebeca kī Jacob kiar kibiie Esaú tsatā.

<sup>29</sup>Ká et tā Jacob tso' ulök. E' dalewa Esaú debitū shtrinewā tajë datse kañika. <sup>30</sup>Ie' iché Jacob a:

—Be' we'ikèyö, ì alé be' tō mat se kakmú ye' a ñè. Sulu ye' dué bli wā. E' kuëki Esaú kiè Edom\* ñies.

<sup>31</sup>Jacob tō iiuté:

—Keweie ì mekeat se' yé tō be' a be' dör ilà kibi e' kuëki, e' kēwō múttsa ye' a chkò i' skéie.

<sup>32</sup>Esaú tō iché:

—Ye' tteke bli tō dö' e' tō ye' ttèwā, e' tā ì mekeat se' yé tō ye' a ìie bua' e' dör ye' a?

<sup>33</sup>Jacob tō ikí ché ia:

—I' tā be' ttè mú ye' a tō mokī be' tō ye' a imeke.

Etā Esaú tō ittè mé Jacob a yësyësë Skëköl wōā. Es ì mekeat iyé tō ie' a, e' kēwō métttsaitō Jacob a. <sup>34</sup>Jacob tō chkò mé ia pan tā. Mik Esaú chké one di' yé one, tā ie' e' kéka tā imía. Ie' dör ilà kibi e' ulà a íyi bua' kēwō tso', e' kè kī ie' tkine yës.

Isaac mía Guerar

**26** <sup>1</sup>E' kēwō ska' tā ketba ane tajë ká e' kos kī wes ibak Abraham kēwō ska' tā es. E' kuëki Isaac mía Guerar wé filisteowak blú serke kiè Abimélec ee. <sup>2</sup>Ee Jehovah e' kkaché ie' a tā ichéitō ia: “Kè be' minuk Egipto. Be' e' tsúat wé ye' be' a iché ee. <sup>3</sup>Be' senúia ká i' kī. Ye' tso' be' tā. Ye' er buaë chöraë be' a. Ká i' kos meraëyö be' a ñies be' aleripa a. Es ye' ttè muke be' a wes kewe ime'yö be' yé Abraham a es. <sup>4</sup>Be' aleripa alöweraëyö tajë wes bëkwö tso' tajë es. Ká i' kos merayö be' aleripa a. Ñies ie'pa batamik ye' er buaë chöraë ká ulitane wakpa a. <sup>5</sup>Abraham tō ye' ttè kos e' iütë' buaë. Ttè mé ye' tō ie' a e' kos blë' buaë ie' tō e' kuëki ye' tō ttè buaë e' meke be' a ñies.”

<sup>6</sup>Isaac e' tséat senuk Guerar. <sup>7</sup>Ká e' wakpa tō Isaac a ichaké: “¿Rebeca dör be' yaie?” Erë ie' suane ichök: “Ie' dör ye' alaköl.” E' kuëki ie' iché: “Ie' dör ye' kutà.” Ie' tō ibikeitsé tō ká e' wëpa tō ie' ttèwami ilaköl buaala kuëki.

<sup>8</sup>Isaac kī ká de tajë ee. Ká et tā, ká e' blú kiè Abimélec, e' tō isué ukkö tsitsir a tō Isaac tso' ilaköl Rebeca peñuk. <sup>9</sup>Bet itsuk patkémii-tō tā ichéitō ia:

—¿Mokī tō alaköl se' dör be' alaköl? ¿Ì kuëki be' tō iyë' kuaë tō ie' dör be' kutà?

Isaac tō iiuté:

—Ye' ibikeitsé tō isalema a' ye' ttèwami ie' kuëki.

\* 25.26 Jacob: Hebreoie s'kiè e' wà kiane chè s'klò kaniñak.

\* 25.30 Edom: Hebreoie s'kiè e' wà kiane chè mat.

<sup>10</sup>Erë Abimélec tö iché ia:

—¿I kuęki i' wamblébö sa' ta?

Tsir etā wēm wele senéwā ie' ta, e' ta iekkë ta be' tö sa' ké ì sulu wamblök Skëköl wöa.

<sup>11</sup>Abimélec tö iché sulitane a:

—A' isie tö Isaac tsiriwé ö ilaköl tsiriwé, e' ta e' tterawā.

<sup>12</sup>Duas e' wa Isaac tö dalì kua-tké, wà wöne buaë, Jehová er buaë ché ie' a e' kuęki. <sup>13</sup>Ie' de íyi blú tajë. Tajë íyi tso' ie' wā. <sup>14</sup>Ie' wā obeja ena baka tso' tajë. Ñies kanè mésopa tso' tajë ie' wā. E' kuęki filisteowak er ttsë'r suluë ie' kī. <sup>15</sup>E' kuęki ie'pa tö di' tum bi' iyé Abraham e' kanè mésopa tö, e' kōs wötéwā íyök wa. <sup>16</sup>Bata ekkë ta Abimélec tö iché Isaac a:

—Be' yöne íyi blu' tajë sa' tsata, e' kuęki ibe' yúshka!

<sup>17</sup>Etā Isaac míā senuk Guerar kakkue kī. <sup>18</sup>Ee di' tum bi' iyé tö, e' wöté'wā filisteowak tö iyé blënewā ukuökī ta, e' kōs biéneitö ta ikië mékãitö wes iyé tö ime'ká es. <sup>19</sup>Ká et ta ie' kanè mésopa tso' di' tum biök ká e' kī, etā ie'pa tö di' tum a di' tuökekā tajë ese kué et. <sup>20</sup>Erë ká e' obeja kkö'nukwakpa debitu ñippök Isaac obeja kkö'nukwakpa ta. Ie'pa tö iché tö di' tum e' dör ie'pa icha. E' kuęki Isaac tö di' tum biule e' kië méká “Ñippök.” <sup>21</sup>E' ukuökī ta Isaac kanè mésopa di' tum skā bié et, e' kī iskā ñippé-rak. E' kuęki di' tum biule e' kië mékãitö “Se' ñi bolök.”

<sup>22</sup>Ie' míā kãmië ká e' kī, ee di' tum skā biéitö et. E' kè kī ñni bunerak. Ie' iché: “I'ñe ta Jehová tö ká bua' mé se' a wë' ta se' serdaë

buaë.” E' kuęki ká e' kië mékãitö “Ká tso' tajë se' a.”

<sup>23</sup>E' ukuökī ta ie' míā Beerseba. <sup>24</sup>E' nañewe Jehová de ie' ska' ta ichéitö ia:

“Ye' dör be' yé Abraham e' Këköl.

Ye' tso' be' ta, e' kuęki kè be' suanuk.

Abraham dör ye' kanè méso e' dalërmik ye' er buaë chöraë be' a, ñies be' aleripa alöweraëyö tajë.”

<sup>25</sup>Ee Isaac tö ák kataté et ka'ie iyiwak jchoie Jehová dalöioie. Ee ie' sené ta ikanè mésopa tö di' tum bié et ee.

#### Isaac ena Abimélec kãwö mé ñi a

<sup>26</sup>Ká et ta, Abimélec datse Guerar debitu ttök Isaac ta. Iyamipa debitu böl ie' ta. Eköl kië Ahuzat. Iëköl kië Ficol. E' dör Abimélec ñippökwakpa wökir. <sup>27</sup>Isaac tö iché ia:

—A' éna ye' ar suluë. A' ye' yö'shkar a' ká kī. Etā ¿iök a' do ye' ska'?

<sup>28</sup>Ie'pa tö iiüté:

—Sa' isuë tö Jehová tso' be' ta. E' kuęki sa' bitea be' a ichök tö kãwö mùwasö ñita. <sup>29</sup>Sa' kè wā be' tsirioule ì wa. Këkraë sa' tö be' kímé. Mik be' manetwā, etā sa' kè wā ì tté ku' a' kī. I'ñe ta iwënewā tö be' a Jehová er buaë chöke tajë. E' kuęki be' ttè mú sa' a tö be' kè tö ì sulu wamblepa sa' kī.

<sup>30</sup>Etä Isaac tö kawö buaë tkö'wé ie'pa ta, chkè wa di'yè wa. <sup>31</sup>Bule es bla'mi ta ie'pa tö ikawö mé ñi a tö kè ñippöiarak. E' ukuöki ta ie'pa e' chéat ñi a er bua' wa.

<sup>32</sup>E' diwö shà ta Isaac kanè mésopa tso' di' biök, e'pa wa ibiyö de tö sa' di' kué. <sup>33</sup>Ie' tö di' e' kiè méka Sebá. \* E' kueki i'ñe ta ká e' kièia Beerseba.

<sup>34</sup>Mik Esaú ki duas de dabom tkéyök (40), etä ie' senéwa alakölpa böl ta. Eköl kiè Judit e' yé kiè Beerí, e' dör hititawak. Ièköl kiè Basemat e' yé kiè Elón, e' dör hititawak ñies. <sup>35</sup>Alakölpa böl e'pa tö Isaac ena Rebeca eriawéka tsiriwéka taië.

**Isaac er buaë ché  
Jacob ena Esaú a**

**27** <sup>1</sup>Isaac dewa kékèpalatke. Ie' kè wöbla wawëria. Ká et ta ilà kibi Esaú e' kiéitö ta ichéitö ia:

—iA alà!

Esaú tö iiuté:

—A yéwö, ìi?

<sup>2</sup>Etä Isaac iché ia:

—Be' tö isué tö ye' kënewatke dö' wekkè alè ta ye' duöwa. <sup>3</sup>E' kueki ye' ki ikiane tö be' kuaböt klö'ú ta be' yú ye' a yéblök. <sup>4</sup>Etä iwakaneú ña buaë wes ye' wöbatsö iwa es, ta itsúbitu ña katè. E' wa ye' er buaë chöke be' a kam ye' duöwa e' yöki.

<sup>5</sup>Erë Isaac ttöke Esaú ta e' ttsé Rebeca tö. E' kueki mik Esaú mia yéblök kañika <sup>6</sup>etä bet ie' tö iché Jacob a:

—A alà, ye' ttö ttsó. Ye' tö be' yé ttsé ttök be' èl Esaú ta, ta iché ia:

<sup>7</sup>“Be' yú yéblök, e' wakaneú ña buaë ta itsúbitu ña katè. E' ukuöki ta ye' tö be' a iyi kos bua' e' kéwö mekeyö be' a Jehová wörki kam ye' duöwa e' yöki.” <sup>8</sup>E' kueki ye' ttö ttsó buaë. <sup>9</sup>Be' yú chibo pupula bua' bua' ese tsúbitu ña bötö ta ikanewekeyö buaë wes be' yé wöbatsö iwa es. <sup>10</sup>E' ukuöki ta be' tö chkè tsúmi be' yé a as inuitö. Es iyi kos e' kéwö atmi be' a be' èl skéie.

<sup>11</sup>Erë Jacob tö iché imi a:

—Ye' èl pa shamamaë. Ye' kè dör es. <sup>12</sup>Ye' yé tö ye' kèmi, e' ta ittsewami tö ye' idir, etä ie' ichèmi tö ye' tso' ie' dalöseukwa. Ie' kè er buaë chepa ye' a. E' skéie ie' er sulu chöraë ye' ki.

<sup>13</sup>Erë imi tö iiuté:

—A alà, as ie' er sulu chò ye' ki. Ye' ttö iutó. Be' yú chibola chéyo be' a e' tsuk.

<sup>14</sup>Etä Jacob mia chibola tsuk e' debitu iwa imi a. E' kanewé imi tö buaë wes Isaac wöbatsö iwa es. <sup>15</sup>Ilà kibi Esaú datsi' tso' blèule u a e' bua' bua' yéttsa iékaitö ilà tsirla ki. <sup>16</sup>E' ukuöki ta chibola kkuölit wa Jacob ulà ena ikuli' patréwaitö. <sup>17</sup>Chkò bua' ena pan yuétkeitö, e' méitö Jacob a tsèmi iyé a.

<sup>18</sup>Jacob dewa iyé ska' ta ichéitö ia:

—A yéwö.

Isaac tö iiuté:

—A alà, ìbe' dör ye' alà wéne ék?

<sup>19</sup>Ie' iiuté:

\* 26.33 Sebá: Hebreoie di' biule kiè e' wà kiane ché ttè mène ñi a.

—Ye' dör Esaú, be' alà kibi ék. Ì chébö ña, e' kanewétkeyö. Be' e' tkóser iyiwak ttéyö e' katök. E' ukuökì tã be' íyi buaë e' kèwö mekebö ye' a, e' mú ye' a.

<sup>20</sup>Erë Isaac tö ichaké ia:

—A alà, ¿wes be' ulà de iyiwak e' ska' bet?

Ie' iiuté:

—Jehová dör be' Kèköl e' tö ye' kímé e' wa ikuéwayö bet.

<sup>21</sup>Isaac tö iché ia:

—Be' e' skówa ye' o'mik pattseyö tö mokjë be' dör ye' alà Esaú.

<sup>22</sup>Ie' e' skéwa iyé o'mik as ipattsöitö. Isaac tö iché:

—Be' ttò e' dör Jacob ttò. Erë be' ulà e' dör Esaú ulà.

<sup>23</sup>Jacob ulà kò shamamaë wes iël kibi ulà es, e' kuëkì Isaac kè éna iane buaë tö e' dör Jacob. Mik ie' er buaë chöketke ilà a, <sup>24</sup>etã iskà chakéneitö:

—¿Mokì be' dör ye' alà Esaú?

Ie' iiuté:

—Tó, ye' dör Esaú.

<sup>25</sup>Iyé tö iché ia:

—A alà, iyiwak ttébö kanewébö e' mú ña katè as ye' er buaë chò be' a.

Ie' tö iyé tié ñies vino mé ia yè. Isaac chké, vino yé. <sup>26</sup>E' ukuökì tã ichéitö ia:

—A alà, be' e' skówa ye' o'mik ye' wöalatstö.

<sup>27</sup>Mik Jacob e' skéwa iyé wöala-ttsök, etã iyé tö idatsi' alattsé tã ier buaë ché ilà a ttè ikké wa:

“Tó, ipaalar wes ye' alà paalar es.

Ie' paalar buaë wes kañikã kkö'nè Jehová tö e' alar è.

<sup>28</sup>As Skèköl tö be' a mò wöli mè kekraë be' dalikua kì.

As ie' tö be' dalikua kos e' wöü buaë

as be' wa trigowö ta' taië ena vino tã' taië.

<sup>29</sup>Kã kua'kì wakpa taië as e' dò be' kanè mésopaie.

As ie'pa e' tulòwarak kuchè kì be' wörkì be' dalöiök.

As be' mú dò be' èlpa wökirie.

As ie'pa e' tulòwa kuchè kì be' wörkì be' dalöiök.

Wépa er sulu ché be' kì, esepa kì Skèköl er sulu ské chöraë.

Ñies wépa er buaë ché be' a, esepa a Skèköl er buaë ské chöraë.”

<sup>30</sup>Isaac er buaë chétke Jacob a tã Jacob míatke. E' bet tã Esaú tso' yèblök e' dene. <sup>31</sup>Ñies ie' tö chkè alé buaë, e' mí iwã iyé a tã ichéitö ia:

—A yéwö, dúla ttéyö e' alí kató. E' ukuökì tã be' er buaë chöke ye' a e' chó ña.

<sup>32</sup>Isaac tö ichaké:

—¿Yi dör be'?

Ilà tö iiuté:

—Ye' dör Esaú be' alà kibi.

<sup>33</sup>Isaac tkinewa painéka taië tã ichéitö:

—E'ma ¿yi dare yèblök, e' wa chkè debitu ña? E' katéwayö seraa kam be' dò e' yökì. E' a ye' er buaë chétke. Es ie' a ye' er buaë ché e' atetke.

<sup>34</sup>Mik Esaú tö ì ché iyé tö e' ttsé, etã ie' erianekã anekã taië tã ichéitö:

—iA yéwö, ye' a er buaë chó ñies!

<sup>35</sup>Erë Isaac tö iüté:

—Be' ël datke ye' kītō'uk e' a ye' er buaë chétke be' skéie.

<sup>36</sup>Esaú tö iüté:

—Wëe' ie' kiè Jacob. I' tã bötöki-cha iwambléitö ye' tã i' es. Be' íyi kéwö mekebö ye' a ye' dör be' alà kibi e' kuëki, e' kéwö yé'ttsã ye' ulà a ie' tö kuaë. I'ñe tã be' er buaë chöke ye' a e' yé'ttsaitö ye' yöki. ¿Warma be' er buaë chöke ye' a e' kè tã'ia?

<sup>37</sup>Isaac tö iüté:

—Ittsó. Ye' tö ie' mékatke be' wökirie. Ye' tö be' aleripa kos e' métke ie' kanè mésopaie. Ñies ye' tö ichétke as chkewö ena vino dò ie' ulà a taië. A alà, çì memiia ye' tö be' a i' tã?

<sup>38</sup>Erë Esaú tö ikí ché iyé a:

—A yéwö çbe' er buaë chöke sa' a e' dör etkè? ¡Ye' a er buaë chó ñies! Etã Esaú iéka taië.

<sup>39</sup>Isaac tö iché ia:

“Be' serdaë wé mò wöli kè tã taië ese ska'.

Eë be' dalikua kè wörpa buaë.

<sup>40</sup>Be' ñippöraë tabè wa o'ka tã íiyi kuëki, e' mik be' serdaë.

Be' döraë be' ël kanè mésoie.

Erë mik be' ñippémi ie' tã,

etã be' e' yörattsã ie' ulà a.”

### Jacob tkashkar Esaú yöki

<sup>41</sup>Isaac er buaë ché Jacob a Esaú skéie. E' kuëki Esaú éna suluë Jacob arke. Ie' ibikeitsé: “Ye' yé duökewatke. Mik iduowã e' kéwö tka, etã ye' ël tterawayö.”

<sup>42</sup>Mik Rebeca wã ijchenewã tö Esaú tö iël bikeitsé ttèwã, etã Jacob tsuk patkéitö tã iché ia:

—A alà, ittsó. Be' ël Esaú e' pablöke tö ie' be' tterawã. <sup>43</sup>E' kuëki ye' ttò ttsó. Be' tkóshkar bet ye' akè kiè Labán serke Harán e' u a. <sup>44-45</sup>Be' e' tsúat ie' ska' ká taië dò mik be' ël er buanene be' ki ena i sulu wamblébö e' chowane ie' éna etã. E' ukuöki tã ye' tö be' tsuk patkeraë, e' wa be' döne. ¡Ye' kè ki ikiane tö ye' ala'r bül e' duòwã diwö etkè a!

<sup>46</sup>E' ukuöki tã Rebeca tö iché Isaac a:

—Esaú alakölpa dör hititawak e'pa tö ye' shtriwétke taië. Jacob senéwã alaköl ese tã, e' tã ye' mú duòwã.

**28** <sup>1</sup>Etã Isaac tö Jacob kié tã ishke'wéitö tã ichéitö ia:

—Kè be' senukwã canaánwak tã. <sup>2</sup>Be' yú be' duöchke kiè Betuel serke Padán-aram e' ska'. Eë be' senúwã be' nau Labán alà busipa e' eköl tã. <sup>3</sup>Skököl Diché Tã' Íyi Uli-tane Tsatã as e' er buaë chò be' a. Ñies as ie' tö be' aleripa alöü taië ká wa'ñe. <sup>4</sup>Ie' tö iyè'atbak Abraham a tö ká i' meraëitö ie' a. E' ki se' serke shkal. As ie' er buaë chò be' a ena be' aleripa a wes ie' er buaë yé' Abraham a es as ká i' dò a' ulà a.

<sup>5</sup>Es Isaac tö Jacob patkémi Padán-aram. Jacob demi inau Labán ska'. Labán dör arameowak kiè Betuel, e' alà. Ie' dör Rebeca akè. Rebeca dör Jacob ena Esaú e'pa mì.

### Esaú senéwã Mahalat tã

<sup>6</sup>Esaú wã ijchenewã tö Isaac er buaë ché Jacob a ñies tö ipatkémii-tö ká kiè Padán-aram senukwã eë.



Ñies ie' wā ijchenewā tō mik iyé er  
bua' ché Jacob a etā ichéitō iā:

—Kè be' senukwā canaánwak tā.

<sup>7</sup>Ñies ie' wā ijchenewā tō Jacob  
mía ká kiè Padán-aram wes iyé  
ena imì tō iché iā es. <sup>8</sup>Es ie' éna  
iane tō iyé kè kī ikiane tō ie'pa  
serwā canaánwakpa tā. <sup>9</sup>E' kuēki  
ie' mía alaköl skà yulök Ismael dör  
Abraham alà e' ska'. Ee ie' senéwā  
Ismael alà busi kiè Mahalat e' tā,  
e' dör Nebaiot kutà. Es alaköl kī  
tséwāitō eköl e' kè dör canaánwak  
wes imalepa es.

### Jacob kabsué Betel

<sup>10</sup>Etā Jacob e' yéttsā Beerse-  
ba michoë Harán. <sup>11</sup>Ie' michoë  
wé katuine ikī tā ee ikapere. Ák  
méwāitō wōkir kataie, e' kī ie'  
kapöwā. <sup>12</sup>Ee ie' kabsué. Ie' isué tō  
klökata batsië tkër iski ibata dōka  
ká jai a. E' kī ie' isué tō Skëköl  
biyöchökwakpa shkōke wō'k wa'k.  
<sup>13</sup>Ñies ie' isué tō Jehová dur ie'  
ō'mik tā ichéitō iā: “Ye' dör Jeho-  
vá. Ye' dör be' talà, Abraham, ena  
be' yé, Isaac, e'pa Këköl. Ká i' wé  
be' tēr, e' meraëyö be' a ena be'  
aleripa a. <sup>14</sup>Ie'pa alördaë taië wes  
ká po es. Ie'pa michoë senuk ká  
wa'ñe. Ye' er buaë chōraë ká ulita-  
ne wakpa a be' ena be' aleripa e'pa  
batamik. <sup>15</sup>Ye' tso' be' tā. Ye' tō be'  
kkö'neraë ká wa'ñe wé be' mir ee.  
Be' dörane ye' wā ká i' kī. Kè yö  
be' we'ikepa. Ttè kōs méyö be' a, e'  
waweraëyö es.”

<sup>16</sup>Mik Jacob tī'neka, etā ie' ibi-  
keitsé: “Mokī Jehová tso' ká i' kī, e'

kè jcher ye' wā.” <sup>17</sup>Taië ie' suane tā  
ibikeitséitō: “Ká i' dör batse'r taië.  
iíe dör Skëköl wé! iíe dör ká jai  
wékkö!”

<sup>18</sup>Bule es tā Jacob e' kékā bla'mi.  
Ák méwāitō iwōkir kataie, e'  
kékāitō duékaatitō iwà kkachoie tō  
ká e' dör batse'r. Kiò téitō ák bata  
kī iwà kkachoie tō ká e' tso' Skëköl  
dalöioie. <sup>19</sup>Ká e' kiè mane'wéttsane  
ie' tō Betel\* Kewe tā ká e' kiè Luz.

<sup>20</sup>Ee ie' tō ittè mé Jehová a i'  
es: “Be' tso' ye' tā ena ye' kkö'né  
be' tō i' ye' mir etā, ena be' tō chkè  
ena datsi' mé ye' a, <sup>21</sup>ñies ye' dene  
buaë ye' yé ska', e' kōs wébö ye'  
a, e' tā be' klö'weraëyö ye' Këkö-  
lie. <sup>22</sup>Ák duékayö i', e' dör iwà  
kkachoie tō ié be' dalöiërdaë. A  
Skëköl, i kōs mekebö ye' a, e' mú  
blatèsö dōka dabop tā e' tsá eyök  
meraneyö be' a.”

### Jacob demi Labán ska'

**29** <sup>1</sup>E' ukuökī tā, Jacob  
mía pè' serke diwö tskir-  
ke e' ëka. <sup>2</sup>Ee ie' tō di' tum biule  
sué et kañikā. E' pamik obeja  
daparke mañayök enuk ee di' e'  
yekerakitō e' kuēki. Di' tum biule  
kkò kī ákkue bërie me'r et. <sup>3</sup>Iyiwak  
kkö'nukwakpa wöblanewatke tō  
as iyiwak ulitane daparka ee, e'  
ukuökī tā ákkue skeuke di' tum  
biule kkò kī as iyiwak di'yò. Iyiwak  
di'yane one tā ie'pa tō ikkò pabaké-  
wane ákkue wa. <sup>4</sup>Jacob tō iyiwak  
kkö'nukwakpa a ichaké:

—A yamipa, çká wé wakpa a'  
dör?

\* 28.19 *Betel*: Hebreoie kiè e' wà kiane chè *Skëköl wé*.

Ie'pa tö iiüté:

—Sa' dör Harán wakpa.

<sup>5</sup>Ie' tö iskà chakéne:

—¿A' wā wēm kiè Labán dör Nahor alà, e' suule?

Ie'pa tö iiüté:

—Tó, e' suule sa' wā.

<sup>6</sup>Ie' tö ichaké:

—¿Is ie' tso'?

Ie'pa tö iiüté:

—Ie' tso' bua'. Isaú. Wì busi datse e' dör ie' alà kiè Raquel e'. Ie' datse iyé iyiwak wëttsé.

<sup>7</sup>Ie' tö iché:

—Ká tso'ia ñiwe. Diwö tso'ia kakkéë iyiwak dapa'wowa ek tsiní. Ì kuëki a' kè tö di' mè ia tã ièmírak chkök.

<sup>8</sup>Erë ie'pa tö iiüté:

—Kè sa' a e' wamblënu. Sa' kawöta ipanuk. Mik obeja de seraa, eta sa' tö di' tum kkò ppekeka tã di' meke sa' tö iyiwak a.

<sup>9</sup>Ie' ttöke ie'pa tã, e' dalewa Raquel debitü iyé iyiwak wëttsé, ie' dör iyé iyiwak kkö'nukwak e' kuëki. <sup>10</sup>Jacob tö Raquel sué inau iyiwak wëttsé, e' bet ie' tunemi di' kkò kéka tã iyiwak a di' méitö. <sup>11</sup>E' ukuökj tã Raquel shke'wéitö wöalatséitö tã ie' jékaie ttsé'ne buaë kuëki. <sup>12</sup>Ie' tö iché ia: “Ye' dör Rebeca alà ena Labán nauyö.” E' bet tã Raquel tunemi ichök iyé a.

<sup>13</sup>Mik Labán tö inauyök tté ttsé, eta bet itunemi inaletsuk. Ipaklö'wéwaitö tã iwöalattséitö tã imítser iwā iu a. Ì kos tka Jacob tã e' pakéitö inau a. <sup>14-17</sup>Tã Labán

tö iché ia: “Mokië be' dör ye' yami ekka.”

**Jacob senéwā Lía ena Raquel tã**

Labán alà busi bö, ikibi ék kiè Lía, itsirla ék kiè Raquel. Lía wöbla e' kè dör buaala\* erë Raquel dör buaala wa'ñe.

Jacob sené Labán ska' dò si' et. E' ukuökj tã Labán tö iché ia:

—Be' dör ye' yami, erë be' kè kawöta kaneblök ye' a éme. Ichö ña ¿kos be' tö ye' ña'wëmi?

<sup>18</sup>Jacob wöbatse Raquel wa, e' kuëki ie' tö Labán iüté:

—Be' tö kawö mé ye' a senukwā Raquel tã, e' tã e' skéie ye' kaneblöke be' a döka duas kul.

<sup>19</sup>Labán tö iiüté:

—Ye' a tã e' dör buaë. Be' je' a ye' tö imèmi buaë. Ye' kè éna imak o'ka a. Be' e' tsúat ye' ska'.

<sup>20</sup>Es Jacob kaneblë' döka duas kul Raquel dalërmik. Erë ie' kj Raquel kiane taië, e' kuëki kawö ekké e' ttséitö ká bërber è. <sup>21</sup>Mik duas kul tka, eta Jacob tö iché Labán a:

—Kawö yè'yö be' a, e' detke. Kawö mú ye' a senukwā be' alà busi Raquel tã.

<sup>22</sup>Etã Labán tö sulitane a ishkeñé tö a' shkó ulabatsè e' kéwö tkö'uk. <sup>23</sup>Erë katuine, e' shuā Lía mí ie' wā Jacob a Raquel skéie tã Jacob kapé ie' tã. <sup>24</sup>Labán tö ikanè méso eka kiè Zilpá, e' me'tke Lía a ikanè mésoie. <sup>25</sup>Bule es bla'mi tã Jacob tö isuéwā tö e' dör Lía. Ie' mía Labán ska' tã ichéitö ia:

\* 29.14-17 Lía wöbla e' kè dör buaala: Hebreoie tté e' wà kè jcher se' wā bua'iewā. Isalema e' wà kiane ché Lía wöbla dör buaala.

—¿Ì wamblé be' tò ye' ta? Ye' kanéblé be' a Raquel dalèrmik. ¿Iók be' tò ye' kītō'wé es?

<sup>26</sup>Labán tò iiüté:

—Íe sa' wöblar tò alà busi kibi ese serkewā kewēie, e' itōkī itsir-la ék. <sup>27</sup>Se' kawōta Lía ulabatsōke e' kéwō tkō'uk dōka ká kul. Mik kéwō e' tka, etā ye' tò be' a Raquel meke ñies. Erē be' kawōta skà kanéblökne ye' a duas kul Raquel dalèrmik.

<sup>28</sup>E' dör buaē Jacob a. Mik Lía ulabatsè kéwō e' diwō tka, etā Labán tò Raquel mé Jacob a alakölie ñies. <sup>29</sup>Ñies ie' tò ikanè méso eka kiè Bilhá e' mé Raquel a ikanè mésoie. <sup>30</sup>Es Jacob senéwā Raquel ta ñies. Eré ie' kawōta kanéblökne skà Labán a dōka duas kul, erē ie' éna idalēr kibiie Lía tsata.

#### Jacob ala'r

<sup>31</sup>Jehová tò isué tò Jacob kè kī Lía kiane bua'ie. E' kuēkī Lía a alà méitō. Erē Raquel kè dōta' alàè.

<sup>32</sup>Lía dunekā alà kune ta ie' tò iché: “Ye' eriarke taiē e' sué Jehová tò, e' kuēkī i'ñe ta ye' dalërdaē ye' wēm éna.” E' kuēkī ikiè mékaitō Rubén.\*

<sup>33</sup>E' ukuökī ta ie' alà skà kune eköl ta ichéitō: “Ye' wēm kè tkine ye' kī e' sué Jehová tò e' kuēkī alà skà méitō ye' a.” E' kuēkī ikiè mékaitō Simeón.\*

<sup>34</sup>Ie' alà skà kéka ta ichéitō: “Ire' ye' ala'r deka mañal e' kuēkī ye' wēm éna ye' dalèrmi kibiie.” E' kuēkī ikiè mékaitō Leví.\*

<sup>35</sup>E' ukuökī ta ie' alà skà kéka ta ichéitō: “I'ñe ta ye' tò Jehová kīkekeka.” E' kuēkī ikiè mékaitō Judá.\* Etā ekkē è ie' alà dē'.

#### Raquel ala'r

**30** <sup>1</sup>Mik Raquel tò isué tò ie' kè dò alàè, etā ie' sibineka iël kī. Ie' tò iché iwēm a:

—Be' kè tò ye' a alà mè, e' ta ye' duōrawā.

<sup>2</sup>Jacob uluneka ie' kī ta ichéitō ia: —Ye' dör Skököl kalī, e'ma ye' a alà mermi be' a. Ie' wák tò be' méat kè dò alàè.

<sup>3</sup>Ie' tò iiüté:

—Ittsó, ye' kanè méso kiè Bilhá, e' ta be' senú. Mik ie' alà kéka etā e' dör wes ye' alà es. Es ye' dōraē alàè ie' batamik.

<sup>4</sup>Es ie' tò ikanè méso Bilhá e' mé iwēm a alakölie, e' ta Jacob sené.

<sup>5</sup>Ie' ta Jacob alà kéka. <sup>6</sup>Raquel tò iché: “Skököl tò ye' tsatké buaē. Ie' tò ye' ttō ttsé ta alà méitō ye' a wēm.” E' kuēkī ie' tò ikiè méka Dan.\*

<sup>7</sup>E' ukuökī ta Bilhá alà skà kune Jacob ta. <sup>8</sup>Raquel tò iché: “Ye' ñippé taiē ye' èl ta etā ye' e' aléka iki.” E' kuēkī ikiè mékaitō Neftalí.\*

\* 29.32 *Rubén*: Hebreoie s'kiè e' wà kiane chè ye' eriane e' suéitō.

\* 29.33 *Simeón*: Hebreoie s'kiè e' wà kiane chè ittsök.

\* 29.34 *Leví*: Hebreoie s'kiè e' wà kiane chè ñita.

\* 29.35 *Judá*: Hebreoie s'kiè e' wà kiane chè Skököl kīkèkasö.

\* 30.6 *Dan*: Hebreoie s'kiè e' wà kiane chè Skököl tò s'tsatké buaē.

\* 30.8 *Neftalí*: Hebreoie s'kiè e' wà kiane chè ñippök.

<sup>9</sup>Mik Lía tö isué tö ie' kè dè'ia alàè, età ie' tö ikanè méso kiè Zilpá, e' mé Jacob a alakölie. <sup>10</sup>Zilpá alà kéká Jacob tá. <sup>11</sup>Lía tö iché: “iEdaa ì mène ye' a!” E' kuëki ilà kiè mékaitö Gad.\*

<sup>12</sup>E' ukuöki tá Zilpá alà skà kéká Jacob tá. <sup>13</sup>Lía tö iché: “iYe' ttsè'r buaè! Ire' alakölpa kôs tö icheraè tö be' ttsè'r buaè.” E' kuëki ilà kiè mékaitö Aser.\*

<sup>14</sup>Trigo wö alirke e' késka' tá Rubén mía kañika. Eë ie' tö kalwö kiè mandrágora\* e' alí kué. E' bite iwá imì Lía a. Mik Raquel tö kalwö e' sué tá ichéitö Lía a:

—Be' we'ikèyö, kalwö debitu be' alà wá be' a, e' kakmú ña.

<sup>15</sup>Lía tö iiuté:

—¿Be' kè a wè' idir tö be' wá ye' wëm mítser? iKíie tá be' éna kalwö debitu ye' alà wá ye' a, e' yaktsá ye' ulà a!

Erë Raquel tö iché ia:

—Kalwö e' skéie i'ñe nañewe ye' wëm patkekeyö be' tá kapök.

<sup>16</sup>Katuirketke tá Jacob tso' kaneblök e' debitu tá Lía mía iñaletsuk tá ichéitö ia:

—Ye' tö ye' alà mandrágora e' mé Raquel a, e' skéie be' kawöta kapök ye' tá i'ñe nañewe.

E' nañewe Jacob kapé ie' tá. <sup>17</sup>Etá Skéköl tö Lía ttò ttsé tá iduneka tá

ilà skà kune Jacob tá. Es ie' alà deka skel. <sup>18</sup>Lía tö iché: “Ye' tö ye' kanè méso mé ye' wëm a e' skéie Skéköl ye' a alà i' mé.” E' kuëki ilà kiè mékaitö Isacar.\*

<sup>19</sup>E' ukuöki tá Lía alà skà kéká Jacob tá, e' tá ideka teröl. <sup>20</sup>Ie' iché: “Skéköl tö ye' a ì buaè kakmé. Ire' ye' ala'r de teröl. E' kuëki ye' wëm éna ye' dalërdaè jaishet.” E' kuëki ilà kiè mékaitö Zabulón.\*

<sup>21</sup>Bata ekké tá ie' alà skà kune alaköl. E' kiè mékaitö Dina. <sup>22</sup>Erë ñies Raquel kímé Skéköl tö. Ie' tö ala'r mé ia wës Raquel tö ikié ia es. <sup>23</sup>Ie' duneka tá ilà tsá kune kiè mékaitö José. Ie' tö iché: “Ye' jaëne! siarè e' yéttsá Skéköl tö ye' ki. <sup>24</sup>Jehová mú tö ye' a alà kí mè ia eköl.” E' kuëki ikiè mékaitö José.\*

### Jacob iyiwak alöne taië

<sup>25</sup>José kune e' ukuöki tá Jacob tö iché Labán a:

—Ye' ómine ye' kaska'. <sup>26</sup>Ye' alakölpa ena ye' ala'r e'pa mú ye' a as imi'rak ye' tá. Ye' kaneblétke be' a ie'pa skéie. Be' wá ijcher buaè tö kôs ye' kaneblé be' a.

<sup>27</sup>Erë Labán tö iiuté:

—Be' we'ikèyö. Be' e' tsúatia senuk ye' ska!. Ye' tö itötké tö Jehová er buaè ché ye' a be' batamik. <sup>28</sup>Ichó ña kôs be' ki inuköl kiane

\* 30.11 Gad: Hebreoie s'kiè e' wà kiane ché *kawö buaè mène*.

\* 30.13 Aser: Hebreoie s'kiè e' wà kiane ché *ittsè'r buaè*.

\* 30.14 *mandrágora*: Ká e' kèwöska tá ie'pa tö ibikeitseke tö mandrágora wö katé alakölpa tö, e' tá e' tö ie'pa kímèmi dök alàè.

\* 30.18 Isacar: Hebreoie s'kiè e' wà kiane ché *ské*.

\* 30.20 Zabulón: Hebreoie s'kiè e' wà kiane ché *kakmeule*.

\* 30.24 José: Hebreoie s'kiè e' wà kiane ché *ilè kímú*.

be' kanè skéie, e'ma ekkë ye' be' patuèmi.

<sup>29</sup>Ie' tò iiüté:

—Be' wà ijcher tò ye' kanéblé buaë be' a. Nies ye' tò be' iyiwak kkö'né buaë be' a. <sup>30</sup>Mik ye' dë'bitu be' ska', età be' kè wà ì ku' taië. I'ñe tà be' wà iyi tso' taië. Jehová er buaë ché be' a ye' kuëki. Erë ðmik ye' kanéblömi ye' wák a? Ye' wöché yamipaë.

<sup>31</sup>Labán tò iskà ché ia:

—¿Kos be' ki ikiane tò be' patuèyö?

Ie' tò iiüté:

—Be' kè tò ye' patauk. Erë ì chekeyö be' a e' iütó, e' tà ye' tò be' iyiwak kkö'nemi. <sup>32</sup>I'ñe ye' mi'ke be' iyiwak shushtök. Obeja kos dalolo ena chibo kos wöaule shkitshkit ö ulaula ese klö'wekeyö ye' wák a e' patuoie. <sup>33</sup>Mik be' de ye' iyiwak sauk tà ee be' isuèmi tò obeja dalolo ö chibo wöaule shkitshkit ö ulaula ese è tso', e' tà be' wà ijcherwami tò ye' dör wëm yësyësë. E' kè dör es, e' tà be' wà ijcherdaë tò ye' tò be' iyiwak ekiblë.

<sup>34</sup>Labán tò iiüté:

—Tó, buaë idir. Iüsö wes be' iché es.

<sup>35</sup>Erë e' diwö shà tà ie' mía ie' iyiwak shushtök. Ie' chibo kos tso' wöaule skëkshkëk ö ulaula ese yéluritö. Nies ie' obeja kos tso' dalolo ese yéluritö tà iméitö ila'r wëpa a kkö'nè. <sup>36</sup>E' ukuöki tà iyiwak yélur ie' tò e' wëttsë ie' mía shkè dò ká mañat Jacob yöki. Età Jacob kawöta Labán iyiwak malepa e' kkö'nuk.

<sup>37</sup>Erë Jacob tò kal kuä'ki kuä'ki dò mañalka e' ulà aki téë. Elka

kiè álamo, skà kiè almendro, skà kiè castaño. Kal ulà kkuölit takla jchëloritö as iwër wöaule saruru skëkshkëk. <sup>38-39</sup>E' ukuöki tà kal ulà e' tuléwaitö wé iyiwak daparke di'yök e' wöshaë. Eë iyiwak wöbatsöke ñi wa. Iyiwak wöbatsöke ñi wa kal ulà ñe' wöshaë e' ala'rla kos tskirke wöaule skëkshkëk ö shkitshkit ö ulaula. <sup>40</sup>Iyiwak tskirke wöaule e' kos dapa'wëitö bánet ie' wák a. Ese wë'ñe kos uyéwaitö Labán iyiwak kos wöaule ö dalolo ese a as itskir wöaule ö dalolo. Es ie' iyiwak alörke taië bánet, kè ku' Labán icha tà ñita. <sup>41</sup>Mik iyiwak bua'buä ese wöbatsöke ñi wa, età ie' tò kal ulà ñe' tuléwa wé iyiwak di' yöke eë. Es ie'pa tò kal ulà wöaule e' sué mik iwöbatsöke ñi wa e' dalewa. E' ala'rla tskirke kos e'pa dör wöaule. <sup>42</sup>Erë mik iyiwak sí po ese datse, età ie' kè tò kal ñe' tuléwa. E' kuëki iyiwak sí po ese ala'rla kos tskirke e' dör Labán icha. Erë wé bua'buä ese dör ie' icha. <sup>43</sup>Es ie' de iyi blú taië. Obeja ena kanè mésopa wëpa ena alakölpa ñies kameio ena burro e' kos tso' ie' wà taië.

#### Jacob tkakshkar Labán yöki

**31** <sup>1</sup>Erë Jacob tò ittse tò Labán ala'r dulakölpa tò icheke: “Jacob tò se' yé iyi kos e' klö'wéwa, e' wa ie' e' blu'wé taië.” <sup>2</sup>Nies ie' tò isué tò Labán kè tò ie' suëia buaë wes kenet es. <sup>3</sup>Età Jehová tò ie' a iché: “Be' yüne be' yépa kaska' wé be' yamipa tso' eë. Ye' michoë be' tà be' kkö'nuk.”

<sup>4</sup>Jacob tò Raquel ena Lía tsuk patké dò wé ie' tso' obeja wëttsë eë <sup>5</sup>tà ichéitö ia:

—Ye' wā ijchenewā tō a' yé kè kī ye' kianeīā wēs kenet es. Erë ye' yé e' Këköl tso' ye' tā kekraë ye' kīmuk. <sup>6</sup>A' wā ijcher buaë tō ye' kanéblé a' yé ā mokī. <sup>7</sup>Erë ie' tō ye' kītō'wé kekraë ye' kané ské wa. Erë Skëköl kè wā ie' ā ikéwō mène ās ì sulu wamblòitō ye' kī. <sup>8</sup>Mik ie' tō ye' ā iché: “Ye' be' patueke iyiwak wöaule shkitshkit ese wa”, etā iyiwak ulitane pane wöaule shkitshkit ème. Mik ie' tō ye' ā iché: “Ye' be' patueke iyiwak wöaule shkëkshëk ese wa”, etā iyiwak ulitane pane wöaule shkëkshëk ème. <sup>9</sup>Es Skëköl tō a' yé iyiwak yè'lur mè ye' ā.

<sup>10</sup>“Iyiwak wöbatsöke ñi wa e' kéwö ska' tā ye' kabsué tō iyiwak wè'ñe wöbatsöke iláki wa, e' kōs wák dör wöaule shkëkshëk ena shkitshkit ena ulāulā. <sup>11</sup>Kabsuë e' ā, Skëköl biyöchökwak ye' chaké ye' kiè wa tā ye' iūté: ‘¿Ì?’ <sup>12</sup>Ie' ye' ā iché: ‘Isāú bua'ie tā be' isuëraë tō iyiwak wè'ñe wöbatsöke iláki wa, e' kōs dör wöaule shkëkshëk ena shkitshkit ena ulāulā. Ì sulu kōs wamblé Labán tō be' kī, e' suéyö, e' kuëkī ye' tō iwé es. <sup>13</sup>Ye' dör Këköl dè'bitū be' wörkī ká kiè Betel eë e'. Eë be' tō ák du'kaāt ye' dalöioie. Eë be' tō kawö me' ye' ā. Be' e' kóka bet, be' e' yóttā ká i' ā. Be' yúne wé be' kune ee.’”

<sup>14</sup>Etā Raquel ena Lía e'pa tō iūté: —Kè sa' ā sa' yé daliukuö tā'ia. <sup>15</sup>Ñies sa' sué sa' yé tō suluë wēs o'ka es. Kíie tā sa' watō'ttsaitō be' ā, sa' ské klöo'itō buaë e' ewéwaitō yës. <sup>16</sup>E'ma kōs Skëköl tō iyi yè'lur sa' yé ulā ā, e' dör sa' icha ena sa'

ala'r icha. E' kuëkī ì kōs ché Skëköl tō be' ā e' iūtó.


### Jacob e' yéttsā Padán-aram

<sup>17-18</sup>E' ukuökī tā Jacob tō ila'r ena ilakölpa e'pa ké e' tkökka kameio kī. Ie' iyiwak kōs ena ie' iyi kōs dè' ie' ulā ā Padán-aram ikanè skéie, e' patkémiiitō keweie ie' yökī. Etā ie' e' yéttsā micho iyé Isaac ska' Canaán. <sup>19</sup>Labán míā ká bānet ioveja köyök tōk, e' dalewa ie' wā iyi diököl tso' dalöie e' kōs bléwami Raquel tō. <sup>20</sup>Jacob kè wā iyëne Labán ā tō ie' mi'keā. Es ie' tō ikité buaë. <sup>21</sup>Ie' tkashkar. Íyi tso' ie' wā e' kōs wëttsë. Bet tā ie' tkattā di' kiè Éufrates, e' wīshet. Eë tā ie' micho ká kiè Galaad e' ká köwö kī.

### Labán tō Jacob tötíé

<sup>22</sup>Jacob bakshkar e' kī ká de mañat, etā Labán wā ijchenewā tō ie' bakshkar. <sup>23</sup>Etā ie' míā itökī iyamipa tā. Ká de kul tā ie' tō ikué Galaad ká köwö kī. <sup>24</sup>E' nañewe Labán kabsué tō Skëköl de ie' wörkī tā ichéitō ia: “Ye' ttò ttsó. Kè be' kàne ttök Jacob tā kësik wa.”

<sup>25</sup>Ie' de wé Jacob úla tulus Galaad ká köwö kī eë. Eë ie' ena iyamipa, e'pa tō iúla tuléka kapo-waie ñies. <sup>26</sup>Ie' tō iché Jacob ā: —¿Ì wamblé be' tō i' es? ¿Íók be' tō ye' kītō'wé i' es? Be' wā ye' alā busipa bitetser wēs ñippökwakpa tō s'tsèmi es. <sup>27</sup>¿Ì kuëkī be' ye' kītō'wé? Be' tkashkar akir ye' yökī. Be' e' biyó chópa ye' ā, e'ma kawö buaë tkö'wé ye' tō a' wëttsë ttsëne buaë wa, ma'ma kicha tā' ese wa



*Jacob yamipa úla tuléka kapowaie. (Génesis 31.25)*

ena sabak blar buaë ese wa. <sup>28</sup>Kè be' wà kawö méne ye' a ena ye' ala'r busipa ena ye' duöchkepa e'pa a as sa' e' chòat ñi a. Be' tō iwamblé wēs pē' suluē es. <sup>29</sup>Ye' wà diché tso' a' ulitane tsajioie buaë, erë eniã nañewe be' yé e' Kèköl tō ye' a iché: 'Ye' ttò ttsó. Kè be' kàne ttök Jacob tã kèsik wa.' <sup>30</sup>Be' mitkene be' yé u a wēs be' kī ikiane tajë es, etã Ìie be' tō ye' wà iyi diököl tso' dalöiè e' ekiblè?

<sup>31</sup>Etã Jacob tō iitüté:

—Ye' suane be' yökī. Ye' ibikeits dö' be' ye' yökī be' ala'r busipa yèttsane er sulu wa. <sup>32</sup>Yi wà be' iyi diököl tso' dalöiè e' tso', e' tã as e' wák duòwã. Se' yamipa kōs tso' íe se' sauk, e'pa wörki be' yú be' iyi yulök. E' kuébö, e' tã itsúmi.

Erë ie' kè wà ijcher tō Raquel tō iyé iyi diököl e' blé'wabitu.

<sup>33</sup>Etã Labán tkawã Jacob úla a ie' iyi yulök. E' ukuökī tã ie' tkawã Lía úla a. Nies Lía ena Raquel kanè

mésopa bōl e'pa úla shuyulítō. Erë kè ie' wà ikune. Ie' e' yéttsã Lía úla a mía Raquel úla shuyulök. <sup>34</sup>E' dalewa Raquel tō iyé iyi diököl bléwã kameio tsikküö dikia tã ie' wák e' tkéka ibata kī. Labán tō ie' úla ulitane shuyulé erë kè iwã ikune yēs. <sup>35</sup>Raquel tō iché ia:

—A yéwö, kè be' ulunuk ye' kī. Ye' e' kōkami be' wörki, erë ye' duöke sik duè wã.

Labán tō ie' iyi diököl yulé tajë. Erë kè ie' wà ikune. <sup>36</sup>E' kuëki Jacob ulunekã tajë tã ichéitō Labán a:

—Ì sulu wambléyö be' kī, e' kuëki be' ye' tōtié dò íe? <sup>37</sup>Be' tō ye' iyi kōs e' shuyulé tã Ìbe', ì kuébö? E' tuló íe se' yamipa wörki as ie'pa tō ichò tō yi ttè dör mokíe, be' ö ye'. <sup>38</sup>Ye' kaneblé' be' a duas dōkã dabom böyök (20), e' dalewa tã be' chibo ena be' obeja e' kōs tskirke bua'buáë. Be' iyiwak bobokpa kè tkëulettsã yēs. Nies kè

ye' wā be' obeja pupula è kataule-wa. <sup>39</sup>Namu tö be' iyiwak ttéwā, e' tã kè ye' wā inú dë'bitū. E' nuí pato' ye' tö be' ā. Ñiwe ö nañewe be' iyiwak ekiblélur akblökwakpa tö, e' patauk be' tö ye' ka'. <sup>40</sup>Ñiwe ye' tteke kaba tö. Nañewe tã ye' tteke kase tö. Kè ye' kapowā buaë. <sup>41</sup>Ye' kanëblë' be' ā duas dabom böyök (20) etā es ye' bak weinuk këkraë. Ye' kanëblë' duas dabom eyök kī tkël (14) be' alà busipa dalërmik. E' ukuökī tã ye' skà kanëblë' duas teröl be' iyiwak kuëkī, erë be' bak ye' kitö'uk këkraë ye' kanë ské wa. <sup>42</sup>Abraham ena ye' yé Isaac e'pa Këkök kè kúpa ye' tã, e' ma be' ye' patkë'bitū ulà wöchka. Erë Skëkököl tö isué tö ye' siarla, e' kanëblë' tajë, e' kuëkī ie' tö be' wöuñé eniā nañewe.

**Jacob ena Labán e'pa  
kawö mé ñi ā**

<sup>43</sup>Etā Labán tö Jacob iüté:

—Be' alakölpa dör ye' alà busipa. Be' ala'r dör ye' duöchkepa. Obeja kos e' dör ye' icha. Ì kos suëbö ië, e' dör ye' icha è. ¿Wes ye' ā ye' alà busipa ena ye' duöchkepa e'pa ormi? <sup>44</sup>E' kuëkī be' shkó. Mishka kawö muk ñi ā. Es se' wā ijcherdaë tö wes se' kawötā ñi dalöiök.

<sup>45</sup>Eë tã Jacob tö ák duéka ek ie'pa kawö muke ñi ā e' wà kkachöie. <sup>46</sup>Ie' tö iché iyamipa ā:  
—Ák dapa'ú ië.

Ie'pa ulitane tö ák dapa'wé tã ichkérak ák dapaule e' o'mik. <sup>47</sup>Etā

Labán tö ká e' kiè méka iwák ttö wa “Jegar Sahadutá”. Ñies Jacob tö ikiè méka iwák ttö wa “Galaad.”\*

<sup>48</sup>Labán tö iché:

—I'ñe ák ikkë dapa'wéatsö kawö mésö ñi ā e' wà kkachöie.

E' kuëkī Jacob tö ká e' kiè méka es. <sup>49</sup>Ká e' kine ñies Mispá, wà dör tö Labán tö iché:

—Mik kè se' ñi suneia, etā as Jehová tö se' saú tö wes se' ñi wamblöke. <sup>50</sup>Be' tö ye' ala'r busipa we'iké ö be' senéwā alakölpa kuä'kī tã, e' tã e' suëraë Skëkököl tö. Eré kè yi ku' e' sauk chène ye' ā, erë Skëkököl wák tö isuëraë.

<sup>51</sup>Etā Labán tö ikí ché Jacob ā:

—Ák dur i' ena ák dapaule i' e' dapa'wéyö se' böl shushaë. <sup>52</sup>Ák dur i' ena ák dapaule i' e' dör se' böl ā iwà kkachöie tö ië è se' kawötā dökwa. Kè ye' tköpami be' kker ñippök be' tã. Ñies kè be' tköpami ye' kker ñippök ye' tã. <sup>53</sup>Abraham dör be' duöchke ena Nahor dör ye' duöchke, e'pa Këkököl eköl è, as e' tö se' shulö.

Etā Jacob tö kawö mé mokië Labán ā Skëkököl dalöieke iyé Isaac tö e' wörki. <sup>54</sup>E' ukuökī tã ie' tö iyiwak jché ña'wé Skëkököl dalöioie eë. Ie' tö iyamipa kié chkök. Ie'pa ulitane chké tã ikaperö eë.

<sup>55</sup>Bule es bla'mi tã Labán tö iduöchkepa ena ila'r busipa e'pa wöalattsé e' choat ie'pa ā. Ie' tö iché iarak: a' mú kawö tkö buaë këkraë. E' ukuökī tã imichone ikaska'.

\* 31.47 *Galaad*: Ká e' kiè dör böt erë iwà kiane chë ñies. E' dör ák dapaule kawö mène e' wa kkachöie.



Jacob tò Esaú ma'wé er bua'wè

**32** <sup>1</sup>E' ukuökì tã Jacob mir è wé imírö eë. Ñala kî Skëköl biyöchökwakpa de ie' ska'.

<sup>2</sup>Mik e'pa suéitö, etã ichéitö: “I'pa dör Skëköl ñippökwakpa.” E' kuëkî ie' tò ká e' kiè mékã Mahanaim.\*

<sup>3</sup>Etã ie' tò ikanè mésopa patkémî biyò muk ie' èl Esaú a tò ie' datse. Ie' èl serke ká kiè Seír atë Edom eë. <sup>4</sup>Ie' tò ichémi ikanè mésopa a: “A' tò ichó ye' èl a: ‘Be' èl Jacob datse be' wökî be' kanè mésoie. Ie' tò ichébitu be' a: Dwas ikkë kôs ye' sené Labán ska'. <sup>5</sup>Ye' wã baka tso' ena obeja tso' ena burro tso' taië. Ñies kanè mésopa tso' ye' wã taië wëpa ena alakölpa. Be' dör ye' këkëpa. Be' a ttè i' patkémîyö as be' tò ye' kiöwã er bua' wa.’ ”

<sup>6</sup>Mik ibiyò wakpa dene, etã ie' a ichéitö:

—Sa' dare be' èl ska', e' wák datse bet be' shké'uk. Etã ie' wã wëpa datse e' tã dökã cien tkëyök (400).

<sup>7</sup>Mik e' ttséitö, etã taië ie' suane. Taië ie' kabikeitséka wes ye' e' ùmi. E' kuëkî ie' tò iyamipa ena ikanè mésopa ena iobeja ena ibaka ena ikameio e' kôs blabatsélor böl tsíní. <sup>8</sup>Ie' ibikeitsé tò isalema ye' èl ñippòmi ek tsíní tã, e' dalewa iëk tsíní tköshkarmirak. E' kuëkî ie' iblabatsélor es. <sup>9</sup>E' ukuökî tã ie' tò iché Skëköl a: “A Jehová, be' dör ye' talà Abraham ena ye' yé Isaac e'pa Këköl. Be' ye' a iyë': ‘be' yúne be' yamipa ska', etã ye' tò be' kimeræ as be' kawö tkò buaë.’

<sup>10</sup>Be' er bua' ché ye' a. Be' kè wã ye' meatule bërbër è. Warma e' kè dör ye' siarla e' a. Ye' bakmi di' Jordán wì a kè wã ì tã', e' kèwö ska' tã ye' wã shko kéli è dami. Erè ìñe tã ye' wöché taië iyiwakie ena se'ie blabutsule böl tsíní. <sup>11</sup>Be' we'ikèyö, ye' tsatkó ye' èl Esaú e' ulà a. Ye' suane ie' yökî dö' ie' datse ñippök ye' tã; ñies dö' ye' alakölpa ena ye' ala'rla e'pa kôs ewëwa ie' tò. <sup>12</sup>Be' tò ye' a iyë'atbak yësyësë tò be' tò ye' kimeræ as ye' kawö tkò buaë. Ñies be' tò iyë' tò ye' aleripa alördaë taië wes dayë tséwö kè shtarta' es.”

<sup>13</sup>E' nañewe ie' kapére eë. Iyiwak tso' ie' tã eë e' shushtë ie' tò kakmè ie' èl a. <sup>14</sup>Ikkë shutshtë ie' tò: chibo alaki dökã cien böyök (200); chibo wë'ñe dökã dabom böyök (20); obeja alaki dökã cien böyök (200); obeja wë'ñe dökã dabom böyök (20); <sup>15</sup>kameio alaki pane ñiköl ilà tã, ese dökã dabom mañayök (30); baka alaki dökã dabom tkëyök (40); baka wë'ñe pupula dökã dabop (10); burro alaki dökã dabom böyök (20); burro wë'ñe dökã dabop (10). <sup>16</sup>E' ukuökî tã iyiwak ekkë kôs tuléitö ikanè mésopa a iwakmik iwakmik ulawa ulawa tã ichéitö iarak:

—A' yú ye' yökî kewe. Ká ulat múat iyiwak a ulat ulat as kè iwöierwã ñita.

<sup>17</sup>Etã kanè méso kewe patkémîitö e' a ichéitö:

—Mik be' tò ye' èl kué tã ie' tò be' chaké: “¿Yi be' wökir? ¿Wé be'

\* 32.2 Mahanaim: Hebreoie ká kiè e' wã kiane chë ñippökwakpa böltëpa.

micho? ¿Sekkë dör yi iyiwak?”,  
 18 etä iiütó: “A kékëpa, iyiwak i' kōs  
 e' kak patké be' kanè méso Jacob  
 tö be' a. Ie' wák datse sa' itökí.”

19 E' sù ikanè mésopa malepa  
 patkémiiitö iyiwak wëttsë, e'pa a  
 ichémiitö ñies:

—Mik a' tö Esaú kué, etä ichó ia  
 es è. 20 Kè a' éna ichökwa chè ia:  
 “A kékëpa, be' kanè méso Jacob e'  
 datse sa' itökí.”

Ie' tö ibikeitsé: “Iyiwak  
 patkémiiyö keweie ye' ël a e' dör  
 as ie' er buarne ye' kī. E' ukuökī  
 tā ye' wák tö isuëmi. Es ie' tö ye'  
 kiëwami er bua' wa.” 21 Es iyiwak  
 kak patkémiiitö keweie ie' yökī. Erë  
 ie' wák e' tséat kapökrö ie' úla a.

### Jacob ñippé kapa wa Skëköl tā

22-23 E' nañewe Jacob e' kéka. Ie'  
 tö ilakölpa böl ena e'pa kanè méso-  
 pa böl ena ila'r dökā dabom eyök kī  
 eköl e'pa kōs dapa'wéitö tā iuyöktsa  
 ké di' Jaboc wišet ñies ì kōs tso'  
 iwā ekkë uyéttsaitö. 24 Ie' e' tséat  
 eköl. Eë tā wëm de eköl ie' ska' tā  
 ie'pa ñippé kapa wa darërë dò ká  
 ñine etä. 25 Erë wëm e' tö isué tö kè  
 ie' e' alöpakā Jacob kī. E' kuëkī ie'  
 tö itéwā itu' wöiërkewā e' kī tā itu'  
 wöyënettsa. 26 Etä wëm ñe' tö iché  
 ie' a:

—Ká ñirkewatke e' kuëkī ye' ówa.

Ie' tö iiüté:

—Kè be' tö ye' a kawö bua' mè,  
 etä kè ye' tö be' epamine.

27 Wëm tö ie' a ichaké:

—¿Ima be' kiè?

Ie' tö iiüté:

—Ye' kiè Jacob.

28 Wëm tö iché ia:

—Kè be' kiëia Jacob. Be' kirdaë  
 Israel. \* Be' ñippé Skëköl tā ñies  
 s'ditsö tā etä ì kiane be' kī e' de be'  
 ulà a, e' kuëkī be' kiè mékayö es.

29 Jacob tö ie' a ichaké:

—Ichó ña, ¿ima be' kiè?

Ie' iiüté:

—¿Iók be' kī ye' kiè kiane  
 jchënuke?

Eë tā wëm ñe' er bua' ché ie' a.

30 Ie' tö ká e' kiè mékā Penuel. \*

Ie' tö iché: “Eré ye' tö Skëköl wák  
 suéwā ye' wöbla wa, erë kè ye'  
 du'wā.” E' kuëkī ká e' kiè mékaitö  
 es.

31 Mik ie' tkökemitke Penuel, etä  
 diwö tschine. Erë ie' tu' wöyënettsa,  
 e' kuëkī ie' shkörämi shaotshaot.

32 Ie' tēnewā itu'kicha kī, e' kuëkī  
 dò ikkë tā ie' aleripa kōs kè tö  
 iyiwak tu'kicha katetā'.

### Esaú er buanene Jacob kī

**33** 1 Mik Jacob tö isué tö ie'  
 ël datse ena wëpa tajë  
 datse ie' wā dökā cien tkëyök (400),  
 etä ie' tö ila'rla blabatsé. E'pa  
 méitö Lía a ena Raquel a ena e'pa  
 kanè mésopa böl a. 2 Kanè méso-  
 pa böl e'pa patkémiiitö keweie ila'r  
 tā. E' ukuökī tā ie' tö Lía ena ila'r  
 patkëmi. Bata ekkë Raquel ena ilà  
 José e'pa patkémiiitö. 3 Etä ie' wák  
 tkami kewe ie'pa yökī. Ie' mirwā  
 ie' ël wörkī e' dalewa ie' wöëmi  
 dò iskī es iwöömir dökā kuktöki-

\* 32.28 *Israel*: Hebreoie s'kiè e' wà kiane chè ñippé Skëköl tā.

\* 32.30 *Penuel*: Hebreoie ká kiè e' wà kiane chè Skëköl wö.

cha (7 veces). Es ie' demi tsinet iël wörki. <sup>4</sup>Etä Esaú tūnebitu ie' wöki, ta ipaklö'wéwaitö ikuli' a ta iwöa-lattséitö ta iéрак ñita. <sup>5</sup>E' ukuöki ta Esaú tö Jacob alakölpa ena ila'rla e'pa sué ta ichakéitö ia:

—¿Wikképa dör yi?

Jacob tö iiuté:

—A kéképa, Skéköl tö ala'rla wikképa mé ye' a.

<sup>6</sup>Etä ilakölpa kanè mésopa e'pa de ila'rlaë ta iwö éwarak dò iski. <sup>7</sup>E' ukuöki ta Lía de ila'rè ta ie'pa wöéwa iski ñies. Bata ekké ta Raquel de ilà José ta etä ie'pa wöéwa dò iski ñies. <sup>8</sup>E' bet ta Esaú tö ie' a ichaké:

—Iyiwak kuéyö ñalá ki ulawa ulawa çie e' dör?

Ie' iiuté:

—E' dör as be' er buarne ye' ki.

<sup>9</sup>Esaú tö iiuté:

—Au, kè be' tkinuk ye' ki. Ye' wa itso' taië. E' tsúat be' wák tö.

<sup>10</sup>Erë Jacob tö iskà ché ia:

—Au, kè be' tö ye' ttè watöktsa. Be' er buanene ye' ki e' ta iyi kakmekeyö be' a e' klö'ú. Be' tö ye' kiéwä buaë. Be' suéneyö e' dör buaë ye' a wes Skéköl wák suéyö es. <sup>11</sup>Taië Skéköl tö ye' blu'wé. Kè i kianeia ye' ki. E' kuéki ye' be' pablè tö iyi kakméyö be' a e' tsú ye' ulà a.

Jacob tö iyiwak watké ia taië, e' kképa iël Esaú tö iyiwak tsé iulà a.

<sup>12</sup>Esaú tö iché ia:

—E'ma mishka ñita. Ye' mi'ke kéwe.

<sup>13</sup>Erë Jacob tö iiuté:

—A kéképa. Be' wa ijcher bua' tö ye' ala'r ia tsitsirla. Ñies obeja ena baka tso' alàe e' bikeitséyö dö' ishtrirwä ta iduölmurmi sekka ká etkéme. <sup>14</sup>Ye' a ta buaë idir tö be' yu'tke kéwe, etä wé' ye' do be' itöki enaena wes ye' iyiwak ena ye' ala'rla shkömir es. Es ye' mir ie'pa ta dö be' serke Seír eë.

<sup>15</sup>Etä Esaú tö iiuté:

—E'ma buaë idir. Kawö mú ña ye' kanè mésopa welepa mukat be' a be' kimoie.

Erë Jacob tö iiuté:

—Au, çiók be' e' we'ikò ye' wa ekké chökle?

<sup>16</sup>E' è diwö ta Esaú míane Seír iyamipa ta. <sup>17</sup>Erë Jacob míä ká kiè Sucot\* eë. Eë ie' u yué iwák a. Ñies iyiwak wé chali'wéitö. E' kuéki ká e' kiè mékaitö Sucot.

<sup>18</sup>Es Jacob manétat Padán-aram dö Canaán. Ie' dettsa buaë. Ie' sené ká kiè Siquem, e' wösha. <sup>19</sup>Wé ie' tö ká yué e' tuéttsa ie' tö. E' ské dör inuköl wömulé döka cien eyök (100). Hamor dör Siquem yé, e' ala'r tö ká watué Jacob a. <sup>20</sup>Ká e' a Jacob tö ák kataté et ka'ie iyiwak jchoie Skéköl dalöioie. E' kiè mékaitö El-elohé-israel.\*

#### Dina dalösewéwä Siquem tö

**34** <sup>1</sup>Jacob alà busi Lía ta kiè Dina, ká et ta e' míä ká e' wakpa busipa pakök. <sup>2</sup>Etä Hamor e' dör heveowak e' dör ká e' wökir, e' aladulaköl kiè Siquem e' tö Dina

\* **33.17** *Sucot*: Hebreoie ká kiè e' wà kiane chè u yöule chalichali.

\* **33.20** *El-elohé-Israel*: Hebreoie kiè e' wà kiane chè *Israel Kéköl diché ta' taië*.

sué. Età ie' tò iklö'wéwà tã isenékã itã kësik wa. <sup>3</sup>Erë ie' wöbatse Dina wa tajë tã ipablëitö tajë. <sup>4</sup>Etã ie' tò iché iyé a:

—A yéwö, be' yú kékëpa Jacob ska' ilà busi kiöktsã ye' a as ye' serwã ie' tã.

<sup>5</sup>Ì sulu wamblé Siquem tò Dina tã e' jchenewã Jacob wã. Erë ie' aladulakölpa tso' kañikã iyiwak kanéuk, e' kueki ie' kè wã iyëne ie'pa a. <sup>6</sup>E' dalewa Hamor dör Siquem yé e' mía Jacob ska' ttök ie' tã.

<sup>7</sup>Mik Jacob aladulakölpa dene u a, etã ì wamblëne Dina tã e' jchenewã ie'pa wã. E' tò ie'pa uluwékã tajë. Siquem senékã Jacob alà busi tã e' dör iyi suluë Israel aleripa a. E' kè kawö tã' wamblë es. <sup>8</sup>Erë Hamor tté ie'pa tã, tã ichéitö ia:

—Ye' aladulaköl Siquem, e' wöbatse tajë a' kutà wa. A' we'ikèyö kawö mú ie' a senukwã ie' tã. <sup>9</sup>Es a' yörmi sa' yamipaie. Es sa' serwãmi a' alà busipa tã. Ñies a' serwãmi sa' alà busipa tã. <sup>10</sup>A' e' tsúat senuk sa' shuã. A' senú sa' kã a wé a' kï ikiane eë. A' tò iyi wataú ena iyi tãú. A' tò kã tãú. Kè yi tò a' wöklö'wëpa.

<sup>11</sup>Ñies Siquem tté Dina yé tã ena ikëpa tã, etã ichéitö ia:

—Ye' a' pablè tò ye' ttè klö'ú. Ye' tò a' a iyi kakmeraë kos a' kï ikiane ekkë. <sup>12</sup>Kos iské\* dör e' tsatã a' tò ye' a ikí kié, e' tã ekkë meraëyö a' a. E' kè kï ye' tkine. Ye' tò iyi meraë tajë a' a, erë kawö mú ye' a senukwã be' kutà tã.

<sup>13</sup>Erë Siquem tò ie'pa kutà dalösewéwã, e' kueki ie'pa tò ie' ena iyé iüté kachè wa. <sup>14</sup>Ie'pa tò iché ia:

—Kè sa' a sa' kutà menuk wëpa kè tottola kkuölitla tëule tsir, esepa a. E' dör suluë sa' a jaë tajë. <sup>15</sup>Es è sa' tò a' iütëmi. A' wëpa kos tottola kkuölit tée tsir wës sa' es, e' tã sa' tò a' ttò iütëmi. <sup>16</sup>Es a' serwãmi sa' alà busipa tã. Ñies sa' serwãmi a' alà busipa tã. Es sa' sermi a' tã ñita wës kã etkè wakpa es. <sup>17</sup>Erë kè a' wã a' tottola kkuölitla tëne wës sa' tò iché a' a es, e' tã sa' míyalne kã i' kï. Sa' kutà mítserne sa' wã.

<sup>18</sup>Etã Hamor ena ilà Siquem e'pa a imène buaë. <sup>19</sup>Tajë duladula e' kï Jacob alà busi kiane, e' kueki bet iwéitö wës ie'pa tò iché es. Ie' dalò tajë iyé ska' imalepa tsatã. <sup>20</sup>E' kueki ie' mía iyé tã kã kköi-ëule e' wékkö a. Eë kã e' wakpa ñi dapa'uke ttè shuloie. Eë Siquem ena iyé mía ttök ikã wakpa tã. Tã ichéitö iarak:

<sup>21</sup>—Pë' debitu íe er buaë se' tã. Ie'pa de senuk se' tã, iyi tãuk ena iyi watauk se' shuã. Kã tso' wë' ie'pa a. Se' serwãmi ie'pa alà busipa tã. Ñies ie'pa serwãmi se' ichapa tã. <sup>22</sup>Etã as se' dò kã etkè wakpaie ie'pa tã ñita, etã s'kawötã iuk wës ie'pa tò iché es. Ie'pa tò iché tò se' wëpa ulitane kawötã itóttola kkuölitla tók tsir wës ie'pa wöblane iuk es. <sup>23</sup>Etã kos ie'pa wã iyiwak tso', ì tso' e' doraë se' icha. Sö ichò ie'pa a tó. Etã es ie'pa e' tsukeat senuk se' shuã.

\* 34.12 iské: E' kéwö ska' tã ie'pa wöblar tò ilà busipa watueke inuaki a.

<sup>24</sup>Etā wēpa tso' ká e' kī kibine-  
tke, e'pa ulitane a buaë idir. Etā  
ie'pa kōs tottola kkuölitla télor tsir.

<sup>25</sup>E' ukuökī bökkī es tā mik  
e' dalërkeiā taië kè wa ie'pa e'  
tsatkër, etā Jacob aladulakölpa  
dör Dina akēpa kiè Simeón ena  
Leví, e'pa míyal Siquem, etā ká  
e' wakpa wēpa télurdakitō seraā  
tabè wa. <sup>26</sup>Es ie'pa tō Hamor  
ena ilà Siquem e'pa ttéwā tabè  
wa. Ie'pa tō ikutà yéttsā Siquem  
u a tā imíyal. <sup>27</sup>Ká e' wēpa ttélur  
seraā. E' ukuökī tā Jacob aladula-  
kölpa malepa debitū tā íyi kōs tso'  
ká e' kī e' tsémirakitō. <sup>28</sup>Es ie'pa  
wā obeja ena baka ena burro ena  
íyi kōs tso' ká kköiëulewā e' a, ñies  
ì kōs tso' kañikā e' mítser. <sup>29</sup>Ñies  
íyi tso' kōs u a, e' mítser ie'pa wā  
seraā. Ala'rla kōs ena alakölpa kōs  
e'pa klö'wélur ie'pa tō ie'pa kanè  
mésopaie. <sup>30</sup>Etā Jacob tō iché  
Simeón ena Leví a:

—A' tō se' tsaié. A' kuëkī ká i'  
wakpa e' dör canaánwak ena fere-  
seowak e'pa ulurdaë se' kī taië.  
Ie'pa ñi dapa'uraë ñippök se' tā.  
Kè se' wā ñippökwakpa tā' taië, e'  
kuëkī ie'pa e' alörakā se' kī. Ye' ena  
ye' yamipa kōs ttelurdaë ie'pa tō.

<sup>31</sup>Erë ie'pa tō iiüté:

—¿Ima ie'pa erbikò tō ie'pa wā  
sa' kutà mi'mitser wēs alakölpa  
sulusi es?

### Skëköl er buaë ché Jacob a Betel

**35** <sup>1</sup>E' ukuökī tā Skëköl tō  
iché Jacob a: “Be' yú

senuk Betel. Eë ák katató ka'ie  
ye' dör be' Këköl e' kkayë' be' a  
mik be' bakshkar Esaú yökī etā,  
e' dalöioie.” <sup>2</sup>Etā Jacob tō iché  
iyamipa a ena kōs itso'rak ie' tā,  
e'pa a ñies:

—Íyi diököl tso' a' wā dalöiè, ese  
kōs tulóttsa bet. A' kuó tā a' datsi'  
mane'úlor. <sup>3</sup>Mishkarak bet Betel.  
Eë ye' tō ák katateke et ka'ie iyiwak  
jchoie Skëköl dalöioie. Ie' tō ye'  
kime' mik ye' bak erianuk taië etā.  
Ie' tō ye' kköna' kōs ye' káka're ekkè.

<sup>4</sup>E' bet tā íyi diököl tso' ie'pa wā  
dalöiè ese tulérakitō Jacob a. Ñies  
ikukuöio kōs, e' tulérakitō Jacob a.  
E' kōs wötéluritō kós klò ter tsinet  
Siquem e' dikīa. <sup>5</sup>Etā ie'pa e' yélur.  
Erë ká tso' tsinet tsinet e' wakpa  
kōs suawéka taië Skëköl tō, e' kuëkī  
e'pa kè wā ie'pa töiëne.

<sup>6</sup>Etā Jacob ena iyamipa kōs demi  
ká kiè Luz atē Canaán. Ká e' kiè  
ñies Betel. <sup>7</sup>Etā eë ák katatéitō et  
ka'ie iyiwak jchoie Skëköl dalöioie.  
Eë Skëköl e' kkayë' ie' a mik ie'  
bakshkar iël yökī etā. E' kuëkī ák  
katatéitō e' kiè mékaitō El-Betel.\*

<sup>8</sup>E' ukuökī tā ká e' a Rebeca  
kkö'nukwak bak kiè Débora, e' blë-  
newā tā inú bléwarakitō kós klò ter  
eë e' dikīa. Kal e' ter ká kiè Betel  
e' o'mik. Jacob tō ká e' kiè méka “Iè  
kéli”.

<sup>9-10</sup>Mik Jacob biteane Padán-  
aram dene Canaán, etā Skëköl e'  
kkachéne etökichane ie' a. Etā Skë-  
köl er buaë ché ie' a i' es:

“Be' kiè Jacob,

\* 35.7 *El-Betel*: Hebreoie kiè e' wā kiane ché *Skëköl tso' Betel*.

erë be' kè kièià es.  
I'ñe ta be' kiè mékayö Israel.”

Skëköl tö ie' kiè mane'wéttsa,  
11 e' ukuökì ta ichéitö ia:

“Ye' dör Skëköl Diché Ta' Ýyi  
Ulitane Tsata e';  
Be' ala'r ena be' aleripa alönú  
taië.

Be' aleripa alördaë taië,  
e'pa döraë ká taië wakpaie.  
Ñies ie'pa shuà blu'pa döraë.

12 Ká me'bakyö Abraham a ena  
Isaac a,  
e' méyö be' a ñies be' aleripa  
a.”

13 Mik Skëköl tté one Jacob ta, ta  
imía. 14 Ee Jacob ák duéka ek sè sù.  
Ák e' kì ie' tö kiö ena vino té iwà  
kkachöie tö e' dör batse'r Skëköl a.  
15 Ká e' kiè mékaitö Betel.

### Raquel blënewa

16 E' ukuökì ta ie'pa e' yélur  
Betel míyal Efrata. Kam ie'pa dõmi  
Efrata e' tso'ia elkeë, eta Raquel  
alà kurketke e' diwö de. E' tö  
Raquel kiri'wéwa taië erë kè iwà  
kur yës. 17 Ie' tso'tke suluë ichók  
eta ikkö'nukwak dur ee, e' tö iché  
ia: “Kè be' suanuk. Be' alà kune.  
E' wák dör wëm.” 18 Eta Raquel  
wake' duökewatke, isiwa' bata  
tkökeia, e' shuà ilà kiè mékaatitö  
Ben-oní. \* Erë ilà yé tö ikiè mane'wé  
Benjamín.\*

19 Es Raquel blënewa. Inú wöté-  
warakitö Efrata ñalé kì. I'ñe ta ká  
e' kiè Belén. 20 Eta wé Raquel nu  
bléwaitö e' kì ák duéka ek Jacob  
tö iwà kkachöie. I'ñe ta ák e' tkëria  
Raquel pö kkachöie.

21 Eta Israel \* michoë wé imi'kerö  
ee. Ie' e' tséat senuk ká kiè Mig-  
dal Éder e' wishké. 22 Ie' tö ká yué  
senoie ee, e' ukuökì ta ilà Rubén  
senéka ie' alaköl kiè Bilhá e' ta, e'  
jchenewa ie' wa.

### Jacob aladulakölpa

Jacob aladulakölpa döka dabom  
eyök kì bøl (12). 23 Ie' ala'r Lía ta e'pa  
dör Rubén, e' dör ikibi, ñies Simeón,  
Leví, Judá, Isacar ena Zabulón.

24 Ila'r Raquel ta e'pa dör José ena  
Benjamín. 25 Raquel kanè méso kiè  
Bilhá, e' ta ila'r dör Dan ena Neftalí.  
26 Lía kanè méso kiè Zilpá, e' ta ila'r  
dör Gad ena Aser. E'pa dör Jacob ala-  
dulakölpa kune Padán-aram e'pa.

### Isaac blënewa

27 Jacob minea iyé Isaac sauk ká  
kiè Mamré ee. Ká e' kiè ñies Arbá  
ö Hebrón. Ká e' a Abraham ena  
Isaac bak senuk. 28-29 Isaac këne-  
watke. Mik ie' kì duas tso' cien  
eyök kì dabom paryök (180), eta  
iblënewa míä idëütöpa itökì. Ila'r  
Esaú ena Jacob e'pa tö inú wötéwa.

### Esaú aleripa

**36** 1 I'pa dör Esaú aleripa.  
Esaú kiè ñies Edom. 2 Esaú

\* 35.18 Benoni: Hebreoie s'kiè e' wà kiane chè ye' eriane e' alé.

\* 35.18 Benjamín: Hebreoie s'kiè e' wà kiane chè ye' ulà bua'kka e' alé.

\* 35.21 Israel: E' dör Jacob kiè pa'alí me'ka Skëköl tö ikì e'.

senéwā canaánwak alakölpa mañal ta. Eköl dör Adá, e' dör hititawak kiè Elón, e' alà busi. Ièköl kiè Oholibamá, e' dör Aná alà busi ena heveowak eköl kiè Sibón, e' talà.

<sup>3</sup>Bata ék kiè Basemat, e' dör Ismael alà busi ena Nebaiot kutà. <sup>4</sup>Adá alà tsá kune e' kiè Elifaz. Basemat alà kiè Reuel. <sup>5</sup>Oholibamá ala'r kune mañal. E'pa kiè dör Jeús, Jaalam ena Coré. E'pa dör Esaú ala'r kune mik ie' bak senuk Canaán eta e'pa.

<sup>6</sup>Esaú wā ilakölpa ena ila'r wēpa ena ila'r busipa ena imalepa kos serke ie' ska' e'pa kos míyal ie' wā e' ta senuk ká bánet iël Jacob e' yökí. Nies ie' wā iyiwak kos ena ì kos dē' ie' ulà a Canaán, e' mítser seraā. <sup>7</sup>Esaú ena Jacob wā iyi tso' taië. E' kuëkí ie'pa kè chē'kaia ñita. Kè ì ku'ia wē' ie'pa böl iyiwak a katè. <sup>8</sup>E' kuëkí Esaú (e' kiè ñies Edom) e' mía senuk Seír kébata a.

<sup>9</sup>I' dör Esaú aleripa bak senuk Seír ké köwö kí, e'pa kiè edomwak. <sup>10</sup>I'pa dör Esaú ala'r: Elifaz e' dör Esaú alà Adá ta, ena Reuel e' dör Esaú alà Basemat ta.

<sup>11</sup>Elifaz ala'r dör Temán, Omar, Sefó, Gatam ena Quenaz. <sup>12</sup>Elifaz alaköl skà bak eköl kiè Timná, e' ta ilà ta' eköl kiè Amalec. E'pa dör Esaú alaköl kiè Adá e' uyökpa.

<sup>13</sup>Reuel ala'r dör Náhat, Zérah, Samá ena Mizá. E'pa dör Esaú alaköl kiè Basemat e' uyökpa.

<sup>14</sup>Esaú alaköl kiè Oholibamá, e' dör Aná alà busi ena Sibón talà. Ie' ala'r dör Jeús, Jaalam ena Coré.

<sup>15</sup>I'pa dör Esaú aleripa e'pa ditséwōpa wökirpa:

Esaú alà kibi kiè Elifaz e' aleripa dör: Temán, Omar, Sefó, Quenaz,

<sup>16</sup>Coré, Gatam ena Amalec. E'pa dör Elifaz aleripa e'pa ditséwōpa wökirpa bak senuk Edom. Ie'pa dör Adá uyökpa.

<sup>17</sup>Esaú alà kiè Reuel e' ala'r dör: Náhat, Zérah, Samá ena Mizá. E'pa dör Reuel ditséwōpa wökirpa bak senuk Edom. Ie'pa dör Basemat uyökpa.

<sup>18</sup>Esaú alaköl kiè Oholibamá e' dör Aná alà busi. Ie' ala'r dör: Jeús, Jaalam ena Coré. E'pa dör Oholibamá ditséwōpa wökirpa.

<sup>19</sup>E'pa kos dör Esaú (kiè ñies Edom) e' aleripa. E'pa dör ie'pa ditséwōpa wökirpa.

<sup>20</sup>I'pa dör wēm dör horeowak eköl kiè Seír, e' ala'r. Ie'pa bak senuk Edom ñies. Ie'pa kiè dör: Lotán, Sobal, Sibón, Aná, <sup>21</sup>Disón, Éser, ena Disán. E'pa dör Seír ala'r wēpa. Ie'pa dör horeowak wökirpa bak senuk Edom. <sup>22</sup>Lotán ala'r dör Horí ena Hemam. Lotán kutà dör Timná. <sup>23</sup>Sobal ala'r dör Alván, Manáhat, Ebal, Sefó ena Onam. <sup>24</sup>Sibón ala'r dör Aiá ena Aná. Ká e' ta Aná tso' iyé kiè Sibón e' burro kkö'nuk e' dalewa ie' tö di' tum kué taië ká sí po e' a. <sup>25</sup>Aná alà wēm kiè Disón. Ie' alà busi kiè Oholibamá. <sup>26</sup>Disón ala'r dör Hemdán, Esbán, Itrán ena Querán. <sup>27</sup>Éser ala'r dör Bilhán, Zaaván, ena Acán. <sup>28</sup>Disán ala'r dör Us ena Arán.

<sup>29</sup>Horeowak wökirpa dör Lotán, Sobal, Sibón, Aná, <sup>30</sup>Disón, Éser, ena Disán. E'pa dör horeowak wökirpa iyamipa wa. Ie'pa bak senuk Seír.

<sup>31</sup>I'pa dör Edom blu'pa, kam Israel aleripa blúpa dò e' yökí.

<sup>32</sup>Bela, e' dör Beor alà, e' de Edom wakpa blúie. Ie' ká kiè Dinhaba. <sup>33</sup>Bela blënewa e' skéie Jobab yöne blu'ie. Ie' dör Zérah alà. Ie' datse Bosrá. <sup>34</sup>Jobab blënewa e' skéie Husam datse Temán e' yöne blu'ie. <sup>35</sup>Husam blënewa e' skéie Hadad dör Bedad alà e' yöne blu'ie. Bedad e' ali'ka Madián wakpa ki ká kiè Moab ee. Husam ká kiè Avit. <sup>36</sup>Hadad blënewa, e' skéie Samlá yöne blu'ie. Ie' ká kiè Masrecá. <sup>37</sup>Samlá blënewa, e' skéie Saúl yöne blu'ie. Ie' ká dör Rehobot. Ká e' atē di' kkò a tsinet. <sup>38</sup>Saúl blënewa, e' skéie Baal-hanán yöne blu'ie. Ie' dör Acbor alà. <sup>39</sup>Baal-hanán blënewa, e' skéie Hadad yöne blu'ie. Ie' ká kiè Pau. Ie' alaköl kiè Mehetabel, e' dör Matred alà busi ena Mezaab talà.

<sup>40</sup>I'pa dör Esaú aleripa kiè iyamipa wa ñies iká wa: Timná, Alvá, Jetet, <sup>41</sup>Oholibamá, Elá, Pinón, <sup>42</sup>Quenaz, Temán, Mibsar, <sup>43</sup>Magdiel ena Iram. Esaú kiè ñies Edom. E'pa kos dör Edom ká blu'pa wé isenerak iká ki ee.

**37** <sup>1</sup>Jacob e' tséat senuk Canaán wé iyé bak senuk ee. <sup>2</sup>Ttè i' dör Jacob aleripa e' paké.

### José ena iëlpa

Jacob alà kiè José, mik e' ki duas tso' dabom eyök ki kul (17) etā ie' tso' iyé obeja kkö'nuk iëlpa tā. Iëlpa dör iyé alakölpa kiè Bilhá ena Zilpá, e'pa ala'r. Etā i sulu kos wambleke iëlpa tö ie' wöwa, ese kkateke seraā ie' tö iyé a.

<sup>3</sup>Ie' kune mik iyé Jacob kënewatke etā. E' kuëki Jacob ki ie' kiar

ila'r malepa tsata. E' kuëki Jacob tö datsi' yué ie' a kitküle buaë.

<sup>4</sup>Erë mik ie' elpa wa ijchenewa tö ie'pa yé ki ie' kiar ie'pa ulitane tsata etā ie'pa éna iar suluë, kè ishke'weta'.

<sup>5</sup>Ká et tā ie' kabsué e' pakéitö iëlpa a. E' kuëki ie'pa éna suluë ie' kí ane. <sup>6</sup>Ie' tö ikabsuë paké iëlpa a i' es:

—Ye' ttò ttsó. Ye' kabsué e' pakekeyö a' a. <sup>7</sup>Ye' kabsué tö se' ulitane tso' kanablök kañika dalì shüa. Se' tso' dalì wöshtök e' tsatésö ettsak ettsak. Ye' tö isuë tö bet ye' icha e' duéka bua' shkë'ka. A' ichapa e' dapa'wé ye' icha pamik shkit tā e'pa tö ye' icha dalöié.

<sup>8</sup>Etā iëlpa tö iiuté:

—¿Be' éna iwà chak tö be' döraë sa' blúie? ¿Sa' serdaë be' dikia?

Ie' kabsué ena wes ipakéitö ie'pa a, e' kuëki ie'pa éna suluë ie' kí ane.

<sup>9</sup>E' ukuöki tā ie' skà kabsuëne, e' pakéitö iëlpa a ñies. Ie' tö iché ie'pa a:

—Ye' kabsué tö diwö ena si'wö ñies bëkwö dökā dabom eyök ki et (11), e' kos tö ye' dalöieke.

<sup>10</sup>Mik ie' tö ikabsué e' paké iyé a ena iëlpa a, etā iyé tö iuñé:

—¿I' kiane ché be' ki kabsuë e' wa? Ttsëskua be' mì ena be' elpa ena ye', sa' kawöta be' dalöiök.

<sup>11</sup>Ie' elpa éna iar suluë. Erë iyé tö ibikeitsé taië: ¿i' kébisué José tö es?

### José watuëttsa iëlpa tö

<sup>12</sup>Ká et tā José elpa míyal dò Siquem iyé iyiwak wëttsë kakö yulök. <sup>13</sup>Etā Jacob tö iché José a:



—Be' ëlpa tso' tsinet Siquem iyiwak kkö'nuk. Ye' kî ikiane tö be' yú isaṽuk.

Etā José tö iiüté:

—E' buaë. Ye' mí isaṽukrak.

<sup>14</sup>Jacob tö iiüté:

—Ëkëkë. Be' yú be' ëlpa saṽuk, is itso'rak, is iyiwak tso' ñies. E' wa be' wā ye' ā itté dōmine.

Etā Jacob tö ie' patkëmi. Ie' e' yéttsā Hebrón ké kkue kî mía Siquem.

<sup>15</sup>Eë ie' shkòdur chò kañika, e' kuéwā wëm eköl tö tā e' tö ie' ā ichaké:

—¿Ì yulök be' tso'?

<sup>16</sup>Ie' tö iiüté:

—Ye' tso' ye' ëlpa yulök. ¿Be' kè wā ijcher wé ie'pa tso' ye' yé iyiwak kkö'nuk?

<sup>17</sup>Wëm e' tö iiüté:

Ie'pa kè ku'ia ië. Ie'pa mineyalbak. Ye' ittò ttsérak tö ie'pa mi'keā Dotán.

Etā ie' mía iëlpa yulök. Etā ie'pa kuéitö Dotán. <sup>18</sup>Etā iëlpa tö ie' sué kamië tö ie' datse. Kam idò e' dalewa iëlpa kawö mérak ñi ā ie' ttowā. <sup>19</sup>Ichérakitö ñi ā:

—Kabsaṽukwak datse. <sup>20</sup>Ittöwasö. Inú batröomisö kauk kè ā di' tā' ese ā. Etā ichösö tö iyiwak sulusi ie' katéwa. Es ie' kabsuë e' kè wā tköpa yës.

<sup>21</sup>Mik Rubén tö ttè e' ttsé, etā ie' éna iël tsatkak. E' kuëkî ie' tö iché iëlpa ā:

—Kè ittarwā. <sup>22</sup>Kè a' tö ie' pé tkö'uk. A' tö iómi kauk i' ā. Kè a' ulà mukkā iki.

Rubén éna José tsatkak tsèmine iyé ā, e' kuëkî ie' tö iché ie'pa ā es. <sup>23</sup>Erë mik José debitū iëlpa ska', etā ie'pa tö ie' datsi' kîtkëule bua', e' yéttsā. <sup>24</sup>Etā iklö'wéwarakitö

batréemi, kauk tso' di' blóie, erë kè iwà tā' ese ā.

<sup>25</sup>E'ukuökî tā ie'pa e' tuléwā chkök, e' shuā ie'pa isuë tö taië Ismael aleripa datse. E'pa datse Galaad michoë Egipto dalì dami iwā e' wataṽuk. Kameio kî ie'pa wā kiò alar buaë e' dami. Ñies kiò masmas kiè bálamo ena mirra e' dami iwā. <sup>26</sup>Etā Judá tö iché iëlpa ā:

—Se' ël ttéwasö tā e' tté blésö, e' tā e' wa ¿i buaë dōmi se' ulà ā? <sup>27</sup>Ye' ichè buaë idir tö iwataṽttsasö Ismael aleripa ā. Ie' dör se' ël se' yami ekka, e' kuëkî kè sö ittöwā.

E' mène buaë iëlpa ā. <sup>28</sup>Mik íyi wataṽkwakpa datse Madián e'pa tkami eë, etā ie'pa tö iël yéttsā kauk ā watuéttsarakitö Ismael aleripa ā inuköl wömule dökā dabom böyök (20) ské ekkë. Es Ismael aleripa wā José minetser Egipto.

<sup>29</sup>Mik Rubén debitū kauk kkò kî, etā kè iël ku'ia. E' tö ie' eriauwé taië. E' kuëkî idatsi' jchélor. <sup>30</sup>E' ukuökî tā, ie' mía iëlpa ska' tā ichéitö ie'pa ā:

—Se' ël tsirla kè ku'. ¿Wes ye' e' ùmi?

<sup>31</sup>Etā ie'pa tö chibola ttéwā tā e' pé wa José datsi' patiëkarakitö.

<sup>32</sup>Etā datsi' e' patkëmiitö iyé ā tā ichémi ia: “Datsi' i' kué sa' tö. Ì saṽ bua'ie. ¿Kè idör be' alà datsi'?”

<sup>33</sup>Etā Jacob tö iché: “iTó, i' dör ye' alà datsi'! Iyiwak sulusi wésele tö ye' alà ttéwā katéwa.” <sup>34</sup>Etā Jacob tö idatsi' jchéloyar eriane kuëkî. Etā datsi' tso' iëno mik schönewā ese iékaitö. Etā ilà blënewā e' eriaitséitö ká taië. <sup>35</sup>Etā ila'r, wëpa ena alakölpa, e'pa qos de ie' pablök,



*Ismael aleripa wā dali dami kameio kī watuè. (Génesis 37.25)*

erè kè ie' pablër yës. Ikí iūke tajë shütë ilà dalërmik. Ie' tō iché: “Ye' schó eriaitséraë dō mik ye' duowa ekkë, es ye' dōraë ie' ska'.”

<sup>36</sup>Etā madiánwakpa demi Egipto. Eë ie'pa tō José watuéttsā wëm kiè Potifar e' ā. Wëm e' kaneblöke Egipto blú ā. Potifar dör Egipto blú tsatkökwakpa e' wökir.

### Judá ena Tamar

**38** <sup>1</sup>E' kèwö ska' tā Judá e' batséttsā iëlpa yökī míā senuk wëm kiè Hirá e' ska'. E' serke ká kiè Adulam. <sup>2</sup>Eë Judá tō alaköl sué eköl. E' dör wëm canaánwak kiè Súah e' alà busi, e' tā ie' senéwā. <sup>3</sup>E' ukuökī tā idunekā tā ilà kune wëm, e' kiè mékaitö Er. <sup>4</sup>E' ukuökī ilà skà kune wëm, e' kiè mékaitö Onán. <sup>5</sup>E' ukuökī tā ilà skà kune wëm, e' kiè mékaitö Selá. E' kune mik ie' serke ká kiè Quezib, eë etā.

<sup>6</sup>Judá tō alaköl yulé senowāie ilà kibi kiè Er e' tā. E' kiè Tamar. <sup>7</sup>Etā Er serke suluë shütë Jehová wōā. E' kueki Jehová tō ittéwā. <sup>8</sup>Etā Judá tō iché Onán ā:

—Be' kawōtā senukwā be' dabököt tā alà kōkā be' ël blënëwā e' ā wes se' wakpa ā imeneatbak es.

<sup>9</sup>Onán éna iāne tō ie' alà kurmi kos ischó tā, e' kè dör ie' wák ala'r. E' kueki mik ie' serke ischó tā, etā bet tā ie' e' skéu bānet ās kè alà kōkā ischó tā. Es ie' kè wā iël ā iditséwō meneat. <sup>10</sup>E' dör suluë ichók Jehová ā, e' kueki ie' tō Onán ttéwā ñies. <sup>11</sup>Etā Judá tō iché iyāk Tamar ā:

—Be' yú senuk be' yé u ā wes schó es dō mik ye' alà Selá talane etā.

Erè Judá tso' Tamar kit'ö'uk. Ie' ibikeitsé tō Selá duowami wes iëlpa duolur es. Es Tamar mineā senuk iyé ska'.

<sup>12</sup>Ká de taië tá Judá alaköl dör Súah alá busi e' blënewá. Ie' schó kèwö tka tá ie' mía ká kiè Timnat, wé itso'rak ie' obeja köyök tök eë. Ie' yami kiè Hirá e' dör adulamwak, e' mí ie' tá ie' wapiöuk. <sup>13-14</sup>Tamar tö isuë tö Judá alá kiè Selá, e' detke këchke erë kè ie' senèwá ie' tá. E' wa ie' wá ijchenewá tö Judá tö ie' kitö'wé Selá wa. E' kueki mik ie' wá ijchenewá tö inuaki mía Timnat iobeja köyök tök, eta ie' e' paiöke schóie e' mane'wéttsaneitö. Iwö pabakéwá datsi'tak wa as kè yi a iwërwa. Eta imía ká kiè Enaim. Eë ie' e' tkésér Timnat ñalé kkò a.

<sup>15</sup>Mik Judá tö Tamar suë tá ie' ibikeitsé tö e' dör alaköl sulusi iwö pabakéwá e' kueki. <sup>16</sup>Eta ie' mía iwöki. Kè ie' wá ierí tá' tö e' dör ie' yàk. Eta ichéitö ia:

—¿Se' ser ñita?

Eta Tamar tö iché ia:

—¿Ì meke be' tö ye' a iskéie?

<sup>17</sup>Eta Judá tö iiuté:

—Ye' chibo patköke be' a etö iskéie.

Ie' iiuté:

—Èkèkè. Erë be' íyi tsá múat ye' a dò mik be' tö chibola patké eta.

<sup>18</sup>Judá tö ie' a ichaké:

—¿Ì kiane be' kí tö ye' imèat be' a?

Eta ie' tö iiuté:

—Be' tabechka tso' e' kiè shtoie, e' múat ye' a ikichaë. Ñies be' shko kéli múat ye' a.

Judá tö imé ia tá ie' sené ie' tá. Eta alaköl duneka. <sup>19</sup>E' ukuöki tá Tamar mía iu a eta idatsi'tak wa iwö pabakéwá e' yéttsaitö. Eta ie' e' paiéne schó es.

<sup>20</sup>E' ukuöki tá Judá tö chibo patkëmi iyami adulamwak e' ulà a as ie' tö imù alaköl a as alaköl e' tö ie' íyi méat alaköl ulà a e' mùbitune. Erë ie' yami kè wá alaköl e' kuneia. <sup>21</sup>Eta ie' tö ká e' wakpa a ichaké:

—Alaköl sulusi e' dör enaimwak atéat ñalá ska', ¿wé e'?

Eta ie'pa tö iiuté:

—Íe alakölpa sulusi kè dè'.

<sup>22</sup>Eta ie' biteane Judá wörki tá ichéitö ia:

—Kè ye' wá alaköl kune. Ye' tö ichaké ká e' wakpa a. Ie'pa tö ye' a iché: 'Íe alakölpa sulusi kè dè'.'

<sup>23</sup>Judá tö iiuté:

—As ye' íyi tsúatitö es kè yi tö sa' jaëwepa. Kè ye' iane iwíie. Ye' tö ichibo patkëmi be' ulà a, erë kè be' wá alaköl kune.

<sup>24</sup>Eta si' mañat ulatök tá Judá kí biyò de tö:

—Be' yàk Tamar e' sene' wëpa kuá'kí tá. Ie' duneka.

Eta Judá tö iché aneule:

—iIyóttsa tá ñña'úwa!

<sup>25</sup>Erë mik ie' yekettsá ie'pa tö ttèwá, e' wöshá ie' ttè mémi inuaki a: "Yi íyi a'tser ye' ulà a i', e' wák tö ye' duéka. Be' isaú. ¿Yi kiè shto tabechka i' ikichaë ena shko kéli i'? ¿e' suule be' wá?" <sup>26</sup>Mik Judá tö ie' íyi suéwá iyàk ulà a tá ichéitö: "Alaköl i' dör buaë. Kè ye' wá iulabatsé ye' alá Selá tá. Ye' e' wamblé sulu ie' kí." Eta kè ie' seneia ie' tá.

<sup>27</sup>Tamar alá kune klò wák dör wëpa. <sup>28</sup>Itsörke e' wöshá, eta eköl ulà dettsá kewe. Eta ie' kkö'nukwak tö datsi'kicha batsë e' muéwá ilà ulà mik tá ichéitö: "I' ék

kune kewe.” <sup>29</sup>Erë e' wöshaë bet ta alà ulà tiéwane etökichane eta iëk kune keweie. Eta ikk'ö'nukwak tö iché ia: “¿Wes be' kune keweie?” E' kuëki ikië mékaitö Fares. \* <sup>30</sup>E' ukuökj ta, iulà a datsi'kicha tkër batsë e' kune, e' kië mékaitö Zérah.

**José tkashkar Potifar  
alaköl ulà a**

**39** <sup>1</sup>José minetsarak iwä Egipto. Kä e' ki wëm tso' eköl kië Potifar, e' tö ie' tuëttsa Ismael aleripa a. Wëm e' kane-blöke Egipto blú a. Ie' dör Egipto blú tsatkökwakpa wökir. <sup>2</sup>Erë Jehová tso' José ta, e' kuëki ì kos kanewekeitö e' dökettsa buaë iwökir egiptowak e' ska'. <sup>3</sup>Iwökir tö isuë tö Jehová tso' José ta, e' kuëki ì kos kanewekeitö e' dökettsa buaë. <sup>4</sup>E' kuëki iwökir ki ikiarke taië. Ie' tö iméka ie' wák kimukwakie. Nies imékaitö ie' iyi kos e' kuëbluie. Ie' wä iyi kos tso' e' kk'ö'nekeitö. <sup>5</sup>Mik Potifar tö ie' méka iíyi kos kuëbluie, eta Jehová er buaë chémi Potifar a. Ie' iyi kos tso' iu a ena kañika e' kos mir buaë. <sup>6</sup>José tö Potifar iyi ulitane kk'ö'neke buaë. E' kuëki Potifar kè wöki ì wëneia yës. Ì ñak ie' éna e' è bikeitsekeitö.

José wák dör bua'bluka. <sup>7</sup>Kä de iki taië eta iwökir alaköl wöbatseka iwa. Kä et ta ie' iché ia:

—Be' senúka ye' ta.

<sup>8</sup>Erë José kè wä ie' ttè iütëne ta ichéitö ia:

—Ye' ttö ttsö. Ye' wökir iyi ulitane méat ye' ulà a sunoie. Ye' tso' íe,

e' ta kè ie' tkine ie' iyi kos ki. <sup>9</sup>Ye' tso' ie' u kuëblu kibiie. Ye' wökir kè wä ì kkëone ye' ki. Be' è kè meneat iwä ye' a be' dör ie' alaköl e' kuëki. ¿Wes ye' tö ì sulu i' wamblëmi be' ta? ¿Wes ye' tö ì sulu wamblëmi Skököl ki?

<sup>10</sup>Këkraë alaköl tö ie' a iche-ke: “Be' senú ye' ta.” Erë ie' kè tö iüteta' yës. Ie' tö iulawaté këkraë.

<sup>11</sup>Kä et ta ie' tkawä weshké iyi kanéuk eta iwökir alaköl e' è tkër.

<sup>12</sup>Eta iwökir alaköl tö ie' klö'wéwä idatsi' a ta ichéitö ia:

—Be' senú ye' ta.

Erë ie' tkashkar iulà a mía tüneule. Ie' datsi' yënettsaat alaköl ulà a. <sup>13</sup>Mik iwökir alaköl tö isuë tö José datsi' atë ie' ulà a <sup>14</sup>eta ie' tö ikanè mésopa kié ta ichéitö ie'pa a:

—Isaú, ye' wëm wä hebreowak dë'bitü e' tso' se' wayuök. Ie' dewä ye' ska'. Ie' senakka ye' ta kësik wa erë ye' anekä taië. <sup>15</sup>Mik ie' ittse tö ye' anekä taië ta ie' tkashkar tüneule. Ie' datsi' yënettsaat e' atë ye' ulà a.

<sup>16</sup>E' ukuökj ta ie' tö José datsi' blé kkayënoie iwëm a mik idene eta. <sup>17</sup>Mik iwëm dene, eta ipakéitö ia ta ichéitö ia:

—Be' wä hebreowak dë'bitü kanè mésoie, e' tkawä weshké ye' ska'. Ie' senakka ye' ta. <sup>18</sup>Erë mik ye' anekä taië, eta ie' tkashkar tüneule ta idatsi' atë tär íe. <sup>19</sup>Es be' kanè méso tö ye' dalösewéwä.

Mik iwökir tö ttè e' ttsé eta iluneka taië. <sup>20-21</sup>José klö'wéwaitö

\* 38.29 Fares: Hebreoie s'kië e' wä kiane chë tkabitü keweie.

wötökwa patkëitö wé Egipto blú bolökpa tso' wötëule eë. Erë Jehová tso' José kimuk s'wöto wé a ñies. Ie' er bua' chöke ia. Ie' tö s'wöto wé wökir ké er buaë chök ia. <sup>22</sup>S'wöto wé wökir tö iméka s'tso' wötërule-wa malepa kos kuëbluie. José tö ì kos weke s'wöto wé a e' kéwö meke. <sup>23</sup>Jehová tso' José ta. Ie' tö ikimeke as ì kos döttsa buaë ie' a. E' kuëki ì kaneweke José tö e' kè sueku'ia s'wöto wé wökir tö tö is imir.

**Kabsuë böt e' wà paké José tö**

**40** <sup>1-2</sup>E' ukuöki ta wëm dör Egipto blú a vino mukwakpa e'pa kuëblu ena wëm dör blu' a pan yuökwakpa e'pa kuëblu, e'pa bül tö iblú tsiriwéka. E' kuëki ie' uluneka ie'pa ki <sup>3</sup>ta ie'pa patkëitö wötëwa ikkö'nukwakpa kuëblu e' u a s'wöto wé tso' e' a. Eë José tso' wötëule ñies. <sup>4</sup>Eta Egipto blú kkö'nukwakpa e' kuëblu tö José ké wëpa bül ñe'pa kkö'nuk. Eë ie'pa sené wötëule ká taië.

<sup>5</sup>Ká et nañewe ta ie'pa bül kabsuë kuä'ki kuä'ki. E' wà dör kuä'ki kuä'ki. <sup>6</sup>Bule es bla'mi ta José debitu isaük. Ie' tö isuë tö ie'pa eriane. <sup>7</sup>E' kuëki ie' tö ie'pa a ichaké:

—¿Iók i'ñe ta a' wö wër siar?

<sup>8</sup>Ie'pa tö iiuté:

—Sa' kabsuë, erë kè yi ku' sa' a iwà pakök.

Ie' tö iché ie'pa a:

—¿A' kè wa ijcher tö Skëköl tö s'kabsuë e' wà chëmi se' a? ¿Ima a' kabsuë? E' chö ña.

<sup>9</sup>Eta blu' a vino mukwakpa kuëblu e' tö ikabsuë paké ia ta ichéitö:

—Ye' kabsuë tö uva kicha me'r ye' wösha <sup>10</sup>e' ulà tso' mañat. E' dapëneka e' wörkua bune taië ta iwörkua míane iwóliie e' yua' tso' taië. <sup>11</sup>Egipto blú tka' a'tser ye' ulà a. E' a uvawöli diò tuéeyö. E' ukuökü ta ye' wák tö imé blu' a. Es ye' kabsuë.

<sup>12</sup>José tö iché ia:

—Be' kabsuë e' wà kiane yënuke i' es: Be' tö uva kicha ulà kébi-suë mañat. E' wà kiane yënuke ká mañat. <sup>13</sup>Ká mañat ta blu' tö be' shuleraë. Be' kané meraneitö be' a. Vino meranebö ie' a wes be' tö io' kuaë es. <sup>14</sup>Be' we'ikëyö, mik iwà tka, eta kè be' éna ye' chökwa. Ye' tté chö blu' a as itö ye' yöttsa ië. iBe' er buaë chö ye' a! <sup>15</sup>Ye' dör hebreowak e' ekiblë'wabitu ie'pa tö. Ye' kè wa ì sulu wamblëne. Ye' tso' wötëule é.

<sup>16</sup>Mik blu' pan yuökwakpa kuëblu e' tö isuë tö José tö iyami kabsuë e' wà paké ta idettsa buaë eta ie' tö ie' icha paké ia ñies. Ie' iché:

—Ye' kabsuë tö ye' wa kkó dami mañal ye' wökir ki, e' a pan saruru dami. <sup>17</sup>Kkó tkër kákke ék e' a pan dami blu' a daklili. Erë pan dami ye' wa kkó a ye' wökir ki e' ñeke dù tö.

<sup>18</sup>Eta José tö iché ie' a:

—Be' kabsuë e' wà kiane yënuke i' es: kkó mañal e' dör ká mañat. <sup>19</sup>E' wà kiane chë tö ká mañat ta blu' tö be' kuli' tökök patkeraë, ta be' nu kichatkeraka kal ulà a. Dù tö be' nu katerawa.

<sup>20</sup>Ká de mañat ta blu' tö idués-wö tkö'wé chkè wa di'yè wa taië

ikuēblupa ulitane kanēblöke ie' a e'pa a. E' shuā ie' tö ivino mukwakpa kuēblu ena ipan yuökwakpa kuēblu e'pa bōl tsukbitu patké s'wōto wé a ikuēblupa ulitane wörki. <sup>21</sup>Vino mukwakpa kuēblu e' a ikané méneitö. Ie' tö blu' a itka' méne wes kuaë es. <sup>22</sup>Erë pan yuökwakpa kuēblu, e' patkēmi nu kichatkēka wes José tö iyē' es. <sup>23</sup>Erë vino mukwakpa kuēblu e' kē er aneĩa José ska'.

**Egipto blú kabsué bötökicha e' wà paké José tö**

**41** <sup>1</sup>Duas de bök, e' ukuöki ta Egipto blú kabsué tö ie' dur di' kiè Nilo e' kkömik. <sup>2</sup>Ie' isuë tö baka deyal di' a kuktö. E' dör baka bua'buä jani'janila. E' iëter chkök kuachka shuā. <sup>3</sup>E' itöki baka skà deyal kuktö di' a. Erë e' dör suluë sí sulula. E' míyal di' kkömik baka malè o'mik. <sup>4</sup>Etā baka sí sulu-la kuktö, e' tö baka bua'buä kuktö e' katélur.

Eë ta blu' ti'neka. <sup>5</sup>E' ukuöki ta bet ie' kapowane ta ikabsuëne tö i talarke kuò sù kiè trigo e' klò elka è a ila'k deka kul. Ila'k e' dör bua'buä iwö blubluë. <sup>6</sup>E' itöki iskà tskine e' klò elka è a ila'k deka kul ñies, erë sulula idir. Siwa' datse diwö tskirke e' kke e' tö isiwéwa ña'wéwa suluë míā wö yabé è. <sup>7</sup>Etā ila'k kul siulewa sulu e' tö ila'k bua'buä katélur seraa.

Blu' ti'neka ta iëna iane tö ie' kabsauke moki. <sup>8</sup>Erë bule es bla'mi ta ie' kabsué e' tö ie' eriawéka. E' kueki ie' tö Egipto iyi tötkökwakpa ena iyi jcher taië ese wakpa, kos

tsuk patké. Ie' kabsué e' pakéitö ie'pa a. Erë ie'pa ulitane kē a ie' kabsué e' wà ane. <sup>9</sup>Etā vino mukwakpa kuēblu e' tö iché blu' a:

—A blu', erpa ye' éna idaā tö sulu ye' e' wamblé. <sup>10</sup>Mik be' uluneka taië be' pan yuökwakpa kuēblu ki ena ye' ki, etā be' tö sa' wötökwa patké' be' kkö'nukwakpa kuēblu e' wé a. <sup>11</sup>Kā et nañewe ta pan yuökwakpa kuēblu kabsué. Ye' kabsué ñies. Sa' kabsué e' wà ta' ulawa ulawa. <sup>12</sup>Eë wëm dur eköl dula-dula hebreowak, e' dör s'wōto wé wökir e' kané méso. Ie' a sa' tö sa' kabsué e' paké ta ie' tö iwà ché sa' a. <sup>13</sup>Iwamblëne yësyësë wes ie' tö sa' a iyē' es! Ye' dene ye' kané a ta iëköl nu kichatkēka kal ulà a.

<sup>14</sup>Etā blu' tö José tsuk patké ta iyëttsarakitö bet s'wōto wé a. José tsà téé buä, e' paié buä, ta ide ie'pa wa blu' wörki. <sup>15</sup>Blú tö iché ia:

—Ye' kabsué erë kē yi éna iwà ane. Erë ie'pa tö iché ye' a tö buä be' tö s'kabsuë e' wà paké.

<sup>16</sup>Ie' tö iiüté:

—A kēkēpa e' kē yënuke ye' a. Erë Skököl tö e' chëmi be' a be' kimoie.

<sup>17</sup>Blu' tö iché ia:

—Ye' kabsué tö ye' dur di' kiè Nilo e' kkömik. <sup>18</sup>Ye' isuë tö baka deyal di' a kuktö. E' dör baka bua'buä jani'janila. E' iëter chkök kuachka shuā. <sup>19</sup>E' itöki baka skà deyal di' a kuktö. Erë e' dör suluë sí pola. iKē ye' wa baka suule sí poë suluë ká i' a ekké chök! <sup>20</sup>Etā baka sí sulula kuktö, e' tö baka bua'buä kuktö e' katélur. <sup>21</sup>Baka sí suluë e' tö baka bua'buä katélur

erë kè iwër tö ikatélur. Itso'ia sí poë wës kenet es.

“Eë ta ye' ti'neka. <sup>22</sup>Etä bet ye' skà kapowane ta ye' skà kabsuëne tö ì talarke kuò sù e' klò elka è a ila'k deka kul. Ila'k e' dör bua'buäe iwö blubluë. <sup>23</sup>E' itöki iskà tskine e' klò elka è a ila'k deka kul ñies. Erë e' ala'k dör sulula. Siwa' datse diwö tskirke e' kke e' tö isiwéwa ña'wéwa suluë míä wö yabé è. <sup>24</sup>Etä ila'k kul siulewa sulu e' tö ila'k bua'buä katélur sëraa. E' kos pakéyö s'tötkökwakpa a erë ie'pa shua kè yi a iwà ane yës.”

<sup>25</sup>Etä José tö blu' iüté:

—A këkëpa, be' kabsuë bötökicha, e' wà dör etkè. Ì wëraë Skëköl tö kukuie e' chök ie' tso' be' a kabsuë a kam iwà tkò e' yöki. <sup>26</sup>Baka bua'buäe ena ala'k bua'buäe e' wà dör etkè, e' dör duas kul. <sup>27</sup>Baka sulula sí poë deka ibua'buäe itöki ena ala'k suluë siulewa siwa' wa, e' wà dör etkè. E' dör duas kul skà. E' duéswö wa ketba ardaë s'ki dò duas kul e'. <sup>28</sup>Ì wëraë Skëköl tö kukuie e' chök ie' tso' be' a wës ye' tö be' a ichétke es. <sup>29</sup>Kewe dali wördaë taië Egipto kos a doka duas kul. <sup>30</sup>E' ukuöki ta duas skà datskene kul e' dör ketba taië duéswö. Bli e' tö Egipto kos sulu'wërawa. E' kuëki duas kul buäe e' a dali wöne taië e' kè arpaia yi éna. <sup>31</sup>Bli ardaë taië darërë, e' kuëki dali wönebak taië e' peli kè wërpaia yës. <sup>32</sup>A këkëpa, be' kabsuë bötökicha, e' wà kiane chë tö Skëköl tö iwëraë mokië. Bli döraë se' ki bet.

<sup>33</sup>A këkëpa, be' kawöta wëm yulök eköl erbikò buäe wa íyi

jcher taië ese. E' múka ká kuëbluie. <sup>34</sup>Ikaneú i' es: wëpa yuló as ie'pa mi' Egipto kos a daliwö kak blök daliwö tso' taië duas kul e' dalewa. Mik daliwö tso' doka saco skel etä ikió ia sacco et blënoie ketba yöki. <sup>35</sup>Ie'pa a ichó tö daliwö ñe' kos dapa'ú bänet bänet ká tso' kos Egipto e' a. E' kkö'nuk patkó be' wák tö sulitane tioie. <sup>36</sup>Es daliwö blërdaë a' wakpa ulitane a as ie'pa kè ttò ketba tö mik ketba duéswö de s'ki etä.

### José yöne Egipto wökirie

<sup>37</sup>Ì ché José tö ie' a e' mène buäe ie' a ena ikuëblupa kos e'pa a. <sup>38</sup>E' kuëki ie' tö iché ie'pa a:

—Wëm i' a Skëköl Wiköl tso'. Kè se' a wëm skà kurpa wës ie' es.

<sup>39</sup>Etä ie' tö iché José a:

—Skëköl tö íyi ulitane ikkè e' kkaché be' a. E' kuëki be' erbikò buäe, be' wa íyi jcher taië sulitane tsata. <sup>40</sup>Be' tkekekayö ye' ká kos e' wökirie. Sa' wakpa kos tö be' ttò dalöieraë. Ye' eköl è dör kibiie be' tsata, ye' dör blu' e' kuëki. <sup>41</sup>Ìñe ye' tö ichè tö be' dör Egipto wökir kibi. <sup>42</sup>Etä blu' tö iulatsio tso' iwa ikka shtioie, e' yéttsa iéwa José ulatska a. José paiéraitö datsi' bua'buä ese wa. Ñies bulë dör oro ese iéwaitö José kuli' a et. <sup>43</sup>E' ukuöki ta ie' tö José ké e' tkökka shkök karreta shköke ie' karreta itöki e' ki. Ie' tö ie'pa wëlepa patkëmi kewe ichök pë' a aneule: “iA' e' skó! iKawö mú se' wökir kibi datse as e' tkömi!” Es ie' tö José yué Egipto wa'ñe e' wökirie.

<sup>44</sup>Etä blu' tö iché José a:

—Ye' dör Egipto blú erë kè yi a i onuk ká i' kī, be' kè wā ikéwō mène e' tā.

<sup>45</sup>Ie' tō José kiè mékã Safe-nat-panéah egiptowak ttò wa. Ie' tō tayè kiè Asenat e' mé José a senowáie. E' dör wëm kiè Potifera e' alá busi. Potifera dör egiptowak sacerdote\* eköl. Ie' kaneblöke ká kiè On eē. Es José atē Egipto wañe e' wökirie. <sup>46</sup>Mik ie'pa wā José dë'bitū blu' ska', e' kéwō ska' tā ie' kī duas tso' dabom mañayök (30).

José e' chéat blu' a tā imítke ikaneuk Egipto kos a. <sup>47</sup>Duas kul tsá shuā dali wöne taijē shütē. <sup>48</sup>Daliwö e' kos kak dapa'wé José tō tā ibléitö ká wañe. Wé dali e' wöne ese wakpa ká a ibléat u tso' daliwö blóie ese a. Es ibléitö ká ulitane tso' Egipto e' a. <sup>49</sup>Ie' tō daliwö dapa'wé taijē wēs dayē tséwö kè ishtar es. E' kuekī ie' kè wā ishtaneia.

<sup>50</sup>Ketba kéwö kam döwā e' yöki José alaköl kiè Asenat, e' alá kune böl wēpa. <sup>51</sup>Mik ilà tsá kune, etā José tō iché: “Skököl tō ye' bak erianuk ena ye' yamipa e' kos chöwéwa ye' éna.” E' kuekī ikié mékãitö Manasés.\* <sup>52</sup>Mik ilà skà kune, etā ie' iché: “Skököl tō ye' a alá mé ká wé kī ye' bak weinuk taijē eē.” E' kuekī ikié mékãitö Efraín.\*

<sup>53</sup>Duas kul dali wöne taijē Egipto e' tka. <sup>54</sup>E' ukuökī tā duas kul skà

debitū e' dör ketba poë duéswö wēs José tō iyè' es. Ketba de ká wañe erë Egipto kos a chkewö tso'. <sup>55</sup>Mik Egipto wakpa teketke ketba tō, etā ie'pa míã iblú a chkewö kiök. Ie' tō iché iarak: “A' yú José ska' tā i kos chéitö a' a e' wā iütó.”

<sup>56</sup>Mik ketba de ká wañe, etā José tō dali tso' blëule iwé a e' kos kköppée chkewö watuō Egipto wakpa a. Ketba kī datse taijē shütē. <sup>57</sup>Ká ulitane wakpa a kè i ku'ia katanoie, e' kuekī ie'pa de Egipto chkewö tauk José ska'.

### José ëlpa míã Egipto

**42** <sup>1</sup>Mik Jacob wā ijchenewā tō chkewö tso' Egipto watuē, etā ila'r a ichéitö: “¿Iók a' iëter ñi sauk è? <sup>2</sup>Ye' a iyène tō chkewö tso' Egipto. A' yú eē chke-wö tauk as kè se' duölur ketba wā.”

<sup>3</sup>Etā José ëlpa döka dabop, e'pa míyal Egipto chkewö tauk. <sup>4</sup>Erë Jacob kè wā ilà Benjamín, e' dör José ël táie imi wa, e' patkënemi iëlpa tā ie' ibikeitsé dö' i tkö itā ñalā kī. <sup>5</sup>Ketba tso' taijē Canaán e' kuekī taijē Canaánwakpa míyal chkewö tauk Egipto. Esepa shuā Jacob ala'r mirwarak chkewö tauk ñies.

<sup>6</sup>José dör Egipto ká kueblu. Ie' tō chkewö watuēke sulitane datse itauk e'pa a. Mik iëlpa demi iwörki, etā ie'pa wöéwa dö iski ie' dalöiök. <sup>7</sup>Ie' tō ie'pa suéwā bet tō ie'pa dör

\* 41.45 *sacerdote*: Sacerdote i' kè dör wēs iñe itso' es. E' skéie ie'pa dör egiptowakpa siwā e' wā kaneukwakpa.

\* 41.51 *Manasés*: Hebreoie s'kiè e' wā kiane chë ichöwéwa ye' éna.

\* 41.52 *Efraín*: Hebreoie s'kiè e' wā kiane chë alá kéka ö dali wör.



iëlpa. Erë ie' e' éwa iyökḷ wēs kè ie' wā isuule es. Kè ie' e' kkayēnewā ie'pa a' tō ie' dör ie'pa èl. Etā ie' tō iëlpa chaké kēsik wa:

—¿Wé a' sekkēpa bitē?

Ie'pa tō iüté:

—Sa' bitē Canaán chkewö tāk be' ska'.

<sup>8</sup>Ie' tō ie'pa suéwā, erë ie'pa kè wā ie' sunewā. <sup>9</sup>Ie' tō iëlpa kēbisu' e' anewā ie' éna. Ie' tō iché ie'pa a':

—A' dör sa' bolökpa datse sa' sauk tō wēs a' dōwami ñippök sa' tā e' aloka sa' ki.

<sup>10</sup>Ie'pa iüté:

—A kēkēpa, e' kè dör es. Sa' kè dör a' bolökpa. Sa' debitu chkewö è tāk. <sup>11</sup>Sa' kōs i' e' yé dör eköl è. Sa' serke buaë yēsyesë. Kè sa' dör yi bolökpa.

<sup>12</sup>Ie' tō ichéne ie'pa a':

—Au. A' sekkē tso' kachök. A' datse sa' ká sauk tō wēs a' dōwami ñippök sa' tā e' aloka sa' ki.

<sup>13</sup>Erë ie'pa tō iüté:

—Sa' tso' be' wörki wēs be' kanè mésopa es. Sa' dōka dabom eyök ki böl (12). Sa' yé dör eköl è. Sa' serke Canaán. Sa' èl tsirla ék e' atē sa' yé tā. Iëköl blēnewatke.

<sup>14</sup>Erë ie' tō iskà chénerakia:

—Ye' ichétke tō a' dör sa' bolökpa. <sup>15</sup>Egipto blú ttò wa yö ichè a' a' tō a' kè wā a' èl tsirla e' dē' ié, e' tā a' kè mi'pa ká i' ki. Es ye' isuëmi tō a' ttò mokḷ. <sup>16</sup>A' eköl yú a' tsirla tsukbitu. A' malepa atē wötëule. Es ye' wā ijchermi tō a' ttöke e' dör mokḷ. E' kè yëne, e' tā a' dör sa' bolökpa. E' chéyö Egipto blú ttò wa.

<sup>17</sup>Ie' tō ie'pa wötéwā sekkā dōka ká mañat. <sup>18</sup>Ká de mañat etā ie' tō iché iarak:

—Ye' tō Skëköl dalötseta'ka. I cheke ye' tō a' a' e' ú, e' tā ye' kè tō a' ttökwa patkepa. <sup>19</sup>Yëne tō a' dör wēpa ttò mokḷ ese, e' tā a' eköl múat wötëule. A' malepa yúne, chkewö tsúmi a' yamipa tteke ketba tō e'pa a'. <sup>20</sup>E' ukuökḷ tā a' èl tsirla e' tsúbitu ye' a' suè. Es ye' tō isuëmi tō a' ttöke e' dör mokḷ. E' kè dör es, etā a' duöralur.

Etā ie'pa tō iché: “E' dör buaë sa' a.” <sup>21</sup>Etā ichérakitö ñi a':

—Mokië se' e' wamblë' suluë se' èl José tā. Mik ie' kköyë' taië se' a' tō i' sulu kè wamblar ie' ki eré se' isu' tō taië ie' eriane, erë kè e' ska' se' tkine. E' nuí ki se' weirke i'ñe.

<sup>22</sup>Etā Rubén tō iüté:

—Ye' tō iyë' a' a': “Kè i' wamblar José ki.” Erë a' kè wā ye' ttò iütëne. E' kuëki i'ñe tā se' kawöta idu'wā e' nuí patauk.

<sup>23</sup>José ttöke iëlpa tā egiptowak ttò wa e' pakekene o'ka tō ie'pa a' iwakpa ttò wa. E' kuëki ie'pa kè wā ijcher tō ie'pa ttöke e' ane ie' éna.

<sup>24</sup>Mik ie' tō ie'pa ttöke e' ttsé, etā ie' e' skéttsa mía bānet iuk. Mik ie' er dekane ttoie, etā ie' dene ie'pa ska'. Ie' tō Simeón yöktsa patké tā ipayuëwarakitö iëlpa wörki.

<sup>25</sup>E' ukuökḷ tā ie' tō ikanè mésopa patké iëlpa sku' wā iök chkewö wa. Ñies ichéitö iarak: “Ie'pa chkewö e' ské iówā iwakpa bil ekké sku' a. Ñies chkè bakómirakia ñè ñala ki.” Etā ie'pa tō iwé wēs ie' tō iché iarak es. <sup>26</sup>E' ukuökḷ tā ie'pa tō ichkewö méka iburro ki tā imíyal.

<sup>27</sup>Mik ie'pa demi ñala ki wé ie'pa kapökerö eë etā ie'pa eköl tō isku' a' burro chkò tso' e' kkò

wötsée iburro tioie tã isué tö inuköl àr sku' shuã. <sup>28</sup>Ie' tö iché iëlpa a:

—iIsaú! Ye' inuköl mébitune ie'pa tö e' àr sku' a.

Ie'pa ulitane suane tajë eriane tajë. Ichéraitö ñi a:

—¿I wamblök Skéköl tso' se' tã?

<sup>29</sup>Mik ie'pa demine Canaán, etã ì tka ie'pa tã Egipto e' kôs pakéraitö iyé a. Ie'pa tö iché ia:

<sup>30</sup>—Kã e' wökir e' tté sa' tã kësik wa. Ie' tö iché tö sa' dör ie'pa bolökpa. <sup>31</sup>Sa' tö iché ia: “Sa' serke buaë. Kè sa' dör yi bolökpa. <sup>32</sup>Sa' dökã dabom eyök ki böl. Sa' yé dör eköl è. Sa' èl eköl blénewatke, iéköl até sa' yé tã Canaán.” <sup>33</sup>Etã ie' tö sa' iüté: “A' ttò mokì, e' tã a' èl eköl e' múat ië ye' ska' etã chkwö tsúmi a' yamipa a. <sup>34</sup>Erë a' èl tsirla ék e' tsúbitu ña suè. Es ye' wã ijchermi tö a' ttò mokì. A' tö iwé es, e' tã ye' tö a' èl èmimine. Ñies a' íyi tuèmi bua' sa' kã i' ki.”

<sup>35</sup>Mik José ëlpa tso' isku' wakkauk, etã ie'pa isué sku' a inuköl deyal parratulewã. Mik e' sué, etã ie'pa tkirulune iyé ñies. <sup>36</sup>Jacob tö iché iarak:

—A' tso' ye' mukat alà kè tã'. José blénewã se' yökì. Simeón ñies, kè ku' se' tã. I' tã Benjamín kiane tsèmi a' ki daré wa. Këkraë ye' weirke.

<sup>37</sup>Rubén tö iché iyé a:

—Benjamín múmi ye' a. Ye' tö ikkö'neraë buaë. Ye' wã idörane be' a. Ye' kè wã idè'ne, e' tã ye' alà böl e' ttólur.

<sup>38</sup>Ie' tö iüté:

—Ye' alà kè mìnè a' tã. Ièl José du'wã tã ie' è dawãia. Dö'~ì sulu

tkò ie' tã ñalã ki, e' tã kékëla i' duömiwã ilà dalërmik tã a' iane iwiie.

### Benjamín ëlpa wã imítser Egipto

**43** <sup>1</sup>Ketba tkëneia darë-rë Canaán. <sup>2</sup>Chkwö dè'biturak iwã Egipto, e' enewa. Etã Jacob tö iché ila'r a:

—A' yúne chkwö skà tãuk se' a.

<sup>3</sup>Erë Judá tö iüté:

—Wëm tso' eë e' tö iyé' sa' a yësyësë: “A' kè wã a' èl tsirla dè' ië, e' tã a' kè tö ye' suepa.” <sup>4</sup>Be' tö sa' èl tsirla émi sa' tã, e' tã sa' mi'mi chkwö tãuk be' a. <sup>5</sup>Erë be' kè tö ièmi sa' tã, e' tã kè sa' mìnè. Wëm e' tö sa' a iché: “A' kè wã a' èl tsirla dè' ië, e' tã kè a' tö ye' suepa.”

<sup>6</sup>Jacob tö iüté:

—¿Iök a' tö ì sulu wambleke tajë ye' ki? ¿Iök a' tö iché wëm e' a tö a' èl skà tso'ia eköl?

<sup>7</sup>Ie'pa tö iüté:

—Wëm e' tö sa' chakéwaie daré wa: “¿A' yé tso'ia tts'ka? ¿A' èl skà tso'?” Kè wës sa' a ionukia. Sa' kawõtã iütök yësyësë. Sa' kè wã ijcher tö wëm e' tö sa' a ichémi: “A' èl tsúbitu ye' a suè.”

<sup>8</sup>Judá tö iché ie' a:

—Se' senakia, e' tã be' alà ómi ye' tã. Ye' tö ikkö'neraë. Es be' ena sa' ena se' ala'r kôs kè duöpalur ketba wã. <sup>9</sup>Ye' e' chò ie' skéie. Ì de wës ie' tã, e' nuí tueraëyö. Ye' kè wã ie' dè'ne be' ska', e' tã ye' iane iwiie këkraë. <sup>10</sup>Kè sö kawö chöuk tajë. Warma i' tã sa' daretke bötökicha.

<sup>11</sup>Iyé tö iüté:

—E'ma kè wës ionuk. A' tö iú i' es: A' sku' a' íyi bua'buatso' se' kã

a, ese kak tsúmi wëm e' a. Bálsamo elkela ena bul alí elkela ena kiò masmas ena mirra ena kalwò wödalo katanoie ese kòs kak tsúmi ia elkela. <sup>12</sup>Ñies inuköl tsúmi ia jaishet döka bötökicha. Wé a' wá idè'ne e' tsúmíne múne ia a' wák ulawa dö' ie' wöa ká chë'wa. <sup>13</sup>A' yúne wëm e' ska'. Alà tsúmi. <sup>14</sup>Skököl Diché Ta' Íyi Ulitane Tsata e' a ikiéyö as wëm ñe' tö a' saü er siarë wa ta imú tö be' èl ena Benjamín óbitüne. Ye' atë alà kè ta', erë zwes ye' e' ümiiä?

<sup>15</sup>Etä Jacob ala'r tö íyi kak ié, ñies inuköl ié jaishet döka bötökicha. Ñies Benjamín mírak iwä ta imíyal. Mik idemirak José ska' <sup>16</sup>etä ie' isué tö Benjamín debitü ie'pa wä. Ie' tö iché iu kuëblu a:

—Wëpa wíkkë tsúmi ye' u a. Be' yú baka ttökwä elka e' kaneú se' a. Ie'pa chköke i'ñe ye' ta dibata a.

<sup>17</sup>Etä iu kuëblu tö iwakanewé wes ichéitö ia es. Imítserak iwä e' ta José u a. <sup>18</sup>Erë tajë ie'pa tkine-wä imítserak iwä José u a e' kuëki. Ie'pa ttöramirak ñita: Ie'pa tso' se' kítö'uk. Ie'pa tö inuköl ië'mi se' sku' a e' nuí tkëne se' mik. E' nuí kuëki ie'pa tö se' klö'werawä kanëblök ie'pa a kanè mésopaie kè patuè ta' ese. Ñies se' iyiwak klö'werawarakitö nuí ki.

<sup>19</sup>Mik ie'pa demi u wékkö a, etä ie'pa de tsinet u kuëblu wörki <sup>20</sup>ta ichéraitö ia:

—A kékëpa, suköt sa' dë' ië chke-wö taük. <sup>21</sup>Erë sa' dë'mi wé sa' kapökerö eë ta sa' sku' kòs kkò wöttsée ta e' a kòs sa' tö chkewö to' e' inuköl kuéne sa' tö seraä. E'

debitüne sa' wä mène. <sup>22</sup>Ñies sa' wä inuköl skà de chkewö kí tuoie. Erë kè sa' wä ijcher yi tö sa' inuköl ië'kane sa' sku' a.

<sup>23</sup>U kuëblu tö iiüté:

—Kè a' tkinuk. Kè a' suanuk. Ye' tö a' chkewö pato' e' inuköl klöo'. A' Këköl dör a' yé Këköl ñies, e' tö inuköl e' ië'wä a' sku' a.

E' ukuöki ta ie' tö Simeón yéttsa tsémi wé iëlpa tso' eë. <sup>24</sup>E' ukuökí ta imítserak iwä seraä José u a. Etä di' méitö iarak klö skuoie. Ñies iburro tiéraitö. <sup>25</sup>Ie'pa wä ijchenewä tö eë ie'pa chköke José ta dibata a. E' kuëki ie'pa wä íyi kak de ie' a e' dapa'wérakitö mè ie' a.

<sup>26</sup>Mik ie' dewä weshkë, etä ie'pa wä íyi kak de e' mé ia. Ie'pa wöéwaie dö iski idalöiök. <sup>27</sup>Ie' tö ie'pa shkë'wé ta ichakéitö:

—A' yé de kékëpalatke yë' a' tö ye' a suköt zis e' tso'? zIdobyërkeia?

<sup>28</sup>Ie'pa skà wöéwane dö iski ta ichéitö:

—A kékëpa, tó, sa' yé tso' buaë. Ie' dobyërkeia.

<sup>29</sup>Etä José ká sué ipamik shkit, ta Benjamín dör iël ekka imi wa ena iyé wa e' suéitö. Etä ichéitö ie'pa a:

—A' èl tsirla yë' a' tö zé' dör wí?

Ie' tö iché Benjamín a:

—A alà, Skököl er buaë chò be' a. <sup>30</sup>Ie' tö iël suéwä e' tö ie' ttsë'wé buaë ta ie' iakkä. Bet ta ie' e' ské-ttsa mía wé ikapöke eë iük. <sup>31</sup>Mik ie' ié one ta ier pablëne ta iwö skuée ta imíane iëlpa skà ta ichéitö: “Chkò watió bet.”

<sup>32</sup>José tiéraitö bánet. Iëlpa tiéraitö bánet. Egiptowak chköke

José u a e'pa tiérakitö bänet ñies. Hebreowak dör ñá egiptowak a e' kuëki ie'pa kè a kawö ta' chkök ie'pa ta' ñita. <sup>33</sup>José tö ie'pa tulök-wa patké chkök ñi o'mik wes duas tso' iki es dö ibataë. Ie'pa tö ibikeitsé: “¿Wes ie'pa wa se' duéswö jcher?” E' kuëki ie'pa tkinewa tajë ta' ñi suëka. <sup>34</sup>Ie'pa dëne chkè tso' José mesa ki e' wa. Es iméitö ulitane a. Erë Benjamín a chkè méitö kibiie dökä sketökicha iëlpa dëne e' tsata. Ie'pa chké tajë blo'yé José ta' ttsë'ne buaë.

#### José tka' tso' iwa wayè

**44** <sup>1</sup>E' ukuöki ta' iu kuëblu kiére José tö ta' ichéitö ia:

—Ie'pa sku' qos wà iókä chië chkewö wa. Ñies ie'pa inuköl iókane isku' qos kkò ki. <sup>2</sup>Ñies ye' tka' yöule inukölchka wa tso' ye' wa wayè e' iókä ie'pa ël tsirla e' sku' kkò ki, inuköl chkewö patuq e' ta' ñita.

Etä u kuëblu tö iwakanewé wes José tö iché ia es. <sup>3</sup>Bule es bla'mi diwö tschine ta' José tö iëlpa a kawö mé shkökne iu a iburroë. <sup>4</sup>Kam ie'pa dömi kamië, etä ie' tö iché iu kuëblu a:

—Be' yú ie'pa itöki. Mik be' ikué, etä ichö ia: ‘Ye' e' wé buaë a' ta, ¿iök a' e' wamblé sulu ye' ki? ¿Iök a' tö ye' wökir tka' yöule inukölchka wa, <sup>5</sup>e' dör wayè ena iyi tötkoie, e' bléwabitu a' tö? A' e' wamblé suluë.’

<sup>6</sup>Mik ie' ikuérak, etä ichéitö wes iwökir tö iché ia es. <sup>7</sup>Etä ie'pa tö iiuté:

—¿Iök be' tö ttè e' ché sa' a es? Kè ekké chók sa' e' wamblöpa.

<sup>8</sup>Sa' bite Canaán tkörö ië inuköl mine sa' sku' a e' mukne. ¿Wes be' ibikeitsèmi tö sa' tö inukölchka ö orochka e' bléwami be' wökir u a? <sup>9</sup>Sa' sku' shuyulö. Yi icha a ikuébö, as e' wák duöwa. Sa' malepa atë be' kanè mésopaie.

<sup>10</sup>Ie' tö iché ie'pa a:

—Iwà tköraë wes a' tö iché es. Erë wé ék sku' a ikunewa e' è döraë ye' kanè mésoie. A' malepa kè iane iwiie. A' mi'mine buaë.

<sup>11</sup>E' bet ie'pa ulitane tö isku' éwa iski ta' ikkò wöttsélor. <sup>12</sup>U kuëblu tö sku' shuyulérak ikibi ék kewe dö itsirla Benjamín ska'. Etä Benjamín sku' kkò a tka' àr. <sup>13</sup>Ie'pa datsi' jchélor eriane tajë kuëki. Ie'pa dalì payuéne burro ki ta' ibiteyalne José ska'. <sup>14</sup>Mik Judá ena iëlpa demine José ska', etä José duriä. Ie'pa wöéwa iski iwörki.

<sup>15</sup>E' dalewa ie' tö iché iarak:

—¿Iök a' e' wamblö es? ¿A' kè wa ijcher tö wëm dör wes ye' es, e' s'tötkè buaë?

<sup>16</sup>Judá tö iiuté:

—¿Ima sa' tö be' iütèmi? ¿I wa sa' tö be' a ikkachèmi tö sa' kè wa i sulu wamblène? I wamblèule sulu sa' wa e' sué Skököl tö. I' sa' iëter be' wörki. Sa' klö'ú be' kanè mésoie. Yi sku' a be' tka' kune e' klö'ú ñies.

<sup>17</sup>Erë ie' tö iiuté:

—Kè ye' a e' wamblènik es. Yi sku' a ye' tka' kune, e' è atë ye' kanè mésoie. A' malepa mi'mine buaë a' yé ska'. Kè yi tö a' tsiriwepa.

#### Judá kköché siarla Benjamín dalërmik

<sup>18</sup>Etä Judá debitu José wörki tsinet, etä ichéitö ia:

—A këkëpa, be' we'ikèyö, mishka ttök se' böl è. Be' dalò dör wes Egipto blú dalò es e' kuëki kè be' ulunuk ye' ki. <sup>19</sup>Be' tö sa' a ichaki' tö sa' yé ta', sa' èl skà ta'. <sup>20</sup>Sa' tö be' iütè' tó, sa' yé ta' këkëpalatke, ñies sa' èl ta' eköl ià duladula. E' kune mik sa' yé kënewatke eta. Sa' be' a iyè' tö sa' yé ki tajë ilà tsirla ék kiar. Alà e' è atéat imi a. Ie' èl blënewa. <sup>21</sup>Be' tö sa' a iyè' tö alà e' tsúbitu suèyö. <sup>22</sup>Sa' tö be' a iyè' tö kè ie' dõpa. Kè ie' a iyé menukat ekõrla. Mik ie' tö iyé méat eköl, eta iyé duöwami ie' dalërmik. <sup>23</sup>Erë be' sa' a iyè' tö sa' kè wà ie' dè', e' ta be' kè sa' kiepawa.

<sup>24</sup>“Mik sa' dè'mine sa' yé wörki, eta ì kos yè' be' tö sa' a, e' paké sa' tö ie' a. <sup>25</sup>Ie' tö sa' a iché: ‘A' yúne chkewö taük.’ <sup>26</sup>Erë sa' tö iüté: ‘Sa' kawõtá sa' èl tsirla tsukmi. Sa' kè wà ie' mîne, e' ta wëm e' kè tö sa' kiepawa.’ <sup>27</sup>Ie' tö sa' iüté: ‘A' wà ijcher buaë tö ye' alaköl e' tö ye' a alà mé böl è. <sup>28</sup>Iaiaë eköl minea ye' yöki, kè ye' wà isuneia. Ye' ikl'wé tö ie' kötwa iyiwak sulusi tö. <sup>29</sup>A' wà ye' alà bata i' mítser ta ì sulu tka ie' ta ñalá wa, e' ta wö'kela i' duörawa eriar è wà. Itka es, e' ta a' iane iwiie.’

<sup>30-31</sup>“Sa' yé éna ilà dalër tajë. E' kuëki sa' demine ie' ska', erë ie' isué tö ilà tsirla kè dè'ne sa' wà, e' ta ie' duörawa eriar è wà. E' wiie sa' iardaë. <sup>32</sup>Ye' tö ye' yé a iyè': ‘Ye' e' chò be' alà tsirla kkö'nuk. Ye' kè wà idè'ne, e' ta ye' iane iwiie këkraë.’ <sup>33</sup>E' kuëki ye' kköchò be' a tö ye' tsúat be' kanè mésoie, alà tsirla skéie. Ie' ómi as imi' iëlpa ta. <sup>34</sup>Alà

tsirla kè minene ye' ta, e' ta ¿wes ye' mi'mine ye' yé ska'? Ye' kè ki ye' yé kiane suè weinuk siarè.”

### José e' chéka iëlpa a

**45** <sup>1</sup>José kè a iwöklöneia ikanè mésopa ulitane tso' kanëblök ee e'pa wörki. E' kuëki ie' tö iché ie'pa a aneule: “A' kos yúshka bánet. Sa' múat sa' wakpa è.” Es mik José e' chéka iëlpa a, eta ikanè mésopa kè ku' yës ie' ta.

<sup>2</sup>Etá ie' iéka tajë, e' ttsé Egipto wakpa tö. Egipto blú a itté demi tö José tso' iük. <sup>3</sup>José tö iché iëlpa a:

—Ye' dör José. ¿Se' yé tso'ia ttsè'ka?

Ie'pa tkirulune tajë suane José yöki, e' kuëki kè ie'pa a ie' iütëneia. <sup>4</sup>José tö iché ie'pa a:

—A' shkówa tsinet ye' o'mik.

Mik ie'pa e' skéwa tsinet, eta ie' tö iché ie'pa a:

—Ye' dör a' èl José watot'tsa a' tö tsèmi Egipto e'. <sup>5</sup>Skëköl tö ye' patkè'bitu ie a' yöki kewe s'tsatkoie ketba ulà a. E' kuëki kè a' erianuk, kè a' tkinuk ye' watot'tsa a' tö e' kuëki. <sup>6</sup>Ketba de e' ki duas de bök. Etá duas skël kianeia. E' shua iyi kos kuatkëmisö erë kè itskirpa yës. <sup>7</sup>Erë Skëköl tö ye' patkè'bitu ká i' ki a' yöki kewe as a' aleripa kè erwa as Skëköl tö a' tsatkò ie' diché tajë e' wa. <sup>8</sup>Es Skëköl wák tö ye' patkè'bitu ie, e' kè dör a' ye' watot'tsa e' kuëki. Skëköl tö ye' méka Egipto blú pattökwakie. Ye' dör ie' u kuëblu ena Egipto wa'ñe wökir. <sup>9</sup>A' yúne bet ye' yé ska' ta ichó ia: ‘Be' alà José ttè i' patkébitu be' a: Skëköl tö ye' méka Egipto

ká kōs, e' wōkirie. Be' shkō ye' sauk bet. Kè bö ipanuk tajë. <sup>10</sup>Be' serdaë ká kiè Gosen ee be' yamipa kōs ta, ñies be' iyiwak kōs ena ì kōs tso' be' wā ekkē ta. <sup>11</sup>Ketba duéswō kianeia skel. E' kuëki ye' tö chkewö meraë a' ulitane a as a' wa chkewö tso' wë'. <sup>12</sup>Ye' ël Benjamín ena a' ulitane tö ichèmi ye' yé a tö mokì ye' wák tté a' ta. <sup>13</sup>Ipakó ye' yé a tö ye' dör Egipto wōkir. Ñies ì kōs sué a' tö íe, e' pakó ia. iYe' yé tsúbitu bet íe!

<sup>14</sup>Etá José tö iël Benjamín paklö'wéwa ta ijéka. Es Benjamín tö José paklö'wéwa ta ijé ñies. <sup>15</sup>Etá José tö iëlpa kōs wöalattsé, ñi paklö'wéwarak ta ijérak. Etá erpa iëlpa er deka ttök ie' ta.

<sup>16</sup>Etá Egipto blú u a ttè demi tö José ëlpa debitu ie' ska', e' tö Egipto blú ena ikueblupa kōs e'pa ttsé'wé buaë. <sup>17</sup>Etá Egipto blú iché José a:

—Ichó be' ëlpa a: 'A' chkewö payuó iyiwak kì ta a' yúne Canaán. <sup>18</sup>Etá a' yé ena a' yamipa kōs e' tsúbitu ye' a. Ká tso' Egipto e' bua'ie mekeyö a' a. Ñies chkewö tso' Egipto e' bua'ie mekeyö a' a.' <sup>19</sup>Ñies ichó ie'pa a: 'karreta tsúmi tajë a' alakölpa ena a' ala'r ena a' yé e'pa kōs tsobitu. <sup>20</sup>Egipto íyi tso' bua'bu' e' kakmeraëyö a' a. E' kuëki kè a' tkinuk ì tso' a' wā e' kì.'

<sup>21</sup>Etá Jacob ala'r tö iwé i' es. José tö karreta mé ie'pa a wēs Egipto blú tö iché es. Ñies chkò méitö ie'pa a ñè ñala kì. <sup>22</sup>Ñies datsi' pa'alì mé iarak e' mane'woie. Erë Benjamín a datsi' kak-méitö sketökicha iënoie. Ñies

inuköl wömulë méitö ia döka cien mañalyök (300). <sup>23</sup>Íyi bua'bu' tso' Egipto e' kak patkëmi iyé a payöule burro kì döka dabop. Ñies trigowö ena pan ena chkewö skà e' payuëitö burro dabop skà kì iyé a ñè ñala kì. <sup>24</sup>Mik José ëlpa mitke, etá José tö iché ie'pa a:

—Kè a' mía ñippök ñala kì.

<sup>25</sup>Ie'pa e' yéttsa Egipto a demi Canaán iyé ska'. <sup>26</sup>Etá ie'pa tö iché iyé a: "Be' alà José tso'ia ttsë'ka. Ie' tso' Egipto ká kōs e' wōkirie." Ttè e' tö Jacob wōkrawéwa tajë. Kè uteia. Ie' kè wā ttè e' klöone. <sup>27</sup>Erë mik ie'pa tö ì kōs yé' José tö ie'pa a e' paké iyé a, ñies mik Jacob tö karreta patké José tö ie'pa tsomi e' sué, etá ie' er dekañe ttsë'ne buaë. <sup>28</sup>Etá ie' iché: "E' è kata ye' a, ye' alà José tso'ia ttsë'ka. Ye' mi'ke isauk kam ye' blërwa, e' dalewa."

### Jacob mía Egipto

**46** <sup>1</sup>Etá Jacob e' yéttsa iu a. ì kōs tso' iwa e' mítser seraa. Mik idemirak ká kiè Beer-seba ee, etá iyiwak ña'wéitö iyé Isaac, e' Këköl dalöioie. <sup>2</sup>E' nañewe Skëköl tté ie' ta kabsueie ta ikiéitö ikiè wa:

—A Jacob.

Jacob tö iiuté:

—¿Ì?

<sup>3</sup>Etá Skëköl iché ia:

—Ye' dör be' Këköl. Ye' dör be' yé Këköl. Kè be' suanuk shkök-mi Egipto. Ee ye' tö be' aleripa alöweraë tajë. <sup>4</sup>Ye' mi'ke be' ta Egipto. Ñies ye' wák tö be' aleripa yerattsane ká e' a. Ñies mik be' duökewatke etá José tso' be' o'mik.

<sup>5</sup>E' ukuöki tã Jacob e' yéttsã Beerseba a. Etã ie' ala'r tö ie' iéka karreta patkë' Egipto blú tö ie'pa tsömi e' a. Ñies ie'pa ala'r ena ie'pa alakölpa e'pa iékarakitö karreta a. <sup>6</sup>Etã Jacob mía Egipto iyamipaë se. Ie' baka kôs ena ie' obeja kôs e' mítser ie' wã. Ñies ì kôs dë' ie' ulà a Canaán e' mítser ie' wã sërãã. <sup>7</sup>Ila'r kôs ena isibayökpa kôs e'pa mía da'a Egipto.

<sup>8</sup>Ikkëpa dör Israel aleripa mineyal Egipto. E'pa dör Jacob ena ila'r.

Rubén, e' dör Jacob alà kibi ék. <sup>9</sup>Etã Rubén ala'r kiè: Hanoc, Falú, Hesrón, ena Carmí.

<sup>10</sup>Simeón ala'r kiè: Jemuel, Jamín, Óhad, Jaquín, Sóhar, ena Saúl. Saúl mì dör canaánwak.

<sup>11</sup>Leví ala'r kiè: Guersón, Quehat ena Merarí.

<sup>12</sup>Judá ala'r kiè: Er, Onán, Selá, Fares ena Zérah. (Er ena Onán, e'pa blënewã Canaán.) Fares ala'r kiè Hesrón ena Hamul.

<sup>13</sup>Isacar ala'r kiè: Tolá, Puvá, Job ena Simrón.

<sup>14</sup>Zabulón ala'r kiè: Séred, Elón ena Jahleel.

<sup>15</sup>E'pa kôs dör Jacob ala'r kune Padán-aram Lía tã. Ie'pa kutà kiè Dina, e' kune eë ñies. Jacob aleripa kôs wëpa ena alakölpa e' dökã dabom mañayök kï mañal (33).

<sup>16</sup>Gad ala'r kiè: Sefón, Haguí, Esbón, Suní, Erí, Arodí, ena Arelí.

<sup>17</sup>Aser ala'r kiè: Imná, Isvá, Isví ena Beriá. Ie'pa kutà kiè Sérah. Beriá ala'r kiè Heber ena Malquiel.

<sup>18</sup>E'pa dör Jacob aleripa Zilpá tã, e' mé Labán tö ilà busi Lía, e' a ikanè

mésoie. Ie'pa kôs dökã dabom eyök kï teröl (16).

<sup>19</sup>Jacob alaköl kiè Raquel, e' ala'r kiè José ena Benjamín. <sup>20</sup>José ala'r dör ilaköl Asenat tã e'pa kiè Manasés ena Efraín. Ie'pa kune Egipto. Asenat dör wëm kiè Potifera, e' alà busi. Potifera dör egiptowak awá eköl. Ie' kaneblöke kã kiè On eë. <sup>21</sup>Benjamín ala'r kiè Bela, Béquer, Asbel, Guerá, Naamán, Ehi, Ros, Mupim, Hupim ena Ard. <sup>22</sup>E'pa dör Jacob aleripa Raquel tã. Ie'pa kôs dökã dabom eyök kï tkël (14).

<sup>23</sup>Dan alà kiè Husim. <sup>24</sup>Neftalí ala'r kiè: Jahseel, Guní, Jezer, ena Silem. <sup>25</sup>E'pa dör Jacob aleripa ilaköl Bilhá tã, e' mé Labán tö ilà busi Raquel a ikanè mésoie. Ie'pa dökã kul (7).

<sup>26</sup>Jacob tã iyamipa ekkã mîne Egipto, e' wakpa dökã dabom teryök kï teröl (66). Ie' ala'r e' alakölpa, kè shtane ishüã. <sup>27</sup>José ala'r kune Egipto e'pa dör böl. Jacob yamipa dë'mi Egipto dökã dabom kuryök (70) sërãã.

<sup>28</sup>Etã Jacob tö ilà Judá patkëmi kewe José a ibiyöchök: “Be' shkó Gosen ye' ñaletsuk.” Etã mik ie'pa demi Gosen, <sup>29</sup>etã José tö ikanè mésopa ké ie' karreta yöktsã tsëmi iyé ñaletsöie. Mik idemi iyé ska' etã iyé paklö'wëwãitö etã ie' ié taië.

<sup>30</sup>Etã Jacob tö iché José a:

—Ire' ye' blërwãmi buaë! Ye' be' suéne buaë, be' serkeia e' kuëki.

<sup>31</sup>Etã José tö iché iyamipa kôs a:

—Ye' mía Egipto blú a a' biyöchök tö 'ye' ëlpa ena ye' yé yamipa kôs serke Canaán e'pa

debitu e' tsukat ye' ska'. <sup>32</sup>Ie'pa dör iyiwak alöukwakpa. E' kueki ie'pa baka kos ena ie'pa obeja kos ena i kos tso' ie'pa wa e' debitu ie'pa wa.' <sup>33</sup>Mik Egipto blú tö a' chaké: '¿I dör a' kanè?', <sup>34</sup>e' ta ichó ia: 'Kekraë sa' kanè dör iyiwak alöuk wes sa' tsá bak es.' Egiptowak kè kàne senuk obeja alöukwakpa ta ñita, e' kueki Egipto blú kawö mèmi a' a senuk Gosen.

**47** <sup>1</sup>Eta José mía ibiyó muk Egipto blú a ta ichéitö ia: "Ye' yé ena ye' élpa serke Canaán, e'pa debitu ie. I' ta ie'pa tso' Gosen. Ie'pa obeja ena baka ena i kos tso' iwa e' debiturak iwa serea."

<sup>2</sup>José tö iélpa shushtë döká skel ta imítser iwa Egipto blú ska' as ie' tö iwakpa saü. <sup>3</sup>Eta Egipto blú tö José élpa a ichaké:

—¿I dör a' kanè?

Eta ie'pa tö iüté:

—A kékëpa, sa' dör obeja alöukwakpa wes sa' tsá bak es.

<sup>4</sup>Ketba meneká taië sa' kaska'. Sa' iyiwak a kè chkè ta'ia, e' kueki sa' bitea senuk ká i' ki. Be' we'ikè sa' tö, kawö mú sa' a senuk Gosen.

<sup>5</sup>Eta Egipto blú tö iché José a:

—Be' yé ena be' élpa de senuk be' ta. <sup>6</sup>Ká tso' Egipto e' wé kiane be' ki e' mú ie'pa a senoie. Kos ká tso' Egipto e' bua'ie dör Gosen e' mú ie'pa a senoie. Be' yamipa shua wëpa tso' iyiwak kkö'nè buaë, e' ta esepa múka ye' iyiwak kkö'nuk.

<sup>7</sup>Ñies José wa iyé Jacob mí kka-chè Egipto blú a. Jacob tö Egipto blú shké'wé er bua' wa. <sup>8</sup>Eta Egipto blú tö ie' a ichaké:

—¿Kos duas tso' be' ki?

<sup>9</sup>Jacob iüté:

—Ye' ki duas de cien eyök ki dabom mañayök (130) shkök wì a dià a. Kawö e' kè dör taië. E' tka ye' ki darërë. Erë kam ye' ki duas dò kos ye' yépa ki duas bak ekkè.

<sup>10</sup>E' ukuöki ta Jacob e' chéat Egipto blú a ta imía. <sup>11</sup>Eta José tö ká bua'buatso' Egipto, e' mé iyé ena iélpa a senoie wes Egipto blú tö iché es. Ká e' atë Ramsés. <sup>12</sup>Ñies ie' tö chkewö meke iyamipa a kos ila'rla tso' u a u a ekkè.

#### José tö chkewö watué Egipto wakpa a

<sup>13</sup>Ká ulitane kè iyi wöria, e' kueki ketba kí tkërke poë. Ketba tö s'tteke taië Canaán ena Egipto. <sup>14</sup>Chkewö tué Egipto wakpa tö ena Canaánwakpa tö, e' ské kos blé José tö Egipto blú u a. <sup>15</sup>Mik Egipto wakpa ena Canaánwakpa inuköl enewa serea, eta Egipto wakpa mía José ska' ta iché ia:

—iBe' sa' a chkewö mú! Kè sa' inuköl ta'ia. Kè idör bua' tö e' è kueki be' tö sa' méttsa duökwa ketba a.

<sup>16</sup>Eta ie' tö ie'pa iüté:

—A' kè wa inuköl ta'ia, e' ta a' iyiwak tsúbitu ña, e' skéie ye' tö a' a chkewö meke.

<sup>17</sup>Egipto wakpa wa kabaio ena obeja ena baka ena burro e' kos mí ie' a. E' skéie ie' tö chkewö mé ie'pa a dò duas ek. <sup>18</sup>Das e' tka eta ie'pa míyalne ie' ska' ta iskà ché ia:

—Be' wa ijcher buaë tö kè sa' wa inuköl ta'ia. Ñies sa' iyiwak kos, e' dör be' icha. Sa' ká è tso'ia sa' wa ena sa' wakpa, e' è tso'ia sa' wa mè



be' a <sup>19</sup>Sa' wákpa taú. Sa' ká taú ñies. E' skéie iyiwö mú sa' a. Sa' kanablömi sa' wákpa ká a Egipto blú a. Es sa' atē Egipto blú kanè mésopaie. Etā chkewö è memibö sa' a as kè sa' duòlur ketba wā ena sa' ká kè weir é ichók.

<sup>20</sup>Egipto wakpa tö iká watuéttsa José a ketba kuēki. Es Egipto ká kos de Egipto blú ulà a. <sup>21</sup>Ñies Egipto wakpa kos atē blu' kanè mésopaie. <sup>22</sup>Ie'pa sacerdotepa ká e' è kè tōne José wā. Egipto blú tö chkewö kakmeke ie'pa a, e' kuēki ie'pa kè wā iká watonettsa.

<sup>23</sup>E' ukuöki tā José tö iché Egipto wakpa a:

—A' wákpa kos ena a' ká kos e' to'ttsa ye' tö se' blú a, e' kuēki i'ñe tā a' kos atē ie' ulà a. Iyiwö i' tsúmi a' tö tā ikuatkó. <sup>24</sup>Mik iwöne tā iyiwö tso' dōka sacco skel, etā itsá yóttsa sacco et mè Egipto blú a. Iyiwö eyök atē e' dör a' a kuatkè, ñies a' yamipa ulitane a ñanoie.

<sup>25</sup>Etā ie'pa tö iiuté:

—Be' tö sa' tsátké ketba ulà a. Be' er bua' sa' tā. E' kuēki sa' e' chöke Egipto blú kanè mésopaie.

<sup>26</sup>Es José tö kawö mé Egipto wakpa a tö iyiwö tso' dōka sacco skel e' tsá yóttsa sacco et mè Egipto blú a. I'ñe tā e' wekeia ie'pa tö es. Egipto sacerdotepa è kè kawöta iyiwö tsá muk Egipto blú a, ie'pa ká kè dē' Egipto blú ulà a e' kuēki.

**Jacob tö ittè bata ché José a**

<sup>27</sup>Es Israel aleripa e' tséat senuk Gosen, ká e' atē Egipto. Ká e' kos de ie'pa ulà a. Eē ie'pa alöne taië. <sup>28</sup>Jacob sene'ia ká e' a duas dōka

dabom eyök ki kul (17). Duas de ie' ki cien eyök ki dabom tkéyök ki kul (147).

<sup>29</sup>Mik ie' tö ittsé tö iduökewatke, etā José tsuk patkétö tā ichéitö ia:

—Moki be' er buaë chak ye' a, e' tā be' ulà múwā ye' tu' dikia iwā kkachoie tö moki i' kiekeyö be' a e' waweraëbö. Ye' nu kè wötarwā Egipto. <sup>30</sup>Mik ye' blënewā mia ye' dëütöpa itöki, etā ye' nu yóttsa ká i' ki tsúmi wötèwā ie'pa pö a.

Etā José tö iiuté:

—Es yö iweraë.

<sup>31</sup>Iyé tö iché ia:

—Ichó ña moki Skéköl wörki tö be' iweraë es.

Etā José tö ittè mé moki iyé a. Etā Jacob wöméwā iká' ki tā Skéköl kikékaitö.

**Jacob er buaë ché José ala'r a**

**48** <sup>1</sup>E' ukuöki tā ie'pa wā biyö debitü José a: “Be' yé duöke tso' suluë.” Etā José mia isaük ila'r böl mí iwā e' tā. <sup>2</sup>Mik ie'pa tö iché Jacob a tö José debitü be' saük, etā ie' e' tkéka isulú wa iká' ki. <sup>3</sup>Etā ie' tö iché José a:

—Skéköl Diché Tā' Iyi Ulitane Tsata e' e' kkayë' ye' a ká kiè Luz atē Canaán eē. Eē ie' er buaë yé' ye' a <sup>4</sup>tā ichéitö ña: “Ye' tö be' aleripa alöweraë taië. Ie'pa döraë ká taië e' wakpaie. Ká i' meraëyö ie'pa a, e' atdaë ie'pa ulà a kekraë michoë.”

<sup>5</sup>Be' ala'r böl, Efraín ena Manasés, e'pa kune kam ye' dò Egipto e' yöki. Ie'pa tsétköyö wes ye' wák ala'r es wes ye' ala'r Rubén ena Simeón dör ye' ala'r es. <sup>6</sup>E' kuēki ká meraëyö ie'pa a wes ye' wák

ala'r a es. Ie'pa itöki be' ala'r skà kurmi, e'pa dör be' wák a. Erë ie'pa dör Efraín ena Manasés ëlpa, e' kuëki ká ñe' kak döraë ie'pa ulà a ñies. <sup>7</sup>Mik ye' manét Padán-aram e' demi Canaán dökettsatke Efrata, etä eë ñalā kī be' mī blēnewā ye' yökī. Eë ye' tō ie' nu blē'wāat Efrata ñalé kī. (I'ñe tā ká e' kiè Belén.)

<sup>8</sup>Mik Jacob tō José ala'r sué etä ichakéitō:

—¿Sëpa dör yi?

<sup>9</sup>Ie' tō iiuté:

—I'pa dör ye' ala'r mé Skëköl tō ye' a ká i' kī.

Etä iyé tō iché iā:

—Ie'pa tsúbitu ye' ska' as ye' er bua' chò ie'pa a.

<sup>10</sup>Jacob kënewatke e' kuëki iwöbla kè wawëriā buaë. E' kuëki José tō ila'r patkëmi tsinet iyé o'mik. Etä Jacob tō italapa pakl'wé wöalattsé. <sup>11</sup>E' ukuökī ichéitō José a:

—Ye' ibikeits tō ye' kè tō be' suëpaia, erë Skëköl tō kawö mé ye' a be' ena be' ala'r suoie.

<sup>12</sup>Etä José tō ila'r skëttsā iyé o'mik tā iwöëwa dò iski iyé dalöioie. <sup>13</sup>E' ukuökī tā ila'r böi klö'wëwāitō iulā a. Efraín mí José ulà bua'kka, Manasés mí José ulà baklī'kka. Es itsémiitō iyé ska'. Etä Efraín atē Jacob ulà baklī'kka, Manasés atē Jacob ulà bua'kka. <sup>14</sup>Erë Jacob ulà bua'kka mékā Efraín dur ie' ulà baklī'kka e' wökir kī. Eré e' dör alà tsirla. Etä iulā baklī'kka mékāitō Manasés dur ie' ulà bua'kka e' wökir kī. Eré e' dör alà kibi. Es Jacob ulà tsétkö wī'kë iö'kë. <sup>15-16</sup>Etä ier bua' ché José a i' es:

“As Skëköl er buaë chò ala'r böi i' a këkraë.

Ye' yépa bak Abraham ena Isaac, e'pa bak Skëköl e' dalöiök,

e' tō ye' kkö'nami kuaë dò ikkë tā.

Ie' tō ye' tsatké këkraë iyi sulusi ulà a.

As ala'r i' wa kè ye' chöwa sulitane éna këkraë.

Ñies ye' yépa bak Abraham ena Isaac as e'pa kè chöwa sulitane éna këkraë.

As ala'r i' alör taië ká ulitane kī.”

<sup>17</sup>Jacob ulà bua'kka mékā Efraín wökir kī, e' kè mène José a buaë. E' kuëki ie' tō iyé ulà bua'kka e' klö'wëwā mékā ilà kibi dör Manasés e' wökir kī. <sup>18</sup>E' dalewa ichéitō iā:

—iA yéwö, kè idör es! I' dör alà kibi. Be' ulà bua'kka múkā i' wökir kī.

<sup>19</sup>Erë iyé kè wā ioné es. Ie' tō iché iā:

—iA alà, e' jcher ye' wā, e' jcher ye' wā! Ie' alördaë taië, ie' döraë këkëpa taië. Erë itsirla ék e' döraë këkëpa taië shutē ikibi tsatā. Ñies ie' aleripa döraë ká taië e' wakpaie.

<sup>20</sup>Es e' è diwö wa Jacob er buaë skà ché italapa a i' es:

—Mik Israel aleripa er buaë cheke ñi a etä ie'pa tō icheraë ñi a i' es: ‘As Skëköl er buaë chò be' a wës Efraín ena Manasés e'pa a er buaë yëne es.’

Es Jacob er buaë ché Efraín a, Manasés a imène, e' tsatā. <sup>21</sup>E' ukuökī tā José a ichéitō:

—Ye' duökewatke erë Skëköl tö a' kkö'neraë. Ie' wä se' aleripa mirane Canaán wé se' yépa bak senuk ee. <sup>22</sup>Ye' tö ká bua'ie méat be' a ime'bakyö be' ëlpa a e' tsata. Ká e' kiè Siquem. E' yé'ttsa ye' tö amoreowak ulà a ñippè wa.

Jacob tö ittè bata ché ila'r kos a

**49** <sup>1</sup>Jacob tö ila'r kié e' ska' ta ichéitö ie'pa a: “A' e' skówa ye' o'mik. Ì tköraë a' ta e' wà chekeyö a' a:

<sup>2</sup>“A ala'rla, a' e' skówa tsinet ye' ttò ttsök, ye' dör a' yé. Ye' ttò ttsó.

<sup>3</sup>“A Rubén, be' dör ye' alà kibi. Be' dör ye' diché tsá e' alé. Be' dalöiërta' tajë, be' diché ta' tajë be' ëlpa tsata.

<sup>4</sup>Erë i'ñe ta kè idör es. Be' dör wes di' yöliie es kè iwöklör yës. Be' tö ye' dalöseq'wa. Be' sene'ka ye' alaköl ta. E' kuëki be' kè dalöiërpaia wes ko'k es.

<sup>5</sup>“Simeón ena Leví, e'pa dör ñi ëlpa; ie'pa tabè tso' ñippoie è.

<sup>6</sup>¡Wé ie'pa e' dapa'uke ee ye' kè shkak! Ie'pa tö wëpa kötulur kësik è kuëki. Baka wë'ñe klökicha blublu e' télorakitö éanas.

<sup>7</sup>Ie'pa kësik dör suluë ichökle e' kuëki ie'pa kawö tköraë suluë.

¡Ye' tö ie'pa aleripa powerami senuk iëlpa malepa aleripa shua wì a dià a!

<sup>8</sup>“A Judá, be' ëlpa tö be' kíkera-ka tajë.

Be' bolökpa klö'wewaraë be' tö ikuli' a, es be' e' alöraka ie'pa ki. Be' ëlpa ëkka e' wöörawa iski be' dalöioie.

<sup>9</sup>¡A Judá, be' dör ye' alà! Be' dör wes ma'name alà es. Mik ì ttéitö ta ikaté one, eta ie' e' wöéwa e' téwa iski wes ma'name këchke es. ¿Yi dòmi ie' tsiriuk?

<sup>10</sup>Judá aleripa döraë blu'paie tajë këkraë dò mik iblú chók de eta.

Blu' e' ttò iüteraë sulitane tö.

<sup>11</sup>Ie' tö iburro pupula muëke uva shua.

Ñies idatsi' skuöke uva diò wa.

<sup>12</sup>Ie' wöbla dör daloloë uva diò tsata.

Ie' kà dör saruruë baka tsu'diö tsata.

<sup>13</sup>“Zabulón serdaë dayë kkömik. Eë tajë kanò irirke ese ké tso'. E' ká kkò dörawa Sidón kkömik.

<sup>14</sup>“Isacar dör wes iyiwak tso' dalì oie diché ta' tajë ese e' mùtër enuk iwé a es.

<sup>15</sup>Mik ie' isuë tö ká e' dör buaë senioie ñies enoie, eta ie' tsiwö ki dalì dekane kaneblök.

Ie' e' mëttsa kaneblök kanè mésoie, kè tkine e' ki.

16 “Dan ditséwö shuā s'shulirdaë  
buaë yësyësë wës Israel ale-  
ripa e' ditséwö malepa es.

17 Dan döraë wës tkabè chók  
tso' ñalā kkò a tö kabaio  
kuè iklò a tā iwák brutāne  
itsiwökka ese es.

18 “iA Jehová, ye' tso' be' panuk  
tö ye' tsatkó!

19 “Gad ppök ñippökwakpa  
döraë tajë.  
Erë ie' tö ie'pa pperaë,  
itötieraë.

20 “Aser ká kī chkè kata' buaë  
tskirdaë.  
Ì wörke kōs e' dör buaë shute  
mène buaë blu'pa a.

21 “Neftalí dör wës sulī alaki dur  
áie ala'rla tā' bua'buāala  
ese es.

22 “José dör wës burro kañiru suë  
dur di' tum kkömik es,  
wës burro pupula kañiru suë  
dur ká tukir kī es.\*

23 Kuaböt namépa éna sulu iar,  
ie' kī kuaböt uyérakitö kēsik  
wa.

24 Erë ie' ulà diché darërë;  
e' wa ie' wā ishkame'  
shuirikar darërëë,  
kè ulà shtrirtā'wā yës.  
Skököl tö ie' a diché e' mé.  
Skököl e' dör Jacob Kököl e'  
diché tā' tajë.

Skököl e' dör Israel aleripa  
kkö'nukwak.

Ie' tö Israel aleripa tsatkeke.

25 A José, be' yé e' Kököl tö be'  
kīmeke kekraë.

E' dör Skököl Diché Tā' Íyi Uli-  
tane Tsata,

Ie' er buaë chöraë be' a.

Kālī buaë patkeraë ie' tö be'  
daliwö kī.

Ñies be' a di' atdaë buaë iyök  
kī as be' dalikua talar buaë.

Be' aleripa alakölpa ala'r  
döraë tajë, ñies be' iyiwak  
döraë tajë.

Es Skököl er buaë chöraë be' a.

26 Be' yé er buaë yé' be' a,  
e' tkòkā ye' yé er buaë yé' ye'  
a e' tsata.

Skököl tö José shukit iēlpa  
shuā iwökirie,

e' a ie' er buaë chò michoë  
wës kabata yöbië kè ertā'wa  
es.

27 “Benjamín dör wës chichi  
kañiru kēsikie ese es;  
bla'mi tā iyiwak ttéwāitö katè,  
tsālī tā ibata watiéwāitö.”

28 E'pa dör Israel ditséwöpa daia  
itökī dōkā dabom eyök kī böt (12),  
e' yépa tsá. Es ie'pa yé tö ie'pa a  
iché mik ie' tö ittè bata ché ie'pa  
a etā.

#### Jacob blēnewā

29 Jacob tö iché ila'r wēpa a: “Ye'  
blērkewā e' kēwö dōkewātke. Mik  
ye' blēnewā, etā ye' nu blōwā ákuk

\* 49.22 José dör wës burro...ká tukir kī es: Ñies hebreoie ttè e' mane'wēmiso i' es: José dör  
wës kal tskirke di' kkömik es; tkakā iké kköiëule e' mik buaë, ñies iwördaë tajë.

a ká wé ye' yamipa nu blène ee. Pö e' atē wēm kiè Efrón dör hititawak e' ká a. <sup>30</sup>Ká e' atē Macpelá Mamré wöshaë. Ká e' atē Canaán. Ká e' ena ákuk e' wato'ttsa Efrón tö Abraham a as Abraham tö iyamipa nu blö ee. <sup>31</sup>Eë Abraham ena ilaköl Sara, ñies Isaac ena ilaköl Rebeca, e'pa nu blène. Eë ye' tö ye' alaköl Lía, e' nu blè'wä ñies. <sup>32</sup>Ká e' ena ákuk e' wato' hititawak tö.”

<sup>33</sup>Mik Jacob tö ttè e' kos ché one etä ie' e' tēwane ika' ki ta iblēnewa mía idēütöpa itöki.

**50** <sup>1</sup>Etä José tö iyé nu paklö'wéwä wöalattséitö ta iie' tajë. <sup>2</sup>E' ukuöki ta ie' tö egiptowak dör s'nu kanéukwakpa e'pa kié iyé nu kapeyökwa as kë inurwä. Etä es ikanewérakitö. <sup>3</sup>Ikanewérakitö dökä ká dabom tkëyök (40 días), ekkë kawö kiane ikanewoie e' kuëki.

Egiptowak tö ischó eriaitsé kawö dökä dabom kuryök (70 días). <sup>4</sup>E' ukuöki ta José tté Egipto blú kuëblupa ta, ta ichéitö ie'pa a:

—A' éna er bua' chak ye' a, e' ta a' yú ichök Egipto blú a <sup>5</sup>tö mik ye' yé duökewatke, etä ie' tö ye' ka' ie' a ttè muk Skököl wörki tö inú blerawayö ákuk kane'at ie' wák tö atē Canaán e' a. E' kuëki kawö mú ña ie' nu tsomi blèwä ee. Mik ye' ibléwä ta ye' dotkene.

<sup>6</sup>Etä Egipto blú tö iiuté:

—Be' yú be' yé nu blökwa wes ie' tö be' a iki' es.

<sup>7</sup>Etä José mía iyé nu blökwa. Egiptowak kuëblupa kos e'pa míyal ie' ta. <sup>8</sup>Jacob yamipa ekkä ena José yamipa ekkä ena iëlpa e'pa kos mí ñies. Ie'pa ala'r ena ie'pa iyiwak e'pa è atéat Gosen. <sup>9</sup>Ñies pè' mí tajë karreta ki ena kabaio ki. Es pè' mí tajë José ta. <sup>10</sup>Mik ie'pa demi ká kiè Goren-ha-atad atē tsinet di' Jordán diwö tskirke e' kker ee, etä ee ie'pa ulitane tö Jacob nu wötërkewä e' kéwö tkö'wé dalò tajë wa. Eë José tö iyé eriaitsé dökä ká kul.

<sup>11</sup>Mik canaánwak serke ee, e'pa tö Jacob nu wötërkewä kéwö tkö'wé e' sué, etä ie'pa tö iché: “Mokí egiptowak tö s'nu wötërkewä e' kéwö tkö'wéke dalò tajë wa.” E' kuëki ká e' kiè mékã ie'pa tö Abel-Misraim.\* Ká e' atē tsinet di' kiè Jordán e' kkömik.

<sup>12</sup>Es Jacob ala'r tö iyé nu kanewé wes ie' tö iyé' ie'pa a es. <sup>13</sup>Ie'pa wä inú mítser Canaán ibléwakitö ákuk yöule Abraham wä iyamipa pöie e' a. E' atē Macpelá. E' wato'ttsa hititawak kiè Efrón tö Abraham a. Ká e' atē Mamré wöshaë. <sup>14</sup>Mik José dütö nu blène one, etä ie' biteane Egipto. Ie' elpa ena pè' ulitane mine ie' ta e'pa kos biteyalne ie' ta.

**José elpa suanékané ie' yöki**

<sup>15</sup>Jacob blēnewä e' ukuöki ta José elpa tö ibikeitsé: “Isalema José éna sulu se' arke. Ì kos wamblé' se' tö ie' ki e' skéie se' we'ikeraëitö.” <sup>16</sup>E' kuëki ie'pa ttè

\* 50.11 Abel-mizraim: Hebreoie ká kiè e' wä kiane ché egiptowak schó eriaitsé.

mémi ie' a: “Kam be' yé blërwa, 17 etä ie' tö sa' a iché tö ichó be' a: ‘Ì kôs suluë wamblè' sa' tö be' kî, e' olo'yó sa' kî.’ E' kuëkî sa' kköchò be' a tö e' olo'yó sa' kî. Sa' tö be' yé e' Këköl dalöieke e' kuëkî.”

Mik biyö e' demi José a, etä ie' ié siarë. 18 Etä iëlpa demi iwökî. Ie'pa wöéwa dò ìskî idalöioie ta ichérakitö:

—I' sa' de be' wörkî. Sa' dör be' kanè mésopa.

19 Etä ie' tö ie'pa iüté:

—Kè a' suanuk. Ye' kè a a' shulinuk Skëköl skéie. 20 A' íyi sulu bikeits wamblè ye' kî, erë e' mane'wéttsane Skëköl tö buaë se' kî. E' wa taië pë' tsatkëne i'ñe ta. 21 E' kuëkî kè a' suanuk. Chkewö meraëyö a' a ena a' ala'r kôs a.

Es ie' tö ie'pa a iché er buaë wa. E' tö ie'pa ttsë'wéne buaë.

### José blënewa

22 José ena iyé alikpö yamipa e'pa sene'ia Egipto. Ie' sene' döka duas cien eyök kî dabom eyök (110). 23 Ie' tö ilà Efraín talapa e' ala'r suéia. Nies ie' tö ilà Manasés e' alà kiè Maquir e' ala'r suéia.

24 Ká et ta ie' tö iché iëlpa a: “Ye' duökewa e' këwö kianeia tsir. Erë Skëköl wák tö a' kïmeraë. Ie' tö a' yelurdaë ká i' kî. Ká yé'bakitö mè Abraham a ena Isaac a ena Jacob a e' a a' tsemiraëitö.” 25 Etä ie' tö iëlpa kié as ie'pa ttè mù ie' a Skëköl wörkî. Ie' tö ie'pa a iché: “Skëköl tö a' yerattsä ká i' kî. Mik e' tka, etä ye' sik tso' blëule e' tsúmi e' ta.”

26 Mik ie' blënewa Egipto, etä ie' kî duas de cien eyök kî dabom eyök (110). Ie' nu kapeyanewa as kè inurwa e' iënewa s'nu kélkuö a.